

# 第十冊目錄

## 總集類五(續七)

明文海

### 卷四百四十八

刑部右侍郎楓潭萬公墓誌銘(王錫爵)	一
禮部尚書兼翰林院學士贈太子太保琢庵馮公墓誌銘(王錫爵)	一二
總理河道提督軍務太子少保工部尚書兵部尚書兼都察院右副都御史印川潘公墓誌銘(王錫爵)	二八
戶部尚書本庵楊公墓表(王錫爵)	四三
周文恪公墓表(王錫爵)	五二
翁襄敏公神道碑(王錫爵)	六一
經略朝鮮薊遼保定山東等處軍務兵部左侍郎都察院右都御史桐岡宋公神道碑(王錫爵)	七三
王襄毅公墓表(王錫爵)	八五
資善大夫工部尚書兼都察院右副都御史晉川劉公神道碑(沈一貫)	九一
資政大夫禮部尚書兼翰林學士贈太子少保琢庵馮公神道碑(沈一貫)	九八

### 卷四百四十九

光祿大夫柱國少保兼太子太保兵部尚書贈太保謚襄毅王公墓誌銘(焦竑)	一〇七
----------------------------------	-----

### 卷四百五十一

明山西右布政使王君墓志銘(趙南星)	一一四
明吏部尚書贈太子太保孫清簡公墓誌銘(趙南星)	一三一
明少傅兼太子太傅兵部尚書李公碑(趙南星)	一五五
明通議大夫兵部右侍郎見泉魏公碑(趙南星)	一六六
陳恭介行狀(孫鑣)	一八一

### 卷四百五十二

總督薊遼保定軍務兼理糧餉備倭經略都察院右都御史兼兵部右侍郎震澤萬公墓誌銘(陳懿典)	二二二
大理寺左丞鼎梅劉公墓誌銘(倪元璐)	二二七

### 卷四百五十三

原任資政大夫禮部尚書兼東閣大學士青岳劉公暨元配累夫人曲氏累夫人王氏合葬墓誌銘(倪元璐)	二三五
---	-----

### 卷四百五十五

范養吾墓銘(陶望齡)	二四八
何長史墓表(婁堅)	二六二

### 卷四百五十七

五人墓碑記(張溥)	二七〇
-----------	-----

### 卷四百五十九

彭老峰銘(鄒元標)	二七五
-----------	-----



卷四百六十

瞿幼真墓銘(婁堅)	二七八
朱濟之墓銘(唐時升)	二八四
徐女廉墓銘(唐時升)	二八八
陳大士墓銘(艾南英)	二九三
卷四百六十四	
贈太子少保都察院右副都御史浮邱左公行狀(倪元璐)	三〇三
黃子澄先生墓田疏文(宋楸澄)	三一五
卷四百六十六	
曠豸山墓銘(鄒元標)	三一九
卷四百六十七	
外史張公墓碑銘(張綬)	三二二
卷四百六十八	
微道人生壙記(陳繼儒)	三二六
虎邱合葬三姬墓銘(陳仁錫)	三三〇
卷四百七十一	
明奉直大夫協正庶尹刑部四川清吏司員外郎近邾何公墓碑(瞿九思)	三三五
卷四百七十二	
金此川墓銘(鄒元標)	三四八
明魯山主簿吳公墓表(趙南星)	三五三
卷四百七十五	
祭李司徒文(丁薦元)	三五八
古陵坡弔古文(黃鳳翔)	三六五

卷四百七十七

年兄劉庭蘭哀辭(何喬遠)	三六九
林庭薄哀辭(何喬遠)	三七三
卷四百七十八	
祭徵君張紹和文(魏呈潤)	三七七
王百谷先生誄(夏樹芳)	三八一
祭橋李丁烈婦文(陳繼儒)	三八六
祭鄭閑孟文(婁堅)	三九〇
祭萬茂先文(黎遂球)	三九二
告亡友鍾伯敬文(譚元春)	四〇〇
祭馮元成先生文(宋楸澄)	四〇六
卷四百七十九	
雜記八條(沈懋孝)	四一四
紅鉛法(馬一龍)	四一九
卷四百八十一	
靜觀軒瑣言一(張維樞)	四二〇
靜觀軒瑣言二(張維樞)	四二四
書萬元彥數(祁承燦)	四二九
崖鷄(趙統)	四三三
二家詩選。(清)王士禎編。二卷。	
二家詩選序(王士禎)	四四〇
附錄	四四三
明詩綜。(清)朱彝尊編。一百卷。	
卷四十七	
查秉彝	



贈悟齋吳諫議奉使琉球…………… 四四九

王好問

春江曲…………… 四五一

幽居…………… 四五二

王叔杲

初冬登大伾山…………… 四五三

穆文熙

送葉龍塘道長謫邵陽…………… 四五四

贈張弘軒都諫出參晉省…………… 四五五

卷五十

蘇漢

寫蘭寄王湘雲…………… 四五五

張鳳翼

養蠶曲…………… 四五六

西苑志感…………… 四五七

蟬…………… 四五七

竹枝詞…………… 四五八

暮春感懷…………… 四五八

張獻翼

七夕同趙今燕賦…………… 四六〇

卷五十五

林兆恩

題室…………… 四六一

董宜陽

初發谷陽夜泊追懷舊遊寄袁魯望…………… 四六一

汪淮 聞報懷族孫時元…………… 四六二

卷五十六

黃鳳翔

告歸發潞河作…………… 四六三

穆宗莊皇帝發引挽歌…………… 四六四

萬歷宮詞…………… 四六四

王家屏

玉河新柳…………… 四六四

沈一貫

望西城宮殿…………… 四六五

侯堯封

詠石牛…………… 四六六

劉元震

月下聽琴…………… 四六七

黃洪憲

觀蘭亭修楔圖…………… 四六八

穆宗莊皇帝輓歌…………… 四六八

山海關…………… 四六九

別許都監…………… 四六九

劉元卿

別王以忠…………… 四七〇

卷五十七

李三才



和李茂才春日見寄·····	四七一
李化龍	
古行路難·····	四七二
秋日飲張司理·····	四七三
登醫無閭山·····	四七四
題清苑涇陽驛壁·····	四七四
鄒迪光	
行經舊院·····	四七五
沈淵淵置妾金陵爲作花燭詩·····	四七六
賦得西湖柳·····	四七六
西湖竹枝詞·····	四七七
澄江舟行·····	四七七
逐臣·····	四七七
朱期至	
送蔣太守之瓊州·····	四七八
卷五十八	
陸可教	
吳宮引·····	四七九
春日郊游·····	四八〇
陶山幽棲寺·····	四八〇
黃克纘	
將出都門和潘王見懷韻·····	四八一
許弘綱	
丁酉再告·····	四八二
卷五十九	
朱國祚	
嘉禧寺·····	四八三
江上夜泊·····	四八三
梅家蕩權歌·····	四八三
李廷機	
雨霽聞蟬·····	四八五
郭正域	
長安道·····	四八六
遣祀景陵恭紀·····	四八六
廬山五老峰·····	四八七
朱長春	
秋日詠懷·····	四八八
出三江口南下·····	四八九
赴歷下塗中作·····	四八九
舜廟·····	四八九
發縣次日過鹽山·····	四九〇
六月復病寄弟·····	四九〇
再贈伯念·····	四九〇
對月·····	四九一
對雪·····	四九一
移家·····	四九二
端午·····	四九二
入山·····	四九三
卷六十	
何喬遠	



湘南雜興	四九四
全天叙	
曉望	四九五
丁元薦	
秋日廣寧園急有懷仲父	四九六
劉黃裳	
題小李將軍畫	四九七
周獻臣	
道路憶家園	四九九
焦竑	
西園	五〇〇
絕句	五〇一
吳道南	
送朱養淳太史典試江右	五〇三
陶望齡	
夜泊桃園	五〇四
途中雜詩	五〇四
沛縣過高帝廟	五〇四
塗中雜詩	五〇五
董其昌	
送陸伯生歸吳	五〇六
望岱	五〇六
同唐元徵宮允游善權洞	五〇七
送范爾孚北歸	五〇七
登翠微亭	五〇八

題畫	五〇八
孫羽侯	
小除日登玄石山歷石門七女諸峰	五〇八
春園雜詩	五〇九
擬古樂府	五一〇
卷六十二	
王在晉	
道旁歌	五一
徐必達	
譙集中山	五二三
岳和聲	
柳林操	五二四
金忠士	
瞻尼父像	五二五
慨時	五二六
李日華	
石佛寺冰鑑房	五二七
挽吳少君	五二七
春日送徐岡卿北上	五二八
題海湛畫卷	五二八
贈顧長卿	五二八
山居絕句	五二八
贈維揚王孝廉中玄	五二九
贈陳禹玉	五二九
書贈小友張叔度	五二〇



韓上桂	歸里	卷六十三	湯賓尹	弔同年友於鼎季	蔡復一	秋坐	夕陽	查應光	澹碧軒	顧起元	方正學先生祠墓	熊廷弼	新卜東園	陳邦瞻	江南樂	董應舉	雜作	丙寅聞邊報	何棟如	午日秦淮雜詠	范鳳翼	水閣	夏日李後岡先生五柳園讌集	秋日渡江	
	五二一			五二二		五二三	五二三		五二四		五二五		五二六		五二七		五二八		五二八		五二九		五三一		五三一

鄧雲霄	隄上行	黃汝亨	西山	張履正	送張二府擢太平守	卷六十四	熊明遇	釣舟	茅瑞徵	彭城懷古	送薛駕部還陝	徐禎稷	澱湖	浦口望金陵	張鼎	南山猛虎行	援兵謠	登醫巫閭山絕頂挾一老僧以從放歌	送茂倩侄官南水部歸省	清音閣同平仲夜話	過大名舊城	唐中翰衷抑辭講筵出佐浙嵯戲贈鹽字韻一律並懷	其二仲中甫熙甫	樓居春暮
	五三二		五三三		五三四			五三五		五三七	五三七		五三八	五三八		五三九	五四一	五四二	五四三	五四三	五四四	五四四	五四四	五四五

過庭訓	五四六
辛酉秋日游茅山	五四六
劉遵憲	五四七
寄書兒曹修茸山居	五四七
凌溪翀	五四八
詠梅	五四八
卷六十五	
丘兆麟	五四九
泃河	五四九
文翔鳳	五五〇
望唐陵	五五〇
鍾惺	五五二
再登浦口王茂才山樓望石武庫澹寧所造新城	五五二
舟晚	五五二
送丘長孺赴遼陽	五五三
桃源詞	五五三
卓爾康	五五四
初晴許元昭招看吉祥寺梅	五五四
李衷純	五五五
古別離	五五五
王心一	五五五
歸渡揚子江	五五五
茗溪	五五六
方震孺	五五六

丁卯中元余在繫經三中元矣	五五七
卷六十六	
方大任	五五八
咏懷(二、三)	五五八
方孔炤	五五九
新設屯田	五五九
密議歎	五六〇
謁方正學先生祠	五六〇
和客傳言	五六一
張瑋	五六一
江行宿淺灘	五六一
沈德符	五六二
天啓宮詞(三)	五六二
鄭士奇	五六三
釣臺懷古	五六三
姚希孟	五六五
送齊越石守紹興	五六五
謁景皇帝陵	五六五
秋感	五六六
卷六十九	
費元祿	五六六
勞勞亭	五六六
梁有謙	五六七
寄贈翟將軍	五六七
遼希韓	五六七



山居……………五六八

卷七十

唐時升……………五六九

園中……………五六九

阮氏還居尉氏……………五七二

宿直塘……………五七二

漁陽……………五七三

薛侍御出按貴州便道歸雲南省觀……………五七三

田家即事……………五七四

舟中即事……………五七四

程嘉燧……………五七五

平望阻風……………五七五

送叔達之錢唐……………五七六

四明徐匯陽莊太峰余泰靈秋盡先後別歸送行……………五七六

七夕懷平仲揚州……………五七六

送徐女廉之無錫……………五七七

雨中過伎家飲書贈陳翠……………五七七

憶金陵……………五七八

崑山響梵閣懷季常上人游九峰……………五七八

董斯張……………五七八

葛塢作(二)……………五七八

吳門道中……………五七九

王醇……………五七九

書事……………五七九

題馬湘蘭畫蘭……………五八〇

何允泓

讀岳忠武傳二首……………五八一

讀元遺山集……………五八二

讀張光弼集……………五八二

卷七十一

文震孟

夏日園林……………五八三

陳仁錫

中秋……………五八四

方逢年

乳洞口水碓……………五八五

蕭士瑋

寓意……………五八五

月夜西冷橋……………五八五

黃景昉

未央瓦……………五八七

何太常悌邀步南郊觀園丘享殿齋宮諸制恭述……………五八七

書事

……………五八九

卷七十三

張采

九日同子常東郊即事……………五九〇

冒起宗

同年朱泰符過訪衡陽余已過發襄州矣吾兩人同一不

偶乎·····	五九一
葉重華	
從軍行·····	五九二
張溥	
孟門行·····	五九三
張明弼	
金陵送胡常之歸九華·····	五九四
陳宗之	
擬陶二首·····	五九五
傅巖	
庚辰元旦·····	五九六
姑蘇早發·····	五九七
文德翼	
池口阻風·····	五九八
萬泰	
客中初度·····	五九九
釣臺有感謝皋羽遺事·····	五九九
留別董西來·····	六〇〇
冬夜偶坐作·····	六〇〇
張昉	
晚行·····	六〇一
武陵原·····	六〇二
卷七十四	
陳繼儒	
月下登金山·····	六〇三

春日訪殷東皋·····	六〇三
山居雜詩·····	六〇三
邢昉	
聞亡女訃寄內·····	六〇四
月·····	六〇四
口號·····	六〇五
卷七十六	
金聲	
送雲莊師至吳門·····	六〇六
吳應箕	
歡聞曲·····	六〇七
練鄉勇·····	六〇八
悼吳門文相國·····	六〇八
何以·····	六〇九
蘇州行·····	六一〇
耕田苦·····	六一一
卷七十七	
袁繼咸	
讀謝皋羽西臺慟哭記·····	六一四
至日感懷·····	六一五
吳易	
六公詠·····	六一六
東湖雜詩二首·····	六一四
從軍行·····	六二五
陳潛夫	



絕筆·····	六二六
張國維	
登采石贈諸將·····	六二八
陳函輝	
劉伶巷·····	六二九
傅冠	
早朝·····	六三一
朱繼祚	
絕命辭·····	六三二
揭重熙	
過釣臺聞晉撫蔡公訃哭之有感謝參軍遺事漫賦·····	六三四
曹學佺	
雪桂軒花開得語字·····	六三六
林守易以新舫載予同游鼓山·····	六三七
出郭別陳振狂將以暮潮解纜發之九龍·····	六三七
峽口逢陳幼孺·····	六三九
夜宿迎仙館·····	六四〇
喜雨同茂生作·····	六四〇
雨中過柳陳父看杏花陳父時有樵李之游·····	六四一
棲霞寺·····	六四二
得張林宗書·····	六四二
病中思歸·····	六四三
蕪湖·····	六四三
由鴨欄至巴丘登岳陽樓·····	六四三

山路雜興·····	六四四
木瀆過黃伯傳宅·····	六四四
歸宗巖道中·····	六四四
溫陵·····	六四五
荒口舖·····	六四五
登塗山絕頂·····	六四六
沙溪別東生·····	六四六
合江舟中閏十一月晦·····	六四六
臘月之朔過江津·····	六四七
寄信·····	六四七
支機石·····	六四八
萬歷皇帝輓歌·····	六四八
泰昌皇帝輓歌四首·····	六四八
寄關中張太守·····	六四九
送荆民部之淮陰·····	六五〇
金陵懷古·····	六五〇
雄縣·····	六五一
武夷·····	六五一
大田驛訪陳伯孺時伯孺客越未歸·····	六五二
湖間即事·····	六五二
蜀府園中看牡丹·····	六五三
送戚山人之內黃兼簡鄧遠游明府·····	六五四
送李玄白擢淮揚運長·····	六五四
送茅止生北征·····	六五五
松梯·····	六五五



清溪朱邑宰里人也以荔支名綠扶包者見餉	六五五
即席贈黃姬	六五六
黎遂球	
花下歌	六五七
歡聞變歌	六五八
懊惱歌	六五八
少年行	六五九
山中	六五九
梁朝鐘	
憶檀溪	六六〇
將出皖留別楊六符沈乃功唐聖俞徐譽星諸先生	
時予將入襄歸粵	六六〇
張家玉	
錄別和李定夫	六六一
塗中感舊	六六二
閨思	六六二
卷七十八	
楊廷樞	
閨情	六六三
陳子龍	
曜靈六章	六六六
仲夏直左掖門送彝仲南歸	六六八
雜詩六首	六六九
賦得浣紗石	六七二
苦雨	六七三

寓言	六七三
小車行	六七四
桃源夜遇鄭超宗落第還維揚	六七五
交河	六七五
襄陽	六七五
高寓公書來詢予近況予適從石齋先生築講壇于	
大滌山留連竟日遂書此報之	六七六
廬居	六七六
錢塘東望有感	六七七
晚秋雜興	六七七
晚渡錢塘	六七八
送吳巒釋司李桂林	六七八
送張玉筍中丞擢河道少司空隨召陛見	六七九
吳越武肅王祠二十韻	六七九
邊詞二首	六八一
從軍行	六八一
督亢咏古	六八二
侯岐曾	
望湖亭口占	六八二
夏完淳	
題寓園松徑	六八三
鄭露	
虞山謁舜祠	六八五
采石	六八六
卷七十九	



沈自徵

古意……………六八六

贈別袁重其……………六八七

馮班

戲題四韻……………六八八

遊仙詩四首……………六八八

無題……………六八九

雨霽……………六九〇

梅花……………六九〇

立春日……………六九〇

題畫……………六九一

卷八十

陸來

梅花……………六九二

杜濬

游夾山漾……………六九三

九日一草亭時將與天章別感賦十六韻共用日字……………六九三

揚州雪……………六九五

金山……………六九五

登金山塔二首……………六九五

焦山……………六九六

茭湄舟中偶成……………六九六

臘盡還冶城寓戲爲口號二首……………六九七

泰州……………六九七

道中望棲霞……………六九七

佛殿……………六九八

白雲庵……………六九八

方文

田居雜詠……………六九九

華不注……………七〇〇

再游焦山……………七〇一

左蠡行……………七〇一

吳門行……………七〇二

題張大風山人松石圖……………七〇三

除夕歎……………七〇三

湯氏宅……………七〇四

攝山絕頂……………七〇四

章門訪陳士業故居……………七〇五

茗上送曾青藜之吳門……………七〇五

遇鄉人……………七〇六

潯陽夜泊……………七〇六

猷州城……………七〇六

舒谿……………七〇七

卷九十一

智舷

題陳仲醇小崑山讀書臺……………七〇八

鷓鴣居……………七〇九

寒山訪雪谷……………七〇九

題破窗風雨圖……………七一〇

人日感舊……………	七一〇
秋日元微邀集水亭同凡上人分得憐字……………	七一一
秋日寄懷吳少君……………	七一一
送方同叔游天台……………	七一二
秋日山中……………	七一二
野航……………	七一二
題周服卿畫……………	七二三
題寥雲閣……………	七二三
題徐春門畫……………	七二三
以貞……………	七二三
七夕……………	七二四
法衡……………	七二四
聞雁……………	七二五
法杲……………	七二五

梁溪道中逢姚孟……………	七一六
山居……………	七一六
欽義……………	七一六
雨夜泊涇縣……………	七一七
詞曲類二……………	七一七
花草粹編。(明)陳耀文編。二十四卷。	
卷一……………	
前調(十六字令,蔡伸)……………	七一九
卷八……………	
前調(劉鎮)……………	七一九



明文海卷四百四十八

刑部右侍郎楓潭萬公墓誌銘

王錫爵

故司寇楓潭萬公有子曰學憲君學憲君與予同年舉  
進士而余因得以通家予謁公於邸當是時第見公被  
服雅素儀止樸謹相與退而憮然有從先進之思已數



叩學憲君所習於趨庭上下者則益歎公玉表黃中不  
名一德而世不能盡用亦不能盡知以為恨嗟乎公今  
既往矣其用而不盡用者留之於其子若孫俎豆之於  
民與社則已矣惟是蓋棺垂十年禮官僅得以故事為  
請三品祭葬而公之姦行修能日亡日遠弭筆載記之  
史徵之大同白簡寧復有揭日長夜於溷中識伯夷者  
哉而乃今得鄧定宇少宰氏余嘗目少宰人中朗朗掇  
皮皆真其咳唾一出必傳傳則自今所為公狀而公嗣



學憲君必欲余一言勒石涉江二千里介少宰書以請其勤且鄭重如此因不得辭益公之先在宋建炎中有處士某者自新建徙南昌之東溪五世以前始可譜公之祖某父某母傅氏始以公貴得三品贈封公諱虞愷字懋卿楓潭其號以嘉靖辛卯舉江西鄉試戊戌成進士授無錫知縣政成召入為南京兵科給事中累遷山東參議福建副使貴州糧儲參政湖廣按察司副使福建右布政丁憂復補山東尋改山西左布政使擢南京



都察院右僉都御史提督操江進右副都御史總理糧  
儲尋以南京刑部侍郎改北致仕歸後若干年為萬厯  
戊子六月十七日卒於家距其生正德乙丑三月十三  
日蓋享年八十四矣公幼專敏為諸生酷貧帶經而鋤  
時從里閭長者講學白鹿洞中歐文莊公一見奇之問  
君子無入不自得所得何事公應聲曰自得又何得也  
人以覘公終身學術事業若懸契云始仕無錫錫故多  
富人善行財上下漏賦籍為奸吏苦其窟淺深不得問



則往往寄耳目於怨家部使者行縣輒以風刺取他事  
一入不得出公曰是皆不平夫富人貧人母也緩則使  
貧人代輸役急則四面設置投鉅而入之鴈鳩七子誰  
為厚薄父母之謂何矣會月朔晨朝三老出不意問大  
姓主名具得隱占狀乃手自畫丁糧十徵冊令富人各  
以次差受繇無得脫者至其陰細過不輒發發即不惜  
為上官前破嫌疏理時亦以此得忤而公侃侃自若也  
有簿某實廉坐蜚語當去公忼慨率吏民爭之不能得



乃解其印綬置直指廷中拜且辭曰公即不聽令令請  
行矣直指初怒卒歛容謝公簿亦竟全在南科數與守  
備內臣露章爭事謂營兵不當充私役又謂操江都御  
史每歲操故當與守備參伍列坐而武皇朝為權璫所  
抑宜如故便又奏草宣成以後冒功陞襲若干人而貴  
倖側目矣會公復疏救失事憲臣旨下僅奪倖猶幸肅  
皇仁聖不輕以言罪人云此補外所至有聲績其大者  
救荒山東西能以便宜發倉粟及贖鍰貸民而山西飢



甚公拮据賑外具為貧宗叙支均祿法功尤著馬御史  
有清軍福建者試問公軍何以清公曰夫明旨固曰清  
軍不得益軍今一切汰去遠年耗伍數實上聞而軍清  
矣御史遂以其事委公咄嗟而辦公又謂政先大體而  
上官近喜用巧文新進吏日騷獄市民且重足以是御  
史行部公即請自往代為讞決當一日而出福州久繫  
獄五十餘人湖廣六十人乃其遇法必行如案致資戚  
之死奪楚遼二藩所侵地歸民雖百口居間不能撓也



在山西有無賴宗人自號四天王者聚徒謀為亂部署  
定矣公一日方坐有旋風觸楹忽心動曰是何祥也境  
內得無有變試使人踪跡則亂者已縋城夜遁竟追殺  
之散其黨於是朝議以公有文武材既再入南京典兵  
食則是時海上新中倭振武營新變公承其後日與大  
司馬襄毅李公謀水軍非額設冗食者汰之營軍自倡  
亂已誅外餘皆得公處給糧餉撫摩痛疾而安公又以  
京商困私買奏復故條又上督儲便宜六事於是南京



輓輸日至軍民相與立碑中和橋頌公之德焉時公已  
入仕二十餘年歷官皆遠徼而最後始以積薪久次由  
南刑部改北其冷吹疏步特立寡援幾為笑於天下然  
分宜之敗也其黨有同里而別籍在室而操戈者公獨  
持平語於向背反覆間或曰嚴世蕃且叛公曰世蕃不  
叛第其穢墨亂政自直一死不足更引他法以坐也嗟  
乎使臯陶奏當有易斯言者乎而言官曾有所受遂深  
文擊去公矣夫公不幸生嚴氏鄉炎火炳蓬勢自不分



菡桂顧其生平一介之守垂橐而出垂橐而入此亦豈  
夜行鬼瞰日星視指所不及者今併此污公而公又長  
者默默受污以去痛乎鄧少宰之訟公寃也蓋儒者當  
恩怨得失之交真器乃見而近乃有逐臣棄友一不快  
於公論則評語惡聲狼籍私史以公之處謗觀焉而古  
今人情世道可概見已公為人敢言似真寡怨似厚不  
彫似樸忘機似通守謙似柔能斷似勇而一以學問融  
之門生子弟每見公終日靜翳小樓一榻中間而問起



居上食公不時答答則語不及他占寒煖校晴陰而已  
晚年請圓覺金剛諸經有悟謂此即我儒無聲無臭註  
疏然不輕為新學道聽者言獨父子自為師友而學憲  
君未老倦遊日侍公左右為最得公斷輪言外之旨故  
世稱豫章之學其灼然著盛者無慮數家而萬氏特以  
挫鋒含茂無標號於天下參於遊道見謂不廣然政此  
公所謂自得也夫自得則又何得哉知不知勿論矣予  
某孫某以某年月日葬某處銘曰



談學豫章譬之淵海公默退藏以白受采竅於自得乃  
無不得夫惟卓爾知揖為益游刃之餘出入周行守官  
去官琴書在囊有碑於途有祀於社一毀衆譽萬古不  
夜既偃經綸浮雲太虛小樓一榻閒其如愚居不垣墻  
行不標幟八十四年乘化而逝易簀之命還於性始是  
曰可死亦曰不死

禮部尚書兼翰林院學士贈太子太保琢菴馮公

墓誌銘 王錫爵



萬曆壬寅某月某日禮部尚書山東馮公以病乞歸至  
十有五疏上不許三輔臣助為請不報癸卯三日公薨  
上本欲大用公故重予公歸至是訃聞哀焉為贈太子  
少保賜祭葬如例遣行人某護喪歸以某年月日葬於  
某所先是公將薨呼其同里吉士公君鼎而屬之曰子  
為我狀誌墓必太倉王先生王先生知我其明年有寄  
公手書數行與余訣者則屬纊之前二日也夫公文章  
事業滿天下何待余知惟公則實知余余雖毫不文其



忍辭馮之先本臨朐人徙賁遼左公曾祖憲副公杲始  
復而土憲副公有子四人皆舉制科公祖為行人公惟  
重早卒行人公子參政公子履以文武材名世則公父  
也公母宋夫人妊公時大母蔣夫人夢一朱衣貴人當  
戶自名韓琦遂以名公公幼穎絕人而嗜學甚苦常翳  
燈帷中默誦竟夜惟恐父母知年若干舉山東鄉試丁  
丑成進士改翰林院庶吉士余時司教習焉己卯授翰  
林院編修辛巳直史館纂修大明會典尋授中貴人書



壬午冊封代藩時參政公備兵雲中公頒冊竟服上使  
衣拜舞庭下人皆榮之癸未充經筵講官丙戌同考會  
試尋編纂六曹章奏兼起居注丁亥大明會典成陞侍  
講賜銀幣掌文臣誥勅以爾雅擅一時戊子主考湖廣  
己丑充經筵講官尋補日講官與交河余文恪公私計  
謂講臣與上隔徒屑屑守訓詁無為也稍証引古今政  
治得失冀有所感動陞右春坊諭德辛卯主考順天公  
兩主試事繕校無所避兩解首得之廢卷中皆海內名



士所發策具宮府大制剴至而有深憂讀者始以王佐  
期公壬辰主武舉會試癸巳陞少詹事兼翰林院侍讀  
學士掌院事參政公以盈滿為念遽乞致仕公隨請覲  
省上賜以白金文綺命乘傳歸歸而晨夕參政公側洗  
腆上壽即有司干旄及門不數數見也假滿更欲移病  
不許予寬假會廷推閣臣當事者以公望重越資次推  
公假又滿適上允輔臣奏修國朝正史起公副總裁乙  
未陞禮部右侍郎而參政公病戒不以聞於公比公聞



疾且革矣遂一日三上疏乞歸并引講臣例請封父母  
得旨如所請疾馳四晝夜抵家拜參政公於牀下泣致  
封誥又三日乃卒公嘗謂人生平榮遇惟是三日爾足  
當百年追維主恩未嘗不流涕也戊戌服除己亥以原  
官充玉牒副總裁尋進吏部右侍郎故事翰林佐吏部  
優游養望而已公獨慨然以人才為己任太宰李公折  
行輩下公凡公所詮品裁定概不復省畫諾而已一時  
吏治稱得人每月揭官俸最深者於壁以次推補即才



地不同就一月中低昂之後者不得踰營求之門杜馬  
辛丑草計吏條教極詳而覈且請准京察例增浮躁一  
款無槩署跣施者為不及掩才士之長時論疑之旋主  
考會試時公初罷計憊甚然卷必竟閱詭僻者不得參  
文體為之一變無何文選郎中以推敏降官觸上怒公  
為太宰具謝罪疏乞令該司落職供事上嘉其恭慎報  
可十年以來聖怒發而復霽銓部之得所請者僅此而  
已是時稅使橫甚頗侵黠陟權孫朝誣奏撫臣魏公允



貞公疏以百口保之得不問張忠論知縣韓薰當調高  
宋薦布政司某某等可巡撫公力言其不可乃已李鳳  
請為參隨官入貲加銜公為移書陳大司徒止之士氣  
倚公而振是秋三品考滿贈封廕子如制進左侍郎協  
理詹事府教習庶吉士旬日冊立詔下而公拜禮部尚  
書先是公請建儲止鑛稅疏且數十上所以密贊宮庭  
間更多苦心至是以大禮屬公大夫士咸欣欣慶其遭  
焉迫期司設傳經費不給公曰今日禮為重不可與爭



時公弟戶部君瑗已輦遼餉四萬出都矣即追還給司  
設而冊立行踰月皇太子冠上慈寧皇太后徽號明年  
皇太子婚三大典皆成覃恩封三代皆尚書學士而公  
體且以積勞瘁矣踰年竟薨於官計公在禮部無幾何  
病居其九矣然所陳言疏皆手創先以詔令不信災沴  
頻仍請急罷鑛稅徹中使不報則請姑以中使之良者  
易其中尤無良者語皆絕痛又請廣厲學官嚴禁異說  
列十五款以正士趨修同姓諸主表月朔揭某府某爵



應得之序以格額外之徵請者秦王由中尉繼國統令  
中惟嫡子得襲餘子當仍中尉王以嫡久未生請先封  
庶長子邵王以待嫡公執謂此濫端不可啓屢奉旨趣  
議報終持不上有中使以監造乞易關防公弗給上至  
以御前牙關防給之其執法不阿皆如此壬寅歲猶手  
條上四方災異陳彌救之策凡數千言病且死命家人  
補綴舊牘上之比於尸諫奄奄中即僚友昆季相決絕  
語惟報國之為惓惓焉竟以是歿矣悲夫公學以經世



為主不喜為浮夸其籌邊料事如數一二辛壬間有議  
開五臺礦稅濟邊者公遺書彼中撫臣云礦利甚細而  
開鑿巨費必自內啓後數年礦地果大擾寧夏亂卒誣  
公語征西諸將無苦攻城無輕決河水苟善用間賊黨  
行自潰後果如公言他策束倭之下果就封楊酋之必  
以兵克皆驗而至其論則謂款不可驟罷宜以羈縻修  
戰具征東事竣則謂當以倭遁論將士功不可更苛求  
其持論平又如此每奏疏出人競傳錄大抵直如賈誼



而溫達如陸贄而約邕如蘇軾而巽深語欲涕微言可  
思尤善因事納忠要以迎上善機連引端類諷一而勸  
百雖造膝末由或不能盡見施用而後世蓋臣良宰必  
有取以為法者見朝士好爭論多異同歎曰夫先自積  
矣安能禁上猜公事以國論衷之其私嫌則密為譬解  
苦口而不居德使人意消故朝士類有仇有黨而公獨  
中立稱猶記余在事時公數數密規余退而無後言即  
泰交疏小酬羣小其端已自公發之凡公所為朋友補



過和合朝廷皆此類也。居常曰：處今之世，論事當先急公而後私事。君當先勿欺而後犯，但得寬一分即有一分之益；為一事即有一事之功。識者以為知言。公內行純至，事母夫人篤孝撫弟，珂愛與兼教。疾革時曰：吾不沒於婦人之手，屬珂啓手足焉。惠施宗黨，斥俸之半置義田，義學為立族約，諾葛太史妻子之托，所以恤廢教孤無遺力。為公童子師，及有一日之知，報之無不浮其恩者。尤善獎成後進，有寸長片善，津津常不去口。其家



居時邑令吳君宗堯被逮公約士民送至濟上密為營救甚力令得不死甲午青大飢為出粟里中賴存活者甚衆癸巳兵部檄調青州兵征倭時公在京力爭青州兵但任城守不任戰得罷歸且人賦以道里費青民至今多有尸祝公者此於公為細行然可書嘗私按公始末負朝望甚早遇主知甚深然甚早則才太盡甚深則語太盡究公所以有聽有阻焦神敝形而中道夭者倘謂是也或曰公器局胆智大約如韓公而文采過之以



過之故年位稍不及嗚呼人也天也吾以慨世焉公文  
集若干卷自有知者其詩以情真為宗次傳聲調長篇  
感激沉壯類老杜五七言律和雅會心絕不如近時名  
家以浮音亢節自喜所著書有通鑑分解經濟類編兩  
朝大政記唐詩類韻藏於家公諱琦字用韞生於嘉靖  
戊午十一月二十三日卒於萬曆癸卯三月初三日得  
年四十有六配太醫院醫士姜嵐女封夫人男三長士  
杰次士楷次士渠皆以公廕為國子生銘曰



顯顯馮公六德純備遇變適時剛柔乃配堂陞不親如  
隔重淵遇公則合行方道國物情求多人惡其上遇公  
則降事任名讓水火構關身為鼎鑄七調其間化為和  
羹此徑彼途弗避弗就中衢而趨萬術來奏衷誠秉忠  
志在贊翊乞司厥成冊典斯秩先雲而雨不汲自泉終  
畜其膏未沛垓埏福惟王明瘁乃邦國于公可輕盡命  
委職旂旄來歸育此壤塋魂魄不化顧瞻帝京曰惟主  
知未報以死繹思其先視我孫子



總理河道提督軍務太子少保工部尚書兵部尚書兼都察院右副都御史印川潘公墓誌銘

王錫爵

余以病解政還里旋奉先慈之諱悉謝四方謁文者而吳興潘君大復等以其考印川公墓誌銘來請余惟公三朝行河老司空也微君請其忍無言我國家有二大事曰邊曰河則天子自為居守常歲歲屈天下之財力以事九鎮而河備九弛卒有非常當事者勢不能咄嗟



而應難一九鎮各賴以大帥而河數千里惟一臣難二  
敵有秋可防而河之徙決無時敵入即戰守機宜一切  
聽於閫外而河有蛟龍與鬼神不可以智爭謀夫孔多  
又不可以百口爭難三嘉靖來河漕之得安瀾而無恙  
者繇印川公獨任其難益白首馳驅僕僕三十年以老  
而今且歿矣歿之後凡朝廷所為恩恤勞臣與夫百世  
易知之典猶尚有待焉嗚呼此余所以不忍辭公銘也  
公由庚戌進士受九江府推官召拜監察御史三歲災



奉勅稽查大木巡按廣東提督北畿學校遷大理寺丞  
懋少卿始擢督理河道右僉都御史未幾丁閔夫人憂  
即家拜右副都御史尋召以原官總理河道辛未罷歸  
又以交薦起撫江右遷刑部右侍郎旋進右僉都御史  
兼工部右侍郎總理河漕錄河功賜金幣進太子少保  
工部尚書兼左副都御史一子入監讀書辛巳改南京  
兵部尚書參贊機務後改刑部侍郎經筵上駕幸天壽  
山賜公麒麟服居守河道都御史某年復罷歸再以薦



起為今官當乙丑黃決沛縣之飛雲橋穀亭沙河留城  
境山一帶河渠盡塞議者請開夏鎮高原及南陽出茶  
城口肅皇帝時遣大司空朱公衡而以公副公遡流而  
西問故道於老篙師喟然歎曰漢瓠子之役沉璧投馬  
不過復江南舊蹟而已其後賈魯亦一切以復故為主  
宜仍三代故道便而夏鎮業有成議躬行督相不三旬  
而告成比原計月日省什之三帑金省什之一庚午河  
稍南徙決睢寧濬其六百五十里皆堵為平野公復以



故節來蒞事而廢址盡復其所浚築深厚再倍於故河而費半之出官民之舟於積淤者以萬數諸大夫方立石為公記而公持議適與勘河給事左坐浮議罷去而黃決崔鎮以北堆決高堰以東清桃塞海口湮而淮揚高寶興鹽諸郡邑幾滙為巨浸矣於是天子思公功凡廢再起治河具有成績其大者塞崔鎮從歸仁而黃水悉歸故河築高堰黃浦入淮而淮水復出清口會黃東入於海而海口遂闢復築遙堤十萬餘丈以為外護而



復又加築土堤縷堤月堤格堤長堤橫堤守四堤寄子  
堤凡三十四萬七千八百二十五丈有奇礮開料礮凡  
二十有四座石壩土壩月壩護壩凡五十一道濬淤淺  
塞決口鑿老土凡三十萬一千一百丈有奇栽護堤柳  
并封界柳八十三萬有奇首尾十餘年輶車所經更數  
千里公與役夫雜處每鋪葦蕭間沐風雨裹霜露髮白  
面黧而後兩河合軌數萬艘轉漕無害絳河之民至是  
始復室廬邱隴烟火彌望焉公之言曰通漕於河則治



河即以治漕會河於淮則治淮即以治河合河淮而同  
入於海則治河淮即以治海故意公在事之日止以築  
堤束水借水攻沙為萬全第一義而其節目細瑣公所  
著河防一覽中士大夫探圖而覆讀之且不能竟即竟  
之而或茫然不得其要領嗟乎是宜公歿後而議者又  
曉曉也公初見度修堰夢壽亭侯書四字曰結歡人主  
且命老兵持帚以示之公覺而思曰帚掃也其命我束  
掃投石乎試之而其流遂斷黃浦下陰雨輒聞雞聲居



民云此蛟龍宅毋動堰成忽中夜雷電交作挾以厲風  
望見黑焰排空而去比曉土窟白骨爛然在焉就視之  
巨顱獨角其顱骨似牛而長廣倍之其角似龍之火帶  
而稍參差舐之輒粘舌時以為孽龍避公尸解云公壯  
於河老於河病於河乞骸骨之日猶奉旨輿疾行部請  
開夏鎮裏河又手疏八事以歸歸以疾草猶喃喃河防  
不去口嗟乎人臣勞苦有功至此自非神聖誰能保二  
十年後鍼芒甕口之下漏後之人固不妨從宜補塞為



公益友若盡毀成事以功為罪則予不知之矣公七歲  
治春秋能文章補博士弟子十九廩於官二十九以麟  
經魁於鄉其明年舉進士試政九江出寃民劉雲四之  
死建議令瑞昌郵費皆仰於縣官不以煩百姓民大便  
之為御史稽查大木於南都公請無毀民居覆內官監  
遺籍可得也果得萬木於荷池中其在廣東江西破海  
寇及平寧州盜皆先計擒其黨魁功最著而公恥自言  
賞不盡行參贊南京南京悍卒久習公名無敢譁者會



京口僧告變公不為動人情恃公而安洳河議與江陵  
實陰主之屬人謂公新河成旦暮大司空矣公謝曰司  
空任他人為之老臣知有不可而已江陵怒嗾言官論  
公去已試之果無效乃始大服甲申江陵獄起公反上  
書為江陵訟寃觸時諱至鐫秩罷免而人以此愈多公  
長者公內行醇謹其愛敬尤不弛於師友素個儻喜振  
人之急凡衣食婚嫁喪葬醫藥於公者甚衆又建義倉  
祠堂宗學以教其族人又推先志建二石梁以便其鄉



人其為政所至民多立祠畫象當廣東受代時有三老人入見年皆百歲聽睹語言差可辨曰我儕隱深山絕城市多者百年少者五十六十年今傳聞使君治狀且旬月北去願求一識鬚眉公起立堂前三老繞身熟睹之良久乃出公行咸集挽留百里間為之塞衢罷市公惠愛能得人心如此公姬姓裔出周文王子畢公後有食采於潘者因以為氏至滎陽侯而氏始彰凡三十八傳伯氏公肇遷烏程七傳綜以純孝著稱石晉時北郭



里名迄今未泯又三十八傳而得公公諱季剛字時良  
別號印川居士公之沒為萬厯乙未四月十二日距生  
正德辛巳四月二十三日卒年七十有五配即施夫人  
子姓云云以某年某月某日奉公柩安厝塞宇園之原  
嗚呼公自童子時以逮老而為司空其瀕危者數矣未  
冠即忼慨為父白冤賴當事者識其文寬之然往來蹶  
躓無能具一菜羹一管腹可以孱弱死仲氏貳守繫獄  
公匍伏請減等致忤部使者上彈章可以急難死五十



服母喪如孺子慕涕淚覆面可以哀死二十年老河臣  
日夜寄命一葉風雨中或暴瀉或咯血或累疽視事可  
以病死嘗露坐河壩督工水忽大至距其坐前僅尺餘  
衆皆驚走公幸無恙又揚風吹舟入決口左右戰泣無  
復喘聲忽有樹杪擁舟底得脫明日探之無有也父老  
立石於河涓曰潘公再生處是又可以怖死廷臣每設  
數難以詰公不能屈既以轉羞而成怒而公後為國體  
論救故相新進欲中以危法又可以譏死夫此數者皆



出於前所謂三難之外即公一覽中亦未敢盡寫其艱  
危匍匐之苦以暴之君父之前而但向故人子弟私自  
慰曰老人實有天幸曩朝論之紛紛也嫉者衆而攻之  
急度無以見容於時其數罷而數還者賴今上深察其  
忠若瀕死而獲脫於難昏天也天下聞其言而益悲之  
雖然公今應得誥冊及例進宮保則皆十二年前故物  
耳漢汲仁郭昌鄭當時皆得以河事被徹侯之賞且令  
羣臣從官以下為歌詠寶鼎以侈其功國家即不屑與



漢絮令然以公皓首河事百艱備嘗追勞念往夫豈獨  
在邊臣後哉吾故知公九原之論必有所歸矣銘曰

有姬畢公錫玉剖符食采榮陽為潘厥初伯民肇遷四  
卜西吳北郭擇里而裘是菟三十八傳公起大夫旅擢  
鎮節歷游名都我疆我理我杭我秣民奠攸居龍蛻其  
廟六宮食新萬般載塗小心孔翼奏功則膚爾冠我戎  
爾髮皤皤既長於河亦老於河幕府籌庸視公孰多稽  
首聖明億萬永圖玄圭赤紱九原可呼幽谷熾然冥漢



昭蘇鏡石著銘矢告弗磨以嗣以續寶鼎之歌

戶部尚書本菴楊公墓表

王錫爵

今世紀墓之文有碑有志則不得更著表表標也謂標顯世所未知之人未見之事用以決疑闡幽故足述也若名卿碩臣高讓雲臺之上國文家獻以日月書功尚安所藉而表焉乃余獨於故司農楊公不能無言公諱俊民號本菴山西蒲州人舉嘉靖壬戌進士余辱與公同年嘗間謁公之父襄毅公於大司馬邸第當時華彝



之望方歸於襄毅公而公以進士高第年地風采裒然  
出其輩行其年會當館試公以襄毅公指稱疾不謁試  
而諸謁試竟以蜚語報罷視公如翔鴻之在廖廓云既  
入仕以戶部浙江司主事調禮部主客司歷陞儀制司  
員外郎精膳主客司郎中出為河南提學副使轉參政  
尋召入歷太僕寺少卿太常寺少卿提督四夷館大理  
寺少卿復自大理擢都察院右僉都御史撫治鄖陽自  
鄖陽改撫山東以右副都御史往入為兵部右侍郎丁



憂以原官起補戶部兼右僉都御史督漕河撫鳳陽等處尋召回部陞左侍郎改兵部署部事再署京營會倉場總督缺廷議推公以侍郎久次晉秩為戶部尚書未幾奉旨回部任部若干年以二品歷三考加太子太保薨於位天子加優賜祭葬贈少保加贈太子太傅殊恩異典差次襄毅公焉公為人沉實有大畧所居官常兢兢謹於法理不為首鼠兩端而間亦以機權輔正發謀應變稍規模襄毅公乃襄毅公故敢決任事亦會其時



得願指揮霍主親而人信之公見謂小心怵然試刃於  
盤錯間調維上下且寬且急時有所不能得之衆而得  
之獨不能得之名而得之實者有如今公父子易地而  
處不知其何如矣嗟乎是安可無表公初為儀曹郎執  
不受內宣兩使中州痛裁驕士豪黠吏以法其在鄖陽  
議爭所轄官兵軍餉不宜汰減議移均州守道於鎮城  
便彈壓在山東議留班軍訓練議荒田賦聽民得自占  
開墾在鳳陽議開瓜州隙地泊漕艘議選汰衛軍在兵



部議束約諸王撫賞數不得逾七萬議抽練京營兵皆侃侃舉大體畫長計無所規隨而至於最難且苦雖欲有規隨而不得者莫如公之典戶部時內傳買辦銀則爭傳雲南增歲課金則爭傳長公主婚禮及鋪宮珠寶則再爭比礦議起公一爭之遼左再爭之易州又爭之河南而時會東西征萬里齎糧與上供諸費交急則公之難且苦更十倍然公迄左走右吾粗免敗闕盡瘁之效至於殫身邱次明主為之驚哀贈卹天下宜以此知



公乃余讀韓太史狀發憤於公道之不章人情之反覆  
然則非余誰表公者公之為戶部余亦承乏內閣於時  
公私赤立外廷無不扼腕言理財者礦事之興其初乃  
以綢紳議入而內意始動然明主初亦以錫爵言不便  
而止高明之士至有面讓予以將順無狀者乃公獨陰  
贊予期以事行之日該曹當以職掌力爭不獨令閣臣  
有劇主名既予歸而公果四疏諫開礦益至是苦心苦  
口始盡暴於覩聞乃其域外遠識幾先早計予知之外



人未知也一宜表今制令國制於司農帑吏因緣估商輻輳飲冰茹檠者不能有所表見乃予獨陰議公取予一介必矜而嚴登其堂則有一二短衣敝履老蒼頭出應客四壁蕭然而韓太史又習公門內事室止一區田不過三四十畝此今之貲郎墨綬吏所薄而公以父子世一品九載大農曾不得私中人之產世又其誰信之二宜表公入仕幾四十年其未為都御史逮侍襄毅公一階半級未嘗以閭閻先人已再秉節鉞更踐九卿皆



藉甚聲聽百行渾如束濕之政含沙之口不能毫髮有所挂及其曖昧觸讒忌自典戶部始典戶部又推冢宰而天子再命公署吏部署都察院又類陰為公地者悠悠道聽則以公介內援擠賢者路而予適幸筦事主行文書嘗密伺內指與公交關踪跡百口可按而保也蓋公奉職最敏厲而於進取則鈍與人最款篤而於結納則疎約已不以蒯物憂國不以干名以故生平心事半為吏才所掩而要以完節粹行從襄毅公於九泉必無



愧焉三宜表嗟嗟人世隙光榮名朝露耳乃自古不朽  
公論定於益棺若又泯泯使廉溷等腐珉玉共朽則儒  
者又安事孳孳勤一事以奉廉恥忠孝為哉自世爭喜  
議論好饒與人以才而怯與人以品喜核蠶氣而輕先  
生長耆端委正色之風余益嘗以身試謗而痛乎處俗  
之難已以天之幸明主之知幸得早蛻劇場不復為爭  
名者所錄猶計出都門時間遺同志兩言以謂我輩悠  
悠是非在事不明及事謝必明當身不明及身後必明



今公之事謝而身且死矣乃韓太史尚不勝青蠅之感  
至痛根株其所從來是余所不敢知亦不敢復操前兩  
言以信於天下將賢者固不宜久握利權處嫌地舉止  
竊鉄疑生所忌乎抑論未百年天與人方交爭為君子  
而久之終翕然以定乎今石室論次與天壤不磨滅則  
有韓太史在則亦有斯文在若其他家聲宦蹟及文章  
行誼之詳種種種具碑志中知公不必賴以榮故畧

周文恪公墓表

王錫爵



萬曆丙戌十二月二十九日吏部左侍郎兼翰林院侍  
讀學士掌詹事府事微菴周公卒於邸卒後三月而大  
明會典成公屬為都校最久而專於是天子思公勞贈  
禮部尚書賜二品祭葬仍特用廷臣議謚文恪贈卹以  
官謚以人朝廷敘功旌賢之典備矣乃故事大臣表墓  
之文其稱為神道碑而公之子官生某等已乞碑少師  
申公又屬予錫爵為表是兩也予宜辭已復思碑表義  
同而大臣不稱表者以功德行世有太常太史之譜不



必表也若公之隱細微行非表不章非予未必知而知公者又未必能言是用諾諸子請為藉語於麗牲之碑曰嗟乎是惟周公古三代以前未雕未琢人物而朝廷用之未盡士友知之未深至於今日益棺而論定者也公諱子儀倣菴其號初為博士弟子已厭薄俗士顛顛章句為榮進嚆矢者日夜湛思乎六經名儒論說之府而飲其精言隱義著穀語著日錄見聞多先儒所未發既登第則益棄去雕蟲以經濟實用為兢兢其居官自



翰林載筆紀述而外出為國子司業祭酒入充教習庶  
吉士師道尤著學者宗之其校士以牝牡甲乙外知人  
予與之同事丙戌會試公服予之檢軌嚴予亦服公之  
裁量審為錄序成則相與檢竄僻詞奇字而後付梓者  
曰以此為國子監指南會江陵奪情議起凡列爭先具  
疏留同寮曰公云何公咄咄起戟手向堂上此堂願與  
倫者何我輩不能怪人狂醒而忍從旁助其拍浮者議  
更寢其與人煦愉豈弟不詡詡市廉名而卒官之日會



隆冬布衾練帳蕭然也賓友就其卧訣皆驚哀涕下以  
為即公一日柄用豈減晏嬰公儀休哉父月川母吳淑  
人沒且久歲時致祭盡哀而事兄若姊恭甚閨門之內  
穆如賓友其生平無域外交而俸入輒以施鄉黨之廢  
疾飢者故厯官垂二十年被服寒素如一日云江陵之  
當國也好薦寵天下年少武敏逢蒙視而堅白鳴者乃  
公獨用鈍口樸貌相與衡立為柄鑿學士大夫無所窺  
尋其聲光以是江陵益疏外益翰林九次不調無逾公



矣而公不以入意中其為所樸鈍顧益甚而江陵之敗也請嘗與交忤不得意者皆我我彈其冠有一歲九遷之望而公又愈益自悔顏如也以故終公之身世知有南九卿不署名之屠祭酒不知公其知公之忤江陵不得次者不知江陵敗後事噫嘻此所謂非表不章者乎士識之卑也徒見山輝而白虹則盱眙動色以為至寶之所在益予相士十年始識公之內敏強記又十年始識公嗜修而寡於交比同事朝夕者浹再旬相與證事



確理原本六經滂薄萬物如遊珠林火阜中而後知公之奇萬不一二試也噫嘻此所謂非予不能知公者乎孔子曰先進於禮樂野人也後進於禮樂君子也如用之則吾從先進夫野人君子非時人之論也度當時易土簣而金石雖孔子亦自覺便之適觀之快矣乃所稱若彼用之若此豈非念矯枉寧過中避徑無疾步乎夫禮樂之大者則莫如不爭行不垣墻居不周衛所以遠爭也處不爭之地以閭閻當赫赫其途迂其利遠要之



三代而下有興先王之禮樂者必自於此不自於馳騁之士也嘉隆來學者文勝極矣以予目中僅僅乃得公與萬宗伯毘陵兩先生兩先生易名皆以文而用之在樸其相次望顯位又皆遇可以興禮樂之時而溘然先野草朝露乃又皆在一年中皆天也天雖尊其秉彜是非不能勝人九原之論吾知所歸已而後生初學薰醉智巧之途以為是堅瓠無用於世世亦且以厭薄公而以公之不去為無恥嗟乎且安得竈上老婢就熱吹而



齊冷炙者與之言有恥哉予嘗謂方今士患不在小人之好亂而在君子之無恥夫使朝廷內外之官泛泛乎有欲去不久之心戕戕然彈其冠刻日月以待遷而爭懸門腐鼠之得失予之所謂無恥也益拜稽首讓於夔龍柳下惠甘三黜於士師俗之所謂無恥也此兩言不知孰是而為予言往往濫於末俗窮於寡和而莫敢出噫嘻此予所謂非予不能言乎公所為文字自穀語日錄外其大者有中臣直閣記秘不傳有國朝故實多可



百餘卷殺青未竟曾以死雖然禮樂在其中間人子孫  
有能網羅緒業卒成一家言則先進為不亡矣

翁襄敏公神道碑

王錫爵

翁公萬達字仁夫別號東涯潮州揭陽人也初祖雄自  
莆田入潮居於鮑江里生保保生琦琦生肇肇綱綱生  
可累贈兵部尚書其行具邑乘配累贈太夫人許氏生  
公公少穎異長文名大起嘉靖乙酉舉於鄉丙戌登進  
士丁亥授戶部主事嘗主河西務勘咸畹侵地及開出



貨奸狀庚寅署員外督通州漕諸豪毋敢撓其令辛卯  
署郎中陳鹽策便宜出賑畿輔飢多所全活癸巳擢知  
梧州府居四年人謠太和稱治行第一丁酉上命咸寧  
侯仇鸞兵部尚書毛伯溫討安南叛寇莫登庸進公為  
廣西副使駐南寧典兵事登庸行間我軍公募死士入  
其巢盡得其狀乃先案治我軍通賊者法登庸始懼公  
謂孤軍深入難與賊爭利用宣布朝廷威德稍稍出不  
意畧定請黨與勢將自困時請叛寇憑詳趙楷韋應龍



州李襄各勒兵應安南惟思明黃朝持兩端未發公度  
朝可急使乃使使密諭朝啗以厚利朝遂擒楷等以獻  
尋進兵討斷藤峽叛寇侯公丁等平之斬首千二百級  
降諸徭三千人論功陞一級先是思州忠州間有峒四  
守臣議所屬未決公從民願定議以峒屬南寧設官置  
戍守之峒蠻黃賢相逆命公揚言大征密構會峒民令  
自為計毋從賢相俱死賢相懼請降會陞浙江參政督  
府難公代上疏言征南事重非翁某不可有詔復留參



政廣西時叛黨既艾登庸益孤甚督府以問公公曰可  
矣師遂進公護軍也憑祥為中堅當要害部四萬人倍  
諸道兵壁賊境上獲其謀縱歸使趣登庸降登庸大恐  
聽命公輕車從將吏出鎮南關受降登庸至則頓首謝  
死罪公探其懷中得素紙援筆大書曰主上好生寧復  
追蠲赦間嘲啾小故第順命則不死永保南荒持此為  
信登庸跽請顧左右曰降已晚矣乃遣姪奉表入朝詔  
罷安南為都統使司班師再陞公一級壬寅進四川按



察使癸卯進陝西右布政使轉左甲辰即進右副都御史巡撫關內居十月進兵部右侍郎兼僉都御史總督宣大邊務公始至則簡卒乘治芻糗法令嚴信士有一夕去亭障卧者雖數里外公忽遣騎簿問罰隨手行人莫測其何術也乙巳八月大入公選壯士伏強弩射却之捷聞賜璽書褒勞築邊牆東自老營堡距滑石澗袤二萬餘丈進右都御史廕子思佐國子生會大同宗室充灼謀挾反公密授總兵周尚文計名捕諸反者而宿



兵各關隘待未幾果入敗去有司上充灼獄伏誅公進  
左都御史再廕弟萬程是時諳達憚公威名款塞求貢  
詔下廷臣議未決公條上安邊疏大畧謂貪地則利部  
落貢則利部長臣職在封疆惟知戰守貢亦備不貢亦  
備天子嘉納言曾襄愍之未得罪也議復河套介故相  
夏公以請公獨謂復套與別事不同疏陳其不可狀仍  
貽書戒夏公毋輕發夏公不能用卒與襄愍俱死西市  
人服公先見云已酉春數十萬騎逼宣府公急請周尚



文代宣府將趨之無程至曹家莊遇敵人戰三日報敵  
兵益集四面圍之公間即擐甲躍馬從壯騎數千往援  
騎士諫不聽未至壁數十里會大風起公令車騎曳柴  
揚塵大驚曰翁太師至矣輒解圍遁我兵迫及之斬首  
四十級上大喜進兵部尚書兼右副都御史尋召入視  
部事丁外艱歸庚戌秋七月復起大同軍書日夕至上  
手詔奪情起復公以尚書鎮宣大公病背疽疏乞終喪  
未達八月薄京城本兵以逗撓誅上復手詔召公還部



公即哭几筵力疾行時相嵩貴有寵上數問公某至否  
嵩素不悅公因密奏其陸梁上日夜側遲賢之席急於  
救焚臣竊為翁某計雖重趼百舍飲泣萬死猶未足以  
報恩而塞責也今盤桓久頓未知至日上強食自寬謀  
武盈朝何必翁某上頷之比公至去聞命日僅逾月然  
上已入嵩言公見嵩又倨乃坐前趨命遲錫秩兵部右  
侍郎兼都察院右僉都御史經畧紫荆關會疽發病甚  
上疏乞骸骨終喪上怒曰此怏怏終不為國家用罷致



仕尋以謝疏字訛削籍為民久之上復思公起為兵部尚書公時方約客遊武夷道趨三河去鄉百里公愛其山川卜樂邱至闕之清流疾作亟歸卒於上杭舟中時壬子十月十三日也又六日詔命始臨門其年禮臣以卹典請得賜祭葬隆慶改元始追謚襄敏贈太子少保公生於某某享年五十有五卒後若干年葬三河即公所卜地也配贈夫人張氏早喪葬海陽繼配封夫人孫氏子某女某公六歲居母喪盡禮如成人及貴自土葬



父廬墓三年俸入輒斥以置義田祠堂及賑助鄉里意豁如也學無所不聞一時所與同志謀德皆海內知名儒者而操行恂恂若處子不為崖異至其黨強禦蹈險艱屢履一世即育育無以奪之歟歷中外幾三十年所至用廉武決策臨敵叱咤一呼而數萬甲兵如取之掌握內益今相國張公嘗稱世宗朝邊臣行事適機宜建言中窺厓厓推公屈一指焉當時天子虛心相待朝馳符而夕登壇其遇合亦且不在方召後然一夫闕說錯



莫竟死將所謂本強先朽天道固然也而世或傳侯鸞  
實構公公刺梧時嘗法治鸞橫卒十餘曹以此得報察  
其本不然予與修世廟實錄方鸞自大同入典兵舞手  
作氣勢勦輔大臣無所不狎侮然未嘗一言敢侵公公  
來而上與嵩諭對語今歷歷具掌故使嵩一言能為公  
道南海所由來及病疽狀則爽然解矣鴟啄虎吻推墮  
長城乃以青冢鑒兒子誤哉余所聞故追論嵩而直書  
之爰及公概載摘之辭辭曰



兩越之界三山發祥是生人豪光翼明昌識淹墳索才  
美珪璋敷於制科蔚為望郎出守劇郡展也循良惟帝  
問罪於彼南荒選吏視師惟公是誠公策彼內倚中  
行此伐其謀彼則於襄維寇就擒不缺我折乃征藤峽  
先桀其強薄惟餘威則莫我當憬彼四峒歸我侵疆聞  
使既遣關門納降用安反側旋定勛勦惟帝念功俾鎮  
朔方計圖永逸載戢戢邊防據鞍厲戰戰則大創絕幕千  
里傳檄諸羌時稱尚父奮志鷹揚召為司馬王國



是匡忽罹閔凶趨歸踉蹌詔起伏戎墨哀急裝兼  
程奔命起居不遑惟彼愴壬貝錦斯張行間待罪  
固請終喪於為逸民山水徜徉恩命賜還公也則亡  
溥海蒼生咨嗟失望卹典滂加為龍為光名臣之所  
於焉孔芳

經畧朝鮮薊遼保定山東等處軍務兵部左侍郎

都察院右都御史桐岡宋公神道碑

王錫爵

萬曆丙午前經畧朝鮮桐岡宋公卒長子守一伏闕上



書白父冤詔復故官次子守敬乞予神道文志公不朽  
予惟公朝鮮復國之功皇上擇日告廟宣捷班賞將士  
有差國王特疏陳謝陪臣父老勒碑建祠尸祝公者以  
萬餘計其詳具載大學士龍江沈公志中予復何言獨  
念公功最捷亦最高任事最難而浮議慘公者亦最急  
嗚呼非予其誰表之按狀公之先會稽人始祖元占籍  
杭之仁和里凡數傳而生富富生義義生儒是為公父  
虎山公長子應期次即公也公諱應昌號桐岡嘉靖甲



子舉於鄉乙丑成進士知絳州陞刑部郎改戶科給事中轉刑禮二科左右給事出為濟南守厯山西副使河南左參政山東按察司使江西福建左右布政使進都察院副都御史巡撫山東陞大理卿工部右侍郎隨改經畧以三品考最贈祖父如其官廕一子入監讀書兵部覆東征功詔加右都御史世襲正千戶公居官精心救荒其禱雨多用春秋繁露法輒有奇應有龍見於甕及猗氏壇井中已鱗角皆具蒲州水啗城城北公操文



祭之水驟落三尺其他編審義倉鄉約保甲至今著為  
令不廢上下安之公守絳常受委查閱寧化等關目擊  
邊弊登陴浩歎及官給事新鄭方以互市議邊公即疏  
陳撫賞不便者三巡視京營邊報狎至江陵以無對公  
即據謀以聞陳防敵七事江陵怒遂出公濟南嗣後累  
官藩臬參伍兵事畧不以外補為解既而建節山東首  
請加意防海復營衛巡司諸舊制衆皆目為迂濶未幾  
朝鮮告急始歎服公神算而經畧之命下矣壬辰初倭



奴舉十六島之衆常劉時倡亂之秋我方西討未遑  
東征倭奴突入朝鮮國王李松走竄義州王子臨海君  
珪順和君珪發靖康恭僖二王墓八道三韓殘破幾盡  
聲言內犯京師戒嚴詔拜公兵部右侍郎經畧薊遼山  
東保安等處防海禦倭軍務時經畧創設提督大將軍  
李如松羈寧夏未至繕甲練兵儲糧製器又倉卒未備  
詔書督促正如空手搏戰耳公鑿空支吾不兩月而部  
署出關會遊擊沈惟敬使倭道謁公公曰我奉命討賊



知有血戰耳汝毋以身試法臘月與李大將軍踏冰渡江惟敬執款議如初公屬繫軍中不許更入倭營而議討賊益急春正月兵薄平壤倭將平行長築飛樓鑿牆穴守牡丹峰以相犄角公指授方畧圍其三門外布鐵蒺藜數重火器齊發毒烟蔽空吾軍含解藥仰面扳附而上諸門盡破斬首一千六百四十七級焚溺死者無算行長卷營遁回王京大將軍輕其屢敗走探地形倅遇重圍大將軍殊死戰斬金甲倭墮馬而楊元張世爵



援兵復至倭潰圍解散是時王京聚倭號有三十餘萬  
且又當八道之中去釜山千五百里倭不退朝鮮不可  
復也公方畫依山俯攻之策而李承勛兵留於山東陳  
璘兵集於薊鎮沈茂兵遣還浙江進不能策疲病之卒  
退不能待救援之師夜令死士以明火箭射燒龍山倉  
十三座糧盡倭棄王京而去公又遣兵追繫至南原與  
清正夜戰又追及晉州斬級甚衆倭自此仍還釜山舊  
巢又復遠遁熊川西生浦蓋朝鮮之局始完而公亦已



骸骨歸矣歸之日王率光海君宴公江亭麗人傾城相  
送尾至數百里外拜泣而別是役也索回王子陪臣宮  
眷百餘人斬倭首二千三十級克復平壤開城王京總  
還故地二千五百里而議者猶以請封撤兵罪之大倭  
封於乙未之七月公歸於甲午之三月則請封不在公  
也公留劉綎兵萬六千居守而予議撤還則撤兵亦不  
在公也公提軍絕域身經累戰夏沐暑雨冬偃冰雪食  
無鹽酪卧無甘寢乃不以驅逐朝鮮境內之倭為功而



以退歸釜山海外之倭為罪此公負國乎抑言事者負  
公乎假令倭終盤據開城耽歲月存食畿輔揚帆江  
南王子不生還朝鮮不再造兵連禍結老師匱財又將  
何以處公哉公方面紫髯目如閃電東征陞辭上遣黃  
門陰翺公風神警亮器局岸偉大喜得人賜金綺以寵  
公行既入朝鮮又賜麒麟一品服公感知遇每與李大  
將軍以死自誓戰勝之後撫傷掩骼招歸脅從以萬計  
仍分前兵屯守大邱南原慶州等處移檄國王斬塹挑



濠築關置堠修設善後之宜甚備行軍賞罰嚴明軍需  
節省僅支馬價二十餘萬揆事圖策捷出人意外每當  
百司使者咨請輻輳公隨事裁決初若不經思退而熟  
議之即老吏宿將終不能過也曩公初受命時予適在政  
府每歎公經畧倭寇與邊臣不同邊有堅城可憑而海  
則與倭共之難一無處不犯無處不瑕難二他鎮調兵必  
先主而後客老弱居半道路遷延邊臣伸縮自由而經  
畧則空名客寄俯仰隨人難三羽書以風為遲速語言



以譯為往來難四朝鮮利於留兵不利罷兵倭來則貸  
手報仇倭去則張小為大飾緩為急難五李氏盛滿人  
心不附而又立萬金之賞懸封拜之格忌寧遠者并以  
忌公難六嗚呼此公所以累疏乞休高卧西湖絕口不  
談東事也然朝鮮陳謝有疏朝廷叙錄有旨何忍不一  
為公論昭雪而令忠臣孝子扼腕不平哉昔淮西文昌  
黎不及李愬愬子曳碑仆之訴公於朝命段文昌撰以  
旌其伐杜弼請裁抑勲人齊高祖令軍人張弓挾矢舉



刀按稍以夾道使弼冒出其間弼戰慄汗流高祖然後  
諭之曰箭雖注不射刃雖舉不擊稍雖按不刺汝猶頓  
喪魂膽諸勲人身觸鋒劍百死一生乃以尋常例之耶  
觀此而宋公之論定矣余故畧他績不書而著其復國  
之功勒石墓道使讀者識公苦心云若生卒婚娶別有  
志銘曰

島夷不靖肆彼鞠凶八道三韓如葉掃風君臣父子奔  
播西東箕疇故墟幾亡是公帝命六師誕張九伐穀



啣鱸走雲掣月復城歸嗣恩浹窮髮龍子暫分虎符復  
合我武維揚稽顙天闕馬鳴蕭蕭歌凱東回功成不賞  
市語如雷勞臣解體戰士心灰公笑何言請付口碑時  
清論定終遭天寵玉冊金書泉臺夜永劍履衣冠精靈  
呵擁穹石干霄星垂斗拱岩谷綿亘草木蕃鮮桓桓墜  
道鬱鬱新阡何以報公有家祈連何以報君億萬斯年

王襄毅公墓表

王錫爵

自西人款貢受封二十年於茲每言兩國一家咸王太



師功時時問太師起居云太師者我蒲坂襄毅公也當把漢那吉之來奔也衆惑所置公言此笠者情也而可易趙全策一彼兵索之則曰殺而孫乃戰策二萬一俺答棄孫則資把漢以忍其死而角黃台吉策三廷是公議乃先官把漢而要趙全付公趙全我所重購以諸亡命導敵者也諳達與趙全謀果分道入索公遣請將腹背攻殺敵過當懼遂殺把漢則好言來曰幸歸我孫誓世世款貢公庭數日而罪多由趙全全與孫孰親天子



不以其罪罪而孫且官之而徒手死而孫耶諳達聞孫  
在又把漢哀泣惟太師命公為請詔許歸把漢而屬公  
主封貢事旋獻趙全等然第約不犯雲中公詰之使者  
語塞遽繩東西部以聽然內外或可或否或可否半甚  
至引嘉靖馬市扼之而太師某亦陰異公議公反覆抗  
疏大指以為頃貢市自意非往哨比且先帝禁馬市非  
禁納款也俺答老矣又父子意貳頗厭兵而新德我今  
第成貢市即遠不敢知臣保無事矣假臣數年以全力



俟隙無害也是故羈縻者權也而制禦者經也當權弗  
權是經無時修而旣不已也且戎戔苦兵久矣天或者  
息肩於茲乎彼卜者言羊馬之年當與中國好為之卜  
南寇必死殆天意非人力也今邊將不樊噲而哆口橫  
行塞外甚無謂也橫行必人皆甘心焉而後可如勢有  
不能是猶援毫末而議尋丈也願旦夕定議毋失機自  
貽後悔詔集羣臣議最後多是公而新鄭主公策尤堅  
乃王諳達以下有差而報可市約如廣寧開原拜表謝



歲貢馬為常公益屈將士固險除器墾荒通商招流亡  
散趙全黨以軍需縮費及市稅稍出所減客餉為賞其  
而大司農省經用歲可十五六矣比滿三市召還復條  
善後事而敵畧西海以公籌無譁云初江陵頗右公公  
亦功之既入則疏救彈江陵者又欲掎所睚於是江陵  
喉言者攻公上特諭內閣此朕佳尚書安得爾然公固  
辭去年未七十特賜存問歸十二年卒往予入班行有  
歎然四傾者公也其識措類耳寇嚴之若神宜哉當公



落落首議便不便公者畧如湟中羌事公亦發情取營  
平自方要以酌經權之宜乃費耶備耶費也維事  
者權與之謂何夫未有三世乎匈奴而一日事者也藉  
令今日復有異議卽當公公復何如視哉而公乎已矣  
公成進士鄭端簡早知之曰宜任鉅公所至有名績凡  
南走倭西禦敵而後乃督上谷雲中至大司馬甚矣乎  
端簡之知人予故據公外孫楊太史狀表其大者曰隆  
萬間有以天之道國之靈而柔撫生民者蓋二十年未



翦焉而其始幾辱於人人嗚呼是惟襄毅王公不朽之  
歲公諱崇古號鑑川人稱鑑川先生餘具狀中

資善大夫工部尚書兼都察院右副都御史晉川

劉公神道碑

沈一貫

上所簡任九卿得先帝戊辰歲登祕省之侍從祕省出  
尚七人晉川劉公其一也公之歿東阿為之狀山陰為  
之誌而以賜阡之珉屬予自余預機政借前籌莫如河  
漕戊戌之秋得公而始有所藉手則余之悲公其國恤



也公既繇常吉改兵垣用姜非謫蒲丞徙知盧氏萬厯  
初召補西曹調民署乃預僉臬參議闕中厯齊楚藩臬  
長哥中丞撫保定已協理中臺佐邦治奉尊人喪還里  
久之以河決黃堦起少師空兼僉都明年上功拜尚書  
收厯中外三十餘年官階十六易而姦節懿行未易縷  
數所為難公者則西曹時與大司寇爭疑獄司寇與死  
比公傳生議司寇不能從竟以失入譴而人始服浙故  
多材先是學使者行刻核之政公至則衡文采實不為



毛舉所甄拔皆一時秀髦在西輔適無秋而有倭警師宿於天津羽檄旁午公外調兵食內理荒政是歲也飢而不害博陵盜起嘯聚至千人所司議剿公曰不然好則人怒則歎草薶之不忍下令殲其魁餘勿問人謂劉公尺檄賢於十萬師故事河與漕皆設府上以公宿望舉兩府屬之監司守令受節制者七省公謂河漕患有標本而工無緩急循商邱虞城以下至於彭城得所謂趙固者賈魯故道也而鳩工焉開積壅疏支流隄堰閘



壩增卑倍薄延若干里不淹時告成上嘉齊晉秩廕于  
於是有一湖之役二湖者邨伯界首維揚之巨浸也涉  
者虞溺公闢裏河避之行旅無恙於是又有泲河之役  
泲通淮海渠成則漕無乞靈於河也公排羣議躬開鑿  
有渠形而病公故恂恂長者至講畫大事不惑於呶呶  
之口趙渠潘司空患費而止者也泲河舒司空鑿而中  
輟者也力主必行人多公之斷自少不問家人產貳言  
錢穀而行河經費指計無與趙渠僅費金十萬二湖三



萬沔七萬畝鋪雲興未嘗不宿飽人又多公之辦為政  
持大體恤民瘼行河時籍郡邑城旦以工役相準所活  
無數疾既篤乞骸於上不許則從床箒中治程書不及  
私所謂致身者非歟公宦蹟最多而行河為烈昌黎有  
言君子所以信於天下者在行事適機宜而風采可畏  
愛也公之後河議築舍王家口之成功而益厓公思也  
或謂公經世不必復為出世學所論朝聞夕死即山陰  
東阿猶河漢其言余謂孔子有浮雲堯舜亦有浮雲腹



水者亦自曉冷煖耳未易從人品量矣公名東星字子明號晉川山西沁水人世居邑坪曾祖文住有隱德大父得保父賓俱以公貴贈封吏部侍郎母牛淑人生嘉靖戊戌卒萬曆辛丑年六十四配李累封淑人子用相貢士娶韓繼娶栗孫男一銘曰

藹藹吉人維國之楨維岳之靈秘省起家禁垣司駁直舉嶽嶽鳴為陽鳳斥為伏馬誰為為者逍遙如往即丞即令不容何病廼晉爽鳩廼治爰書明允疇如師模我



越鑑不遁明器無失型保釐齊楚以教以撫允文允武  
輦轂之西是拊是飭保障馮翊銓衡重寄特簡以貳山  
公啓事奉諱而旋帝優其卹人跂其出河伯不仁黃涸  
為墟廷論攸歸召拜司空荒度土功爰濬趙渠賈魯之  
蹟其涂可闢既奠二湖浮沕其期胡不少須瘁鞠匪躬古  
之勞臣吁嗟百身誰而喪道誰而喪世何思何慮國評  
已定易名之章俟諸太常我題其碑採彼輿議封於有  
位



資政大夫禮部尚書兼翰林學士贈太子少保琢

菴馮公神道碑

沈一貫

贈太子少保馮公琦字用韞清之臨朐人萬歷丁丑進士入翰林為庶吉士授編修歷禮部尚書兼學士歲癸卯卒於位壽四十有六海內士人識不識恨不大拜究厥施而上亦云是前輔錫爵所常薦者為惓然云公天質奇偉氣朗朗絕塵學無所不闕期於致用入史旬益究心我列帝典謨洎先臣條畫供奉日講十餘年所陳



說治本亂萌比古諷諫積有若干卷為侍講官坊時或  
議開五臺礦可助邊則遺書守臣此千數金幾何而令  
他日有間而擅使者孰利多寡也東朝未建下詔並封  
三王則立奏記太倉公有祖訓在太倉公急引爭直謂  
左庶子馮某語臣如此為少詹事禮部右侍郎時倭在  
朝鮮封議興則言倭跳梁海外方張甚安所急吾封先  
是寧夏卒據城畔公策之謂宜用間無急攻而輕決河  
灌城微獨多殺傷士且恐水壅猝難自反即以雄鎮百



萬命易數賊百未稱得計矣惟外艱家居聞朝事有不  
可輒憂於色西創後談者爭言罷市公曰言何易哉曷  
不問內備而急挑釁為所與諸制閫書權闕右雲中上  
谷緩急甚惻師救朝鮮咸疑我不可代人受兵公曰我  
非救朝鮮乃爭朝鮮漢人故用西域制匈奴矣假令朝  
鮮折而入於倭且代倭難我惡乎其不救經畧邢大司  
馬濟師公力贊之今日如唐蔡功斷乃成耳倭既遁異  
議猶不休公謂諸臣久異域轉戰數千里藩屬復完不



可謂非功即有所亡失詎可謂罪此其前後料敵無不  
預度懸中者其在吏部入則佐太宰澄流品出則廣延  
見周咨詢隨人地資望而劑酌所宜疏定銓格每月旦  
書其需次之俸而揭諸屏次銓之既月復如之幾幸者  
乃無容私而故事計外吏有疵者悉置不及公謂京考  
有浮躁之目浮躁者過之非不及也必正其稱乃服人  
心疏而增之益少宰二年而草建儲停礦稅疏甚多皆  
剴切曲盡善以適言微語作轉旋上諭及君臣一體則



為羣臣引咎以微動之楚璫陳奉罷還則請釋其所誣  
建者即以推勅降官被詰則言今選曹不易為宜容其  
以落階供事嘗譴職方空其署則請免其比舍不預事  
者而因備列數年中所連坐者咸宜甄叙其因事納忠  
多此類也上或用或不用顧察公惻誠而時為霽威將  
舉三慶典特簡公秩宗三日而具儀儀司設璫稱誅欲  
以期公瞿然曰中外眼穿此舉今已晚何所得若言適  
戶曹郎輦遼餉四萬金出都遽以便宜止之而畀司設



禮遂成因言上以大禮成歸功聖母親朝長信宮加徽  
號事親至孝願持此事天躬郊祀之禮上勞之云其須  
三殿成壬寅之反汗也公抗言聖體危而復安何可令  
聖德光而復晦播二三之令失億兆心後有緩急人誰  
信之亦思頻危時有金如山何所用哉復以災沴三疏  
論中使皆報聞其得稍禁抑者若晉璫孫朝訐魏中丞  
允貞而言貞清操無兩臣願以百口保得不問張忠者  
培一令宜調高宗者輓一藩使可巡撫公言此輩何如



安可令侵黜陟權饒倖既墨敗緣事希復留公稍其籍  
粵璫李鳳為其翼豎營貲官公謂大司徒何可令此事  
自今始俱得寢所遣璫乞關防至再公固毋與上廼以  
牙章代之而佐銓時痛故大司馬張公經纔死白其寃  
與卹典麻方伯浴卒貧請特贈太僕卿典禮時疏覆故  
相高公拱有匡輔功卹贈賜謚通政使沈公子木請復  
建文君祀議廟之於懿文側若申定宗制則議罷秦庶  
長子封尊崇繼妃封皆據法持公凜凜必行無虞中格



與旁撓也秩宗二年疏復十數上易箚時猶州其嘗所  
草牘而奏之比於尸諫達明度疏入乃瞑嗚呼可謂致  
身盡瘁矣弱冠登朝二十七年自以世受國恩念所謂  
報主承先者尋刻在慮大旨欲引當道顧先務自捐成  
心厚集君子之朋策宜量分而精圖之恒言今朝士自  
相猜何由信於上不信則不任不任且旁啓竇必也至  
誠至公息爭絕嫌庶有濟乎又曰吾儕當以體國奉公  
為先別白是非為後誠意感通為先犯顏觸忌為後寬



一分有一分之益成一事有一事之功毋為難鉅輒譖  
噫此真救時要術古大臣詎有易哉斯人之早世也天  
命也夫余屢隕涕而為之碑銘曰

方公誕時於爍有徵銜火曜闡母也寤生王母曰嘻冠冕  
而絳稱宋魏國昔於來降襁斯環寶肇叶嘉名誰能叶  
之寶韓載生煜煜五雲著祥臚句黎閭蘭臺亦茲早遇  
若韓焚草公乃積成若韓決策公乃不驚若韓籌邊匪  
旅以勝若韓鋤奄匪初用正長流深壑濤平厥神高山



大岳龐乎厥真謂稚圭誰吾用韞是來去一身曩令間  
起孰氏爾韞宴位與年宴位與年人胡却前我書豐珉  
旌此靈域重來何時祚我明德

明文海卷四百四十九

光祿大夫柱國少保兼太子太保兵部尚書贈太

保謚襄毅王公墓誌銘

焦竑

萬曆戊子十一月十七日兵部尚書鑑川王公薨于里舍



守臣以聞上驚悼為輟視朝一日詔贈太保謚襄毅予  
祭九壇仍遣中書舍人營兆域皆異數也公子職方郎  
中謙以葬之前某月奉楊檢討元祥所為狀丐余為誌  
銘余嘉公功在社稷銘曷可辭按狀公諱崇古字學甫  
別號鑑川嘉靖辛丑舉進士實出鄭端簡公之門鄭負  
人倫鑒嘗大器公悉以國朝掌故及戰守機宜指授之  
公時已奮然有自見之志矣甲辰授刑部主事歷員外  
郎中八年出為安慶守庚戌改汝寧守乙卯晉副使飭



兵常鎮常鎮故無兵備以倭患特專設防乙未改廊延  
兵備副使壬戌晉按察使甲子晉河南右布政未四月  
晉都察院右僉都御史巡撫寧夏莊皇帝改元晉右副  
都御史冬晉兵部右侍郎兼僉都御史總督三邊軍務  
亡何晉右都御史庚午改宣大山西總督辛未晉太子  
少保兵部尚書兼右副都御史其年晉太子太保在鎮  
五載以協理京營戎政召還明年加少保秋改刑部尚  
書丁丑改兵部未幾告歸又十二年而薨先後官階十



有九轉勛名炳炳耳目夫人能縷談之也為部尚書時  
傳御史應楨封事侵故相江陵詔擬罪公不從薊帥戚  
繼光以公發其奸私求解于江陵公又不從于是言者  
四起而公始不得安其位矣嗟嗟公威係名王而不能  
討城狐之慝信孚絕域而不能結委蛇之知則信乎任  
事者之難也溯公厯事三朝陪祀園丘者三方澤者四  
朝日壇夕月壇太廟先師廟帝王廟各四宴慶成者一  
禮部者一兵部者二中府者一充廷試讀卷者一知貢



舉者一幸太學命賜茶聽講者一賜銀幣者九蟒緋者  
二羊酒鈔錠者二蔭子為國子生三為錦衣千戶一而  
其歸也猶歲給米贍焉遣參政率州守就其家存問故  
事文臣一品非八十不存問公獨以功受特恩亦國朝  
來所未有也公其可以無恨公薨距生正德乙亥四月二  
十一日享年七十有四系出龍門文中子家汾陰國初  
徙蒲傳五世曰榮階將仕郎配張六世曰馨鄧州學正  
配張七世曰瑤配孫維孟公考妣也三世皆以公貴贈



光祿大夫柱國少保兼太子太保兵部尚書配皆一品  
夫人配張累封一品夫人子二長即職方郎中謙丁丑  
進士娶史封淑人次益官生娶裴氏女三長適管錦衣  
衛事都督同知楊俊卿封夫人次適通判張循吉封孺  
人次適庠生郝承訓孫六之禎錦衣衛都指揮僉事之  
幹之柱之樞之模之寀俱官生曾孫二宗孫鶴孫皆幼  
公為人慷慨有奇氣少時評三晉人物於裴晉公文潞  
公韓忠定王恭襄心嘗向往之而其敬歷中外也又多



奉端簡公之訓以往至其掌邦禁慎讞獄宛然鄭公家  
法斯可謂不負所舉矣君家孝友周貧乏訓子孫語具  
家乘中茲不書謹撮其大者為銘銘曰

維汾之水有鼎而神元經啟祚蒲坂開屯猗與少保為  
世宗臣方叔壯猷張仲孝友雄劍處囊洪鐘待扣奮蹟  
西曹持杓北斗公既趨朝星辰劍履正色佩言薰狐掘  
鼠羣飛刺天冥冥遐舉帝思股肱詔使在門蒲輪欲駕  
璽墨先溫大星忽殞箕尾誰捫內外軫動河山改色冢



賜連岡勛銘太室神呵鬼護墓門之石

明文海卷四百五十一

明山西右布政使王君墓志銘

趙南星

王君名述古字信甫別號鍾嵩開封禹州人也其先洪洞人有名善者始徙居禹以鄉舉為平陽府通判三傳至引禮公懷義娶許氏生六子其二為禹州公名納誨配郭安人生九子其六為信甫修幹哲顏風骨秀挺十



五為諸生二十五舉於鄉明年成進士試宰富陽調崇德以崇德劇也信甫才高氣銳事至立決而務為簡易使民折獄用經義宿猾大豪無敢犯者其輩既不譽又不能徇上官之意結朝貴之知以是僅轉戶部主事奉郭安人憂戊戌外計忌者未瞻也仍以崇德調簡而不暇顧其轉官在乙未計後非應察數主爵者亦苦於圖說服闋補內丘尋轉刑部事時沈大學士一貫為首相而次相歸德沈公鯉與禮部侍郎郭公正域皆正人相善



會劉御史九經劾其黨二人語侵一貫疑郭公使之除  
已而升次相方娶謀蠹之而楚宗有奏楚王為假王者  
於是給事中姚文蔚楊應文錢夢皋御史康王揚李培  
等遂謂楚宗之來皆郭公使之以郭公江夏人知其審  
而楚王徧求諸要人悉為盡力攻郭公郭公引病去守  
凍楊村奏下刑部時尚書為蕭大亨謂信甫此事須根  
究主使之人信甫知其意即問楚宗誰主使汝來者曰  
楚王之外皆主使者自為楚藩雪耻耳信甫曰此出上



疏者之口無可疑即援筆書案行勘楚中無何而妖書  
之獄起妖書者不知何人所為其中言上無立東宮意  
為沈一貫所強兵部尚書王世揚等與司禮監陳矩共  
謀廢立一夜而散之宮監九卿之門於是諸臣各上疏  
請捕罪人上大怒下刑部議懸百戶爵捕之一貫復擬  
旨切責以為賞輕大亨不知所為忽有荆門里居同知  
胡化有深怨於其州官阮明卿等上疏言妖書乃其所  
為而胡化與郭公同居鄉錢夢皋遂上疏直言妖書出



正域手沈鯉乃亂臣賊子實與同謀大亨密謂信甫曰  
郭以楚事怨政府時乘女轎來歸德宅妖書乃其作無  
疑政府親與余言必甘心於彼不可為外人道也信甫詫  
曰如此則為羅織分宜江陵之事豈不可鑒大亨憮然  
曰彼自為之何名羅織是時康王揚方巡城與提督陳  
汝忠等叩虛造景妄捕人至逮及名僧達觀冀萬一有  
妄引二公者而郭公之家奴無男婦長少皆被械繫其  
掠治出五毒之外竟無所得大亨仍欲胡化之屈服也



信甫乃請其親鞠之信甫持牘上揖曰今日之事所關甚重大不獨衆皆覩聞鬼神實式臨之即呼胡化問曰錢給事中疏謂妖書是郭明龍與爾所為何乃誣害他人化叩頭大叫痛哭曰刑部尚書全不讀律我自為阮明卿殺我一家特來籲天乃欲我殺郭明龍一家彼雖同年自彼成進士後二十年音驛不通何得同作妖書又問郭常來歸德宅相與竄謀爾知之否化曰我知誰為歸德公等但為蜀犬殺人媚人即見皇上斷胡化之



頭亦如此說大亨慙且怒輒趣信甫曰此須以刑拷之大亨曰彼佯狂耳遽退化所云蜀犬者斥錢夢皋也信甫即具爰書曰有易我一字者即引奸黨出入人罪罪亦如之律陳訴耳疏入上曰朕固知其皆偽也罷之諸人竟為信甫所持窮鋒盡鎗無所中楚中勘疏至又與郭公無涉而妖書事未結竟不得已聊坐之皦生光固多罪惡然未至此乃一貫復請旨詳鞠之康王揚遂上疏訟皦生光之寃展數日而賊可授首蓋指歸德江夏



也上大怒謂王揚阿庇反賊罷其官一貫力救之以免  
及考問皦生光曰汝認得郭侍郎否生光曰妖書是我  
為之耳萬死無辭奈何欲我奉沈相意妄害正人蓋楚  
事之勘疏至三月而皦生光正刑大獄乃絕康王揚持  
斧按淮陽乃覆楚疏當此時非信甫一時善類之禍殆  
不知所底止世之所貴於權要者為言出莫違可以報  
恩讐而豁胸臆也乃令曹中有如信甫者枝柱其間使  
上不得愉快下愧於無功則無為貴權要矣豈惟若人



恨之自非忠賢未有能容之者信甫五日再遷官出守  
常州無何劉元珍喬應甲等皆論一貫去邪黨迸散然  
無能明信甫之功者辛亥內察仍欲以把持堂官處之  
或曰是適令其名高耳不果一貫用金鉅萬竟得中旨  
勒歸德去常州舊守歐陽宜諸有道人復得信甫往  
吏民皆愛戴信服之其試士一以文藝為據即郡中賢  
者平生所厚善無委曲或以為矯枉之過然吳中士大  
夫多稍委曲即無以間執口實寒微之士無望甄收矣



其初猶有怨言既而咸服之樹碑以紀其事尚衣大璫過郡毫無所饋遺璫語直指欲愬之朝直指令二府勸之信甫曰幸謝按君守瘞不能為媚也不三年奉禹川公憂歸服闋補保定則為楊忠愍建祠廟明年擢陽和兵備正當北口卜失兇請封之時卜失兇者初封順義王俺荅之玄孫素囊之孫也俺荅之妻封忠順夫人所謂三娘子者也通文習事而能尊中國烝於俺荅之孫子至擗力艮昏愚淫蕩忠順主番漢之事然老矣卜失



免年少綿薄而五路台吉最强時捨力艮物故一年餘  
矣忠順不能罄居而慙於素囊難發口當事者重賄五  
路主婚封所費已大萬信甫曰從來邊事之壞皆坐媚  
若積習不破封事必不成當事者笑之此語聽之佳耳  
顧必不可行遂與他人謀賄五路五路乃益橫求索益  
多第言主婚而不及封事至欲與謀為內訌當事者乃  
稍與信甫謀信甫具言今日之事殊亦易曉忠順不能  
不婚也其孫不能自封也以及各部落不能一日不仰



給中國也此其權在我何至以封爵金繒予人而懼其  
不受乎且彼衆無厭而諸亡命每誑誘之武弁之黠者  
又恐喝我以外市賄一日不斷則封一日不成當事者  
意頗開寤而諸長已驕不可制於是以撫賞委之信甫  
嘗試之信甫與其武吏約是自有舊例分外增一毫釐  
者必加如律諸唯唯聽命無敢譁者頃之五路諸長擁  
北人至帳下婚馬卜失聽左右遣使數百人橫索新王  
賞五路以主婚首功求厚賞甚咆哮至欲加賞其子女



信甫一切不動彼計誑久之來講封而忠順物故數月  
諸長叩關請封遵忠順之遺言也而當事者未即上聞  
卜失以素囊竊其內寶遂去在事恐封事壞終當賄五  
路耳信甫曰今冬月草枯賄之亦必不來況此事必不  
可為乃以去就爭之明年夏果來封事告成先是代王  
妃無子二子皆庶出其長者立為世子久矣妃故代王  
以所愛妾生次子者請為妃而易世子先使優人葉美  
賄沈一貫等而後上疏疏入報可六年而朝議蠶起禮



部下其事于撫按勘議開府汪公道亨亦以代王為是  
疏已發矣見信甫語及之信甫曰公悞矣汪公駭曰君  
何所見之異也信甫曰宗藩條例親郡王之子有嫡立  
嫡無嫡立長汪公曰代王之妾已立為嫡矣曰王妃故  
例不得選繼亦不得進妾為妃何嫡焉汪公曰易世子  
已有俞旨奈何曰嘉靖中秦府永壽王之事正如此既  
而仍立庶長簡條例視之汪公不勝喜曰我本無小人  
之心而為人所誤今日得聞正論是鬼神佑我也使人



進還其疏易之以上竟得改正信甫三年考最汪公疏  
中具言代藩之事信甫首倡公論扶持綱常君子以為  
汪公不欺異乎伯宗梁山之對矣信甫識力絕人而勤  
學好問前代本朝之故實天下之人物九邊之情形悉  
載於心遇事輒有定畫屹不可扞其試宰時人皆謂其  
宜在臺省而僅得刑部假令為臺省當妖書楚事起時  
不過一再疏爭之必不得乃以事在所司竟能救正人  
於虎口之中此第一大功封次之然中國於是始尊非



特所省費三萬餘而已初卜失之叔黃台吉之庶子明  
暗台吉盡忠順欲得婚封前當事者且許之中聞代藩  
之事曰廢嫡立庶漢法所不許也遂止信甫一言而使  
之有綱常豈小功也哉汪公而外孰有能明之者封事  
成有旨陞巡撫矣而主爵不推矣信甫在朝在邊所遇  
皆大節自下拂上以獨拗衆焦屑乾噬而僅得之極苦  
又玄覽博搜為易律歷三筌四書屑考若干卷不無勞  
神之過竟卒於陽和時丁巳五月之二十六日也距其



生嘉靖甲子二月二十五日年五十有四耳孤佶上疏  
陳情部覆贈官予三代誥命元配朱氏封孺人贈安人  
又贈夫人繼袁氏封安人又繼董氏封夫人子一即佶  
太學生娶連文學得第女女一許字知州連得意子而  
殤俱朱出佶卜以戊午冬十月將塋於板橋之新阡以  
高存之及信甫弟維則所述狀乞銘於余蓋信甫兄弟  
與存之皆從余遊時所目為黨人而力擠之者也余病  
今年庚申乃為之銘曰河無砥柱四海洄瀾朝無直臣



義類胥殘佞之見忠勢在必刪一虎羣從瞋目嘖嘖挺  
身翼蔽以脫於患貫索竟虛鵠鳥為鸞不畏士人御敵  
非難威信服之疆圉以安異哉若倚何心之覆漫云効忠  
漫云有德邊功上最帝命甄錄而若罔聞而維謠詠剪  
伐貞柯留彼脆木天亦不贊賢人不祿世之杌矣憂俾  
我獨道之晦矣信史誰屬勒此片石永垂臣鵠

明吏部尚書贈太子太保孫清簡公墓誌銘

趙南星

萬曆二十二年甲午七月五日孫清簡公卒於家其弟



文融寓書於余曰兄之知先兄甚深癸巳之事兄為司功親見之銘其墓者非兄不可弟此時同事者俱在尚未可直書以俟異日余報之以不敢讓也至丁巳春公之子比部君來以文融所為狀徵前諾時余六十八矣病初起比部別後逆成久病不能復為文而念平生知己無過於公者且內察國家之大事史冊所必載即文融為狀未若余知之之真也非余銘之而誰也孫公者文恪公之長子忠烈公之孫也諱鑑字文中號立峯九



歲即能讀書長而彌勤誦習每踰丙夜倦欲卧起稍行  
數十步誦習如故十九舉順天鄉試是歲嘉靖二十二  
年也四試禮部不第益發憤竟夕不卧矣如此者三年  
而登進士授兵部武庫主事提督武學武學多貴介子  
弟而都城諸浮薄好射獵者亦多繫籍其中以權力口  
語抗法約公生長京師又兄都督公舊在武學稔知之  
較試賞罰無所假借適值六年會舉之期此惟京衛武  
學有之皆取世官及胄子肄業久而屢試高等者合試



之拔其雋可百人尚書以聞候詔下錄入職方籍以次  
擢用曩多徇情或例外間有闌入公一票于令甲視文  
義為去取一中貴家兒每月試必來公特抑之權家多  
失望者比奏將上尚書欲易一人而不肯也時同邑宋  
公岳為武庫郎中既退呼公曰立峯吾自今畏汝矣豈  
有上官嫗嫗言而面赤強爭者乎疏上踰日留中同事  
者皆危懼公不為動已而竟下是時上獨攬乾綱左右  
無敢作威福者第姑違發示虛揭耳公繇此名大起後



中貴家兒亦得舉曰吾本未跡學宮豈敢怨吾師乎遷  
職方員外郎尚書蒲州楊襄毅公自邊鎮入極重公公  
亦甚服楊公忠義磊落應事敏而悉中先朝馬端肅余  
肅敏未必能絕也時郎中偶病公署事所言皆聽然楊  
微有變通公所執堅每曲意從之以遭文恪公之喪歸  
廬墓三年起補原職楊公猶在兵部旋遷武庫協司郎  
中是時上在位四十二年矣日決事齋宮精明威斷華  
亭徐文貞公當國正己親賢仕路肅清然臣下凜凜畏



罪士氣亦少瑟縮矣公乃上疏勸上時出視朝無為左右所蔽及方士邪說不可用引趙高林靈素等為喻其利及諸宦寺尤多於時在位聞者無不駭異而好事者間造偽疏故為危論於是人人累息惟恐禍且不測而蔓延及已也即徐楊二三老嘉其直亦慮支持收拾之難然諸宦寺之恐懼尤甚竟壅之不得達公遂以病乞歸武選主事宣化鄧君洪震賦寶劍篇為贈以告其同年友戶部主事海忠介公後海公上疏大畧與公意同



上遂馮惏然留半歲不發袖其疏時出視之意似少悟而諸宦造飛語激上竟下獄當罪而海公繇是震天下矣隆慶元年起文選郎中時南署尚風節每事必欲鋤鋤為不可犯以是與尚書麻城劉端簡公牴牾公力持平其間聊合之劉公寓書揚公稱之時楊公已改吏部矣欲調為已屬而媚之者構他語沮格遂已而海公巡撫至應天見公曰僕頃者實聞先生之風而起時海公風采甚峻人不能堪公微諷之卒不入擢南尚寶卿五



年秩滿入京時楊公罷歸復起兵部而少師新鄭高公  
以政府掌吏部見公示意欲北之公竟為不顧也者而  
去明年遷南鴻臚寺卿萬厯三年考滿入京改太常寺  
少卿尋遷右通政明年晉光祿寺卿又明年江陵相錮  
權擅朝不喪其父杖戍諸言者所為益橫公因乞病歸  
家居七年丁母楊夫人憂十四年服闋江陵已物故矣  
起補原職明年遷大理卿又明年遷刑部侍郎尋改吏  
部侍郎十八年遷南京吏部尚書改南兵部二十年壬



辰平湖陸莊簡公解吏部去會推左都御史涇陽李敏  
肅公兵部尚書東明石公上謂世達方秉政力肅憲職  
不可動而西鎮叛卒告急是亦未宜他徙可再推乃推  
工部尚書廬陵曾公刑部尚書富平孫公及公旨數日  
不下既乃特用公焉當此時上深居頤養內外隔絕內  
閣為太倉王公錫爵蘭谿趙公志皋新建張公位用人  
行政一以委之三公者不敢為江陵之事而欲權歸於  
已稍有識者莫不離逖自疎以陸公智術高不可寵駕



故謀去之而李公練習恢卓虛懷下士人望所歸又為其所忌公淵穆不測且家居及在留都之時多即嘉靖中上疏事彼亦未必聞也故拔之冀為已用未幾即輒悔之矣先是在內閣者每欲參預吏部之事而吏部亦以代庖假器為恥恒至岨嶬弘治間推舉者奉旨駁問有一官而推至二十餘次者不得已乃令選郎闕說嘉靖末年分宜大鬻爵亦但為請託耳及江陵奪情之後而尚書恒自往受教矣即陸公亦不能盡改也至公乃



絕不往又故事吏部尚書道遇內閣不避避之自嘉靖  
中李肅愍始至陸公不避矣然以密有所逶迤至公而  
絕不避三公積不能堪新建乃上疏於朝言會推大臣  
與推者各舉所知類奏取自上裁以此為定國是公按  
令甲議覆以為大臣跋扈既久才品已定會推時皆得  
直言可否此爵人於朝之義守舊為是刑科左給事中  
史君孟麟則上疏直駁之言太祖罷中書省以六部分  
庶務恐其專也然職既定則又恐其不專專而不效則



罪有歸矣今以六部之權合而收之禁密旨繇閣票或有私意奸其間者悉托之上意誰執其咎乃所以資專擅也新建益大怒以史君之疏有所使之者而其讐吏部不可解矣明年大計京官當在正月內舉事議皆預定二三宵小輩為相君出力者皆借條陳侵吏部欲以決隙致潰公屹不為動三公既不得見公其必不可免者乃托人求免公皆佯應其他縉紳所指目八狗三羊之類尚多如稍不密則此輩蠭起而譁鉅矣此時惟李



愍肅公僉都王公汝訓與公同心吏科都給事中及河南道二人會同考察者皆不得盡知也及榜出改府既盡喪其私人臺省又以不得與聞交恨之公故無暱客惟一至親為司屬衆皆掾之以挾公亦為謫之矣即他屬所處者亦倍於往時故無所得其巖咸相謂曰我臺省何甘折氣今當拾遺仍拾吏部耳乃上疏拾三人稽勲司員外虞君淳熙清苦之士公所用為司屬者也楊君于庭職方司郎中少年負才氣慷慨任事西鎮蕩平



方當錄功二君皆不可動惟兵部主事袁黃者輿論未  
協宜降然方從征朝鮮取自上裁覆上三公故擬旨俱  
留用於是刑科給事中劉君道隆上疏以為臺省交章  
糾拾不為不公何乃不去一人詔切責吏部專權結黨  
令回奏公具疏如前所云則又得嚴旨回奏竟不伏罪  
明專權堂上官奪俸三月考功司郎中降三級調外任  
虞淳熙等三人俱閒住給事中疏不指名亦奪俸二月  
於是公上疏求去有旨不允公以身去無煩多言顧權



黨之說不可令遺患將來乃上疏曰人臣之罪莫大於  
專權國家之禍莫烈於結黨夫權者人主之操柄也人  
臣所司謂之職掌吏部以用人為職進退去留屬焉然  
必請旨而後行則所謂權者固自有在非可得專也今  
以留二庶僚為專權則無往非專矣黨之一字漢唐宋  
顛覆之原奈之何其以為戲凡科道論劾下部覆議例  
有去留今以留二京屬為結黨則無往非黨矣昔之專  
權結黨者往往有之並不在銓曹誠使自臣而始臣之



大罪也即如以專權結黨為嫌畏縮怯懦自救不暇則銓曹之輕自臣而始亦大罪也臣仕使不效徒潔身而去使專權結黨之說終不明於世將來者且以臣為戒又大罪也臣憂結於中不忍默默伏望陛下特加省察并賜骸骨詔報聞仍不令去而都察院李公王公同疏救余詔切責市恩羣小余及虞君等俱削籍於是左僉都王公又專疏救之而右通政魏公允貞大理左少卿曾公乾亨吏部主事顧君憲成李君復陽禮部郎中于



君孔兼員外郎陳君泰來主事顧君允成張君納陞戶部主事賈君巖國子監助教薛君敷教上疏論究俱歸咎內閣而刺譏太倉新建尤甚王公等及吏部二君疏皆留中五君降三級調外任而禮部郎中何君喬遠主事洪君啟睿復同疏爭之石公亦上疏為楊職方昭洒無受賄事願以已官贖之會吏科都給事中缺推史君命已下不出乃上疏云則當首言考功之事必不聽且臣乃考功之黨也豈得獨留況復患病有旨令之去公



既辯權黨之說遂稱病不出三公擬旨或溫或厲至以  
司官不肯認罪不能救正為無人臣禮又遣中官齎上  
尊少牢視焉公堅不肯出自三月至七月疏十上乃得  
俞旨乘傳歸是役也人皆云孫公無私考察乃國家重  
典所斥者即終身禁錮此而有私則必其無良心者耳  
以此稱公是譽宋姬以不淫也公之意蓋以除奸為主  
貪次之夫貪者污朝之臣也奸人附權傷善賊國之臣  
也故嚴於要津而寬於散秩士紳坐年老者三人皆緣



他議而微之以老有疾者即卑冗吏亦止四人耳曰彼方憂性命而忍復煎迫之乎至於任子者非有大過其祖父賢則容之以為善人之勸繇斯以談殆不止於無私也公去無何李公亦以他事遭讒去公同邑陳恭介公自南吏部來代之閣部矛盾益甚先是公未至時選郎王君教以推建言降調御史萬君國欽為推官一司皆削籍欲以立威嚴後而衆益不服後遂屢行之此江陵所未有也陳公至未久即請病數月去自是吏部用



人之疏多竟留中者官職曠廢尚書自奉新蔡公之外率以為固然莫肯去者既而公亦被彈射去政府無可票擬閣部俱輕而二三見臺省以口舌為權悉逐異己者丙辰丁巳之察吏部俛首而唯阿善類無遺餘其在林下者三十年之間零落殆盡存者亦多衰老值建稱亂師燬地削海內騷離今上即位求救反絕如弗及然無能折衝厭難者公典銓非久流品頓清而終歸於亂此秦誓所以思一个臣也公生於嘉靖四年十月十一日



年七十而沒詔與祭二壇遣工部主事錢允元治葬謚  
清簡惟贈陰命不下吏部屢催至二十七年乃下贈太  
子太保錄一子入太學文恪公生五男初娶韓夫人生  
公及南京禮部右侍郎正峰公鋌繼娶楊夫人生太僕  
卿鶴峰公綜及南京兵部尚書月峰公鑛即文融側室  
馬生庠生鑲公娶錢夫人御史後峰公女生二男長如  
法癸未進士刑部主事以言儲宮事謫朝陽縣典  
史娶編修史公鉅女次如洵即比部君癸丑進士娶



江西僉事陳公成甫女一女適湖廣副使管公  
稷子太學生可成如法生一女適江西僉事史  
君元熙子庠生孝蒙如洵生四男二女長男某  
聘舉人陳君本欽女次男某某長女適舉人周  
君昌憲子宗翰次字舉人夏君汶子良模夏山  
陰人餘皆同邑人如法等以某年某月某日葬  
公於府城北梅山至今天啟二年壬戌三月余乃為銘  
其墓銘曰



忠烈之後宜其丕興卿相茂也至人為徵上古之士無  
懷大庭人有惡心除之則貞性道合一匪善之行人孰  
無機去之則誠物我同觀鷗鳥可從閑修強學非以立  
名眈眈穆穆無可與爭之耀其華蘭播其馨世之君子  
未可同稱薄遊從凡惟化是乘卑踈遠近其儀有恒忠  
義內激洪河可馮相臣質大則弗容博選天官非力  
克勝樂其平坊不知而庸統均失官極於江陵守正為  
侮嫉超所形大計羣吏諂子營營撓脰丐免而曾莫聽



黃閣愧耻昔重今輕及其餘耦殫力以抨皇天未怒晴  
日雷霆三却釣羅鴻飛高冥正直發憤罔不怵怵貶逐  
不已有耳如苓公歸逾年往依先靈卹錄隆厚孰好孰  
憎哀哉若人遭際聖明放逐律魁破毀太平爰至今茲  
禍亂遂成喑醺湏臾有譽斯榮厥惟幸哉伊余之生得  
所歸依退遂咸并世逾二紀吾黨彫零癸巳之事可為  
沾纓傳信無人惇史焉憑余七十三性命未傾天實留  
之俾勒此銘



明少傅兼太子太傅兵部尚書李公碑 趙南星

李公名化龍字於田其先瀨鄉隴西人七世祖瑾從長  
垣瑾生公度公度生鐸鐸生蓁蓁生盱盱丞誠誠生繼  
古繼古生棟即公父湖西公贈兵部尚書者也母吳大  
夫人妊公時夢大雨中有玉柱自天而下峙立中庭生  
公讀書五行俱下為文操觚立就髫年補諸生稱聖童郡  
守王暘谷先生名士也重公與南樂魏懋權招之書院  
中每試迭冠諸生二公皆升高第公舉甲戌進士授嵩



縣令財二十耳吏胥見其少而秀羸署字故草草試之  
公心度弘廓不問也其輩遂駁媮公乃攝以威嚴豪猾  
皆聳及朞而邑大治世以方子奇東阿之績公孤挺無  
援稍遷南工部權稅蕪湖極清無何為南吏部時魏懋  
貞鄒爾瞻諸君子皆在南都結駟聯騎游於采石雨花  
燕子磯之間稱詩裁賦藻山川而賁草木迄今傳之以  
為金陵之勝事久之擢僉事督學河南較文甚速其所  
指利病甚詳其中苦學而久不遇者往往驟拔之其人



率鼓舞崛起一時稱神明未見督學如此者已遷叅議復督學山東作人之效猶中州也公望日益隆遂擢河南叅政尋入為太僕通政公以兩大人年高素不欲之邊塞而會遼東巡撫缺遼東於諸邊稱廢壞難其人大司徒趙公世卿山東人曰李公督學時兼攝數道事至立剖如簪之泛輕塵此何所不可遂以公往是冬東西邊先後告警公筴曰西兵數萬其剌不可犯東兵僅萬餘耳易與乃檄大帥董一元伏兵鎮武堡空其營兵入



我師橫擊之斬首四百餘級稱大捷明日西兵至攻右屯我師乘新勝氣銳夜却之覺而引去以功晉兵部右侍郎蔭一子錦衣衛正千戶世襲已而東兵以鎮武之怨數來攻公以精兵敗之於靖遠又敗之高平又檄大將出塞邀擊大敗之於十方寺堡敵自是與我各守疆隅矣捷上賜金幣升俸二級公念兩大人數請病求歸久之得予告解均服而絳衣以舞甚歡也而有播酋楊應龍之事先是守土控馭無術或冒沒重賂酋既驕矣



而治以漢法激之成跋扈乃請剝上就拜公總督川廣  
湖貴事賜尚方劍斬偏裨以下不用命者比發家則酋  
已破綦江叅將房加寵遊擊張良賢死之而敵之罪惡不  
可赦矣公携家以往從容笑言將吏恃以無恐入綦江  
即為文祭二將軍曰人誰無死以法死以賄死以寒疾  
不汗五日死以飲酒御婦人死等死耳曷若死國之不  
朽也慷慨激烈足使人人有喪元之思公疏請三陟閩  
浙各路勁兵先後至而舊帥劉綎坐遷延革任公謂綎



曰將軍結髮從戎膽智聞天下而怯區區敵人乎繼感  
泣願効死力公保留繼殺賊自贖命繼等八路進攻而  
以文吏張棟胡桂芳高折枝史朝貞等監之破三硎降  
其部落賊大窘而湖西公之計至詔公墨繯從事時賊  
鋌而走上海龍岡自保公密授方略從岡後掛路上火  
其龍虎關酋投繯死其妻妾子女皆就禽凡斬首二萬  
二千六百八十七級生禽一千二百二十四名俘獲五  
千五百三十九名播地悉平又條上復郡縣等十二事



為善後之計皆報可公疏求奔喪八上而後得歸服甫  
闋起總兵河道先是治河者遷去或里居皆以所築隄  
決追罰至是乃起公以人所不敢往正如播州之役公  
至則徧行淮徐鳳泗間厯覽周咨得前河臣所開泇河  
遺跡噴然曰是所以避黃河吕梁之險而措之衽席者  
也奈何既脫而復入乎乃上疏言開泇河便得俞旨即  
鳩工濬舊渠八十七里新創八十二里于是歲運千艘  
通行無所礙昔稱過洪今稱過淮即為已至迄今賴之



公其時見秋水漲溢不無衝齧方疏請為分黃保洳一  
勞永逸計而奉吳太夫人之諱以歸禪除起兵部尚書  
武弁之陞遷大都諧價于天市而取之于職方公揭其  
資薦之數于部堂有缺序轉而倖濫稍息考察軍政諸  
侍與援多羽翼者以為萬不可動而皆不免雖久留中  
然亦竟下時論壯之其所條議四十餘事皆精審可行  
公神氣素王一旦病昏暈甚危幸而甦然遂衰鬚髮顙  
白殭殍日漸以至不起公生于嘉靖甲寅三月十日卒



于萬曆辛亥十二月十五日年五十八耳以平播功及  
秩滿加柱國少傅兼太子太保卒後贈少師曾祖祖父  
皆如其官母皆贈一品夫人所贈公元配及沈封皆如  
之子不矜錦衣衛指揮同知不盈錦衣衛指揮使功名  
榮寵可謂至隆極盛矣而遠邇皆悼惜之公才高天下  
其為詩文隨手而成卓然大雅少年通顯立致鼎足而  
親賢下士形骸都忘終日談笑情瀾靡竭而未嘗有所  
漏言所在思職如田有畔尺寸不越也遇事敢為而計



慮甚周必不出於萬有一危之塗誠天受之全才國家之楨幹也今天下在外猶可展布居中則多掣肘倉皇則急用人閒暇則憑口語且求去者亦甚不易播州之變天所以就公之功名而見篤生之意也一為本兵即難愜志考選之事纖人弗堪過此以往公且黃鵠舉矣而大命頻傾此天所以護公之功名而成其始終也嗟乎天之於公則厚矣其如天下何公文章功業自足不朽勒之於石令後世以稽覽焉其詞曰



何人之英生此俊人能言斯斐鳳羽龍鱗僉曰才子梁  
鄴之倫試宰蒿下白哲少年歌雪賦月擷秀芝田金陵  
作吏其曹亦仙江南佳麗綠水朱樓自公多暇聯翩出  
游文酒逍遙頌揚國休視學河洛及於齊魯平之以衡  
正之以矩譽髦多士青雲接武公望日高入為列卿遼  
人苦敵出而救寧乃若宿將素習于兵凡所謀畫咸  
中厥度成算在胸如杜武庫威稜遠聞四方景附襁負  
子來共趨王路應龍小醜無知犯順舉朝蛩惧以公廷



問賜劍在匣將士勃奮滌地無種夜郎為郡文武之聲  
震動華夷暫試行河天吳畏之帝曰咨卿汝統大師帷  
幄運籌威噉邊垂如步大川視公安危而胡遘疾遽遊  
太空樛木生危崢山忽崩天人異嚮奇傑嬰凶醫和前  
知長弘令終千古同符歎悵無窮

明通議大夫兵部右侍郎見泉魏公碑

趙南星

世恒言今人不如古人必大愚也為此言者天之生賢  
人君子也其猶世家之積寶玉乎或數年或數十年或



百餘年而得一焉猶然有真有偽真矣猶有高下品質  
精光萬相絕也世所稱賢人君子亦若是言矣若南樂  
魏公也者以求之古人中則豈易者乎魏公諱允貞字  
懋忠別號見泉世為大名之南樂人其先世可考者自  
良興始良興生剛剛生昇昇娶于黃生泰泰在母腹而  
父見背黃貧苦守節撫之成立泰生經以勤儉大其家  
娶于王生封巡撫鄧齋公魏公之父也諱怡以明經為  
別駕行廉而德厚趙魏間稱為大人年九十六而卒娶



於王無所出繼娶楊恭人生三子長即魏公次允中庚辰進士官吏部主事次允孚甲戌進士官刑部郎中文章氣節並為時論所推公兒時內穎外方屹如成人比就師日惟讀書不知嬉戲十八為諸生庚午遭母喪過毀病幾殆公配趙恭人夢有神告之而家病者胡不服黃蘗公取服之果愈丙子舉於鄉第十四人吏部公舉第一丁丑成進士授荊州府推官荆俗剽悍善訟多疑獄累年不決公踴律師情悉斷遣之時江陵相擅權作



威官其地率以畏之太甚柔撓求容惟公與觀察馬公文煒庶貞自植民賴以安皆稱夫責云而張氏奴有不逞者衆咋舌莫敢問公獨繩以三尺未嘗不見容而更取重焉壬午徵為御史會江陵物故遺表薦其私人潘宗伯晟肩已而相為身後之利御史雷公士楨疏論潘輒猾不可相上竟相之公疏極言潘品下齒哀衆必不服彼必不止所謂苟患失之無所不至其為聖治之累甚大疏入不報然亦竟不復用公在堂中會不踰歲時



江陵初沒執政席餘威蒙遺事未能遽偕大道公所糾  
正甚多既而陳四事曰公文武之用嚴科舉之防慎臺  
諫之選務戰守之實語多侵執政而張公子聯翩高第  
遂為相庭之故事駁及諸有力者肆無顧忌所以科舉  
之防尤執政所恨遂降公許州判官戶部郎中李公三  
才上疏救之亦降東昌府推官頃之魏公陞南吏部主  
事李公南禮部主事與澄海唐公伯元同舍南吏部事  
簡獨胥吏有貼班銀以佐四司僕馬之費太宰丘公稱



少牢海公瑞皆名臣公請如此類悉革之省署頓清而此時鄒公元標由建言遣戍為吏科給事中復以言事調南刑部長垣李公化龍為工部數公者多暇相遇登山觀水講德論文每聯鑣出游望之者若列仙也蓋如是者二年而聞仲氏之諱公不勝痛念老親其何能堪疏請致仕吳江相寢之而徙公光祿丞過家殯仲氏以太公之命入都數月而有諭祭秦藩之命公為正使大行膚施趙公彥副之趙公年少有志節自乘傳廩給與



秦藩餽遺不下二百餘金皆無所取公為丞陞少卿念  
太公請告歸三年而家拜順天府丞陞右通政無何陞  
山西巡撫至則條上五事曰選授得宜則吏治修支放  
足數則軍情悅屯鹽不虛則國計實宗室不犯則國體  
尊禁林不伐則邊防固皆得報可天下風俗駸汙官邪  
日甚山西文武吏奉公教令兢兢於簠簋之飭平陽守  
歲所節省數萬金以報公極其休讚用充平陽一歲租  
於有司條議裁革者衆或過於刻削公還其奏曰非人



情也山西巡撫每歲交際費千金及酒課數千皆橐中物併贖鍰不下數萬公著為令約凡撫按交際費不過二三金他罕所餽遺公以汾州有二郡王宗人多軍民雜處州守官卑不能制奏改為府山西與敵隣自款市之後邊備日弛公親歷其地視要害覈軍實建議整飭忻州崞縣方山鎮其城土也易以甃石而黃龍池草塚山河會水泉石茆等處皆創為堡設官養兵屯守之發人徒修築偏關老營等處邊牆萬餘丈督造鎧甲戎器



市買騾馬所費不下數十萬復以其餘助大兵征討又修文中子諸賢之祠及書院陶化人才凡皆取諸其所節省他人所云橐中物者也一時山西吏治甚有文理閭閻安樂德威燦乎外方敵不敢飲馬於河值宮殿災新建密以開礦之說進而武弁仲春等爭言礦處公上疏言人主玉食萬國何以開礦為頻年貶逐諸臣其中宜無忠臣義士有一人焉可抵萬黃金不此之寶而發天地之藏以求利諸臣之為計亦左矣疏入不報而抽



稅之議起公不勝憂國憫人乃陳君臣交警之謨責新建以嚴嵩夏言為戒蘭谿以李本為戒又言去年二臣以二月加恩而三月兩宮火今年又加恩而三殿火天意甚明臣不忍陛下為二臣所誤至此也疏入奪五月俸自是山西中使張忠孫朝及他省陳增高淮魯保馬堂等益橫文武吏士人選其意者每繫繫於千萬里之外而有司候選臺省久留京邸不下公上疏言陛下何重宦寺而輕言官也疏入不報而中使遂舉劾有司典



史驛丞等官往往斃於凌虐公上疏自劾不能為吏民  
延旦夕之命臣罪宜罷絀疏入又不報則遂挺身扞之  
力摧其爪距其輦氣龍見公不能出一語公不少假借  
其輩大窘遂奏公沮格礦稅而誣以八年公費酒稅等  
金數十萬皆入已上下其議部院諸大臣於是九卿合  
詞上言撫臣某清苦之節天下莫不聞彼既叅內臣內  
臣亦叅之詆調相報天下共知其枉疏上不報而南北  
臺省之疏俱至山西吏民數千人叩闕籲留事遂寢中



使之疏上也公所興建諸領其役者及支給之數一一  
掄記至是出以相質錙銖不與自酒稅贖鍰等金之外  
廩給乃其餐錢亦以為公用至太公諸公子往來皆以  
俸金雇車馬所過傳舍食飲計所費償之傳以報於是  
衆益驚服固知魏公清非有中使疏亦不知其至此公  
撫晉九年執政者恨其錫譙已也屢推卿貳不動求歸  
養者二十餘疏不下至是乃得旨即日命駕軍民遮道  
號泣皆為祠祀之而祠在太原者李本寧太史為之記



公侍養太公者一年所而太公病性不嗜藥率子侄焚香禱於天請以身代竟不起公年已不毀矣而哀摧幾絕公天性孝友而父子兄弟皆賢達入以道德相敬愛出則以忠貞相勸勉退則以經籍為娛人品至魏公不必更言其清然今之清者殊亦易為何則清名成而家亦富矣律之以魏公能乎哉且其人率貪位末路多舛集蒙譏魏公為國家生民乃不知有生死利害故能信心孤往無旁顧却慮癸巳余筦京發被逐冢宰餘姚孫



公奪俸三月公上疏直言執政喪其私人非至尊之意  
執政恨入骨髓一時同救余者如李公世達王公汝訓  
曾公乾亨輩皆去而公留以為能容矣撫晉又數刺譏  
之故不必令其入朝大旱霖雨僅及一方惜哉公生於  
嘉靖二十一年六月初七日卒於萬曆三十四年正月  
十五日享年六十有五公之歿也余貽書當道者謂宜  
破例優卹不言及謚以公之名德駿業能聞雷電見日  
月者舉知之耳而卹拘於例竟未有謚也夫亦何足為



公損哉公仲子廣微今為翰林檢討以墓碑見屬乃竭  
翌翌之思摘為讚頌用垂來遠其辭曰

侯侯魏公若龍若神望見之者則莫不震侃諤立朝排  
檄柄臣奪之言官冀其默泯大節之盭抗疏直陳豈惟  
博謇曰報國思出撫於晉身遠而尊吏化廉清民戴其  
仁上帝憚怒惟利之云山毀淵枯鷄犬宵奔公念皇輿  
泄泄是箴慙不斯畏忿瀦彌深進則擁之退彌其輪織  
人乘之惡人上聞萬衆稱誣公道以伸九年於外九表



之親釋煩歸養白華可珍終其天年歸於斯墳佞鬼羞  
避先哲為隣有美仲子鳳署之賓手繙寶書厥德嶙峋  
論譏垂世云胡不欣人生得志無念後昆

陳恭介行狀

孫鑛

陳公諱有年字登之號心穀餘姚人也其先居弋陽宋  
建炎初左僕射康伯以太學正扈從南渡道餘姚之開  
元鄉命次子祥家焉數傳至寶一徙於瀆村地有壩今  
云壩頭者是也寶一生祖二祖二生裕三裕三生文仲



文仲生孟昂無子以弟孟善子巨理為嗣有孝行是生  
右副御史省齋公諱克宅公父也既貴贈祖父及父皆  
如其官祖母嚴氏周氏母周氏皆淑人配唐淑人生四  
男長子有勲光祿寺署正次有濟庠生次有孚衡州府  
通判季則公公生嘉靖辛卯二月九日幼敏慧九歲能  
文十歲鄉試程論出意有不善輒竄改呈都憲公都憲  
公斥曰孺子何妄耶然心實竒之是歲都憲公卒壬寅  
兵部追叙都憲貴州功廕一子為國子生時仲氏早歿



伯叔氏皆已入胄監乃以廕讓公云俟登第仍歸伯氏  
子公為文師古昔不襲時調從同邑邵太僕駿受尚書  
太僕文亦特奇古極推許公然時人弗喜也已酉應試  
至京先文恪公為祭酒見公文大奇之士子舉順天鄉  
試第二三上春官不第學益邃壬戌登進士轉餉大同  
因歸省太淑人明年授刑部主事慎刑獄以讀律為業  
孜孜討論其意暇則仍讀書甲子配邵宜人入都道病  
卒循例送幼子歸期滿至中途復以病請得予告遂娶



徐宜人丁卯滿三年太淑人促之行抵京調吏部驗封主事戊辰調考功念淑人老復請告歸無何太淑人遭疾卒毀瘠如禮辛未起原官壬申晉員外郎尋調文選萬厯己酉晉稽勲郎中調驗封會成國公朱希忠卒其弟希孝援張懋贈王例為請成國兄弟自嘉靖來親近用事家為金穴凡宰輔及中貴靡不厚結託而是時希孝以左都督掌錦衣衛事有權尤為中人保所倚重其為人謙恭相君張亦剖心任之張與馮密兩人皆睚希希



孝亦樂為効力所請無不得於是冢宰方缺少宰署事  
公曰王爵下帝一等可倖得耶遂具草曰竊按令甲凡  
功臣歿公追封為王侯為公其子孫襲者非奇功異能  
生死止原爵累朝遵之無敢越也正德中英國公張懋  
子乞恩本部執不可再下府部議皆謂不可即希忠父  
輔亦不敢謂可後懋雖得王然不可為例今希忠歷事  
三朝雖不無勞績可錄然不過曰扈蹕曰督戎皆臣子  
常職實非有奇功異能也生前被寵已踰今豈可復膺



殊典贈王不宜少宰江陰人而朱氏賜田在宜興素有  
連又受相君囑意將以會議依阿之稍易疏末數語公  
力爭少宰不悅立削去改語以公原草覆上詔下竟王  
希忠公即日移病或曰一事不得即去邪何硜硜也公  
曰不然郎官與宰輔異宰輔總百揆或可忍小以就大  
有年職在司封封外無職矣今有王封而不得爭復何  
冀乎子休矣吾將行吾硜硜矣乞休不獲則以病請楚  
相恚曰此子敢名者當遂其意世固不乏才也因許公



歸終江陵在位十年不召甲申起稽勲郎中調考功又  
調文選時權相已敗衆正拔茅進而公推轂尤急若都  
御史海公瑞者海內所共稱正直是汲長孺蓋次公之  
流然當路甚忌之余在選司欲起之不能得及公掌選  
乃起浸至大用馬公廉節素著自入銓司餽遺無所受  
至是則書問亦絕權貴請託皆不行選法清謁選者各  
自以應得何官不賄乞勢囑也乙酉晉太常少卿尋改提  
督四夷館丙戌晉右僉都御史巡撫江西敦儉朴欲以



無事安民而嚴飭諸吏尤重懲墨吏綜覈詳密巨細無所忽其餽入取諸公費不足益以饌金自他所來餽者不能拒則貯之邑庫未幾即如數報之從後者亦復而以前所貯酬之多寡互裒益當之邑庫常餘一餽而周流不絕嘗曰吾與施報可無恨獨行李往來不能無湊郵傳以此耿耿耳上需陶器甚急歲增額數千且多奇巧公上疏極諫雖不見聽然為量減之三丁亥江西歲半祿公復請盡蠲其難成者千五百器并留南昌漁課



上皆允之又為勸輸平糴民少蘇焉戊子江南兩浙大  
稔詔下賑恤仍令無遏糴然守令各為其土謀其私禁  
販易固多有惟江西大弛禁以奉明詔糴者雲至重舟  
銜尾而出而徽人尤衆穀亦旋賈會霪雨麥荒則穀價  
益踴民困不能支而外販者尤不已公私咸憂之或曰  
時適然耳九重未易聞也或曰可陰示以意令郡邑自  
為計或曰令駟儉執籌昂徽商之直而無令出境公曰  
是何言也夫知民隱而付之無奈何忍也陽奉詔而陰



閔之欺也忍欺非字民之實也夫患不能弭變不能權  
無庸以撫臣為贅矣故度有餘則當遵旨以惠隣度不  
能則當明請以安衆度緩則當候命度急則當急請而  
便宜以行遂上疏自劾并陳濟急六事其四議糶糶畧  
曰我皇上軫災閔匱為天下慮德至厚也江西去歲恒  
風害於穡事寧州等十九州縣災已重矣餘歲薄收然  
較之往昔亦減損以故場工甫畢市價即增臣等恪遵  
德音不敢為厲禁計江省之穀自秋以來所協濟隣方



者不少矣乃令穀日翔商日集輿情岌岌其土不能給而焉取餘夫當稍盈而閉之則病人也迨縮矣而闌出無限則自病也臣以為本省州縣宜仍貿遷無禁其外販者權行諭止庶驚疑少定而異日之空乏無可慮是亦仰體皇上軫閔之精意也疏上徽商大窘其鄉之御史遂以違詔論公會主之者而郡閹亦素不便公公遂罷己丑公廬燬於火乃市一故樓構之居室家而身寓羅巖寺中庚寅起南右僉都御史提操江兼管巡江



辛卯遷協院左副都御史未幾擢刑部右侍郎改兵部  
以平日功增俸一級壬辰改吏部會余伯兄擢吏部尚  
書而會稽羅公萬化方為左侍三人皆同郡公又同邑  
乃引嫌上疏避以非故事不允尋轉左晉南院右都御  
史癸巳大察京吏與銓宰溫公純等同心精覈所黜皆  
當人翕然稱服目疾具疏告會轉南吏部尚書又告皆  
不允伯兄請告歸廷推堪吏部者四人公居末天子特  
簡用焉自高皇帝罷丞相以政事歸六卿吏部為六卿



首其任尤重文皇帝雖設內閣諸學士然惟叅謀議而已故委任蹇忠定猶在二楊諸公上至宣皇帝後二楊位益尊而繼蹇者資淺因稍退遜於是請寄行焉後王文瑞忠肅繼之職守復正顧視忠定時終不逮矣自茲以還時有低昂要不甚相遠至分宜入閣而權始失至江陵而始自為真相視部如屬也然江陵有術每往請者必不自言必使請曲迎其意有不合亦姑陽應之或其大齟齬乃諷鷹鷂擊焉不則遂攘之為恩其見擢者



亦竟不知為不出江陵意也又素留心人材腹中富有  
所品騭每在司銓者上往請者欲誄之良難故其柄常  
若獨操者先時掌選者常告余曰隆慶戊辰己巳時蓋  
三相江陵末也然凡有大除授多待江陵而決余曰豈  
以其勢方張乎曰不然此公有斷且藻鑑明所論多中  
的故每每從之夫能長百人者必才兼百人者也豈不  
然哉江陵死職掌所復舊至平湖陸公光祖為冢宰益  
以強執行之先伯兄亦踵之無改諸司郎皆皎皎爭淬



礪然止可及嘉靖初而已尚不能如弘治以前也而執政者不達江陵所以能收權之故徒習見近日之事謂銓司之不能以江陵事已也遂大望公節概山立即江陵不能屈諸公益憚之益謂吏部非吾徒徒貌相與矣公視事即止息於公署以朝房見客諸中貴聞之人人自失因各肅門狀命胥謁於公曰公自潔如此仍許以情白否公謝曰敢故為名高第中外一心使朝廷清如止水不亦善乎皆曰諾自是片楮不及門矣公持衡如



掌選時務別邪正明貪廉更加意崇退讓至若媒取術  
進世之所謂講搶攘必痛抑之即序及仍稍遲焉時無  
錫顧君憲成為選郎與公意相合一時人情廩廩望極  
治甲午會余署刑部有中官盜銅科獄忤上意旨下一  
司官皆謫而中有不與事不列名者內閣為請上宥之  
仍命如此例者許所司復請而前歲文選郎王君教削  
籍時疏亦未經列名公因緣此以為請上怒曰此乃新  
令前事何得妄請姑不問公方病謝客因引罪乞罷不



允無何詔會推閣臣且命不拘資品公因推七人舊尚書大學士王公家屏為首而內有余伯兄及左都御史孫公丕揚詔下切責謂不宜推吏部尚書都御史因命以前二次所推諸臣俱疏上公遵旨疏上而前所推有李公世達亦左都御史詔下用陳公于陞沈公一貫而仍切責謂何復列李名且云未有旨命起用閣臣何妄疏列意蓋指王也公勿問司官俱謫雜職公乞罷因請宥司官不允又疏乞詔溫留且謂久在告無與會推事



不必引咎先時閣臣皆會推間有傳旨自嘉靖末年以來則傳旨者多然會推之例不廢陸公在部時曾執奏謂閣臣宜會推上久之自是無傳旨然前兩推皆留不下至是始簡拜二公陳前壬辰所推沈今所推也乃次輔某公輩復有疏謂相臣宜特命不必廷推公因乞罷厯陳始末曰臣不能多記近年楊魏為尚書臣文選郎中會推閣臣六人今元輔王錫爵即是年所推也臣籍餘姚前有兩閣臣弘治時謝遷嘉靖時李本皆係廷推



其官皆止四品而吏部尚書耿裕聞淵皆列首推今聖諭先以名望繼以不拘資格意甚盛矣臣敢不仰承聖意極一時之選臣擬王家屏等七人皆時望所屬又謬以孫鑰孫丕揚為不拘資馮琦為不拘品及後奉旨通列名上今推鑰丕揚既刪去矣其李世達實係二十年初次所推臣安敢遺詔下再譙讓臣深悚懼焉第事始末皆臣所主臣本愚劣重以病憤前疏中業已言之遂以清朝爰立之盛事自取聖明督過之大譴臣即褫職



且有餘愧皇上乃姑舍臣而獨罪司臣夫雨露霜雪皆天德也臣不復為憲成等惜顧臣能覲然已乎疇咨之義自堯舜以來迄於昭代不廢即先朝卜相非盡由會推然未有以會推為詬者至臣之身而以為詬此不在法在臣匪人耳倘嗣是而其說遂長使相臣或有他途進則臣之罪大矣猶不允是時內閣王公亦上疏申救謂聖意淵微即臣等不能窺測何況諸臣上終不聽已又盡削選司諸臣籍公嗣是益哀懇稱病篤上眷留不



置遣中官賜養羊上尊公請益力至疏十四上乃賜誥  
令乘傳歸仍命有司候痊日以聞將召用焉公杜門凡  
六月屢告不允而名益重凡正類靡不願公少留以為  
上幸知公但留一日即吏部清一日即詘身以濟世為  
公甘之問疾者皆婉致意相知數輩尤反覆極論皆莫  
能回公意余嘗私謂公曰公去甚善然於今有二大事  
願以累公公曰何事余曰自楚相敗諸得罪者皆起好  
名喜進之士多附之然非之者亦繁有徒兩家漸成黨



兩黨相角是非日以雜出持衡石而善消之是在公矣  
今仕路以建言為徑徑多岐也如使其果無他腸惟冀  
暫淹而驟伸此猶可耳今乃或持以劫上慮見斥則以  
先發博竒此訟師之靡豈宜使常得志執矩矱而默移  
之是在公矣公沉吟良久曰當深念焉居數日余又往  
公曰前所教恐難行余請其說公曰凡建一規模其前  
後必期相應也故必君相皆相孚所言如響然後可以  
酌向背審低昂圖轉移之機今循例以請猶多違阻乃



欲遠算深計逆方張之焰而豫難明之隱譬如置棋者  
一不應前後皆誤矣恐黨將益熾而徑將益啟也此以  
俟能者我則安能余亦無以應公是時公內戚亦有為  
公留行者公謂曰如君言出矣第循我故步能如志乎  
留者默然公曰然則必須少貶矣吾去志益當決矣竟  
去公在部尤留意廢棄諸賢每月必推數人殆無旬日  
間者比後稱病猶疏不置其於內閣終始無毫髮徇士  
大夫私談者咸以為涉太激即余慮以為太激然公所



舉惟茲數公有不下顧旬月間亦間一下餘則率皆報  
可內閣諸公亦俱相敬重公去無失色其後繼公者懼  
忤上意取厭且以為既知其必不用又奚為名取之於  
是諸賢悉罷不推而於內閣亦深加調和中外皆以為  
庶幾都俞之風太平可冀乃不半載扞格愈甚即叙遷  
者多不下謁補者或終歲待至資乏假貸無所得而猶  
困守邸行取乃停數年於內閣輒以惡言相報復至會  
推則諸司雜舉銓司取充位益壞決不可返乃知道一



而已強執無大假借無小枉尺者直不能寸故寧身使  
貶法必不得使貶公蓋早辨之矣機決則矢飛隄決則  
川流欲巧持之曲障之惡能濟哉嗟乎自吏部守正以  
來人皆謂閣部冰炭故一人而白黑互出一事而甲乙  
錯陳右閣者無論已臆斷者或曰晉楚爭長而宋鄭受  
其敝盡各降志以和衷焉嗚呼此論權耳未引繩於義  
也夫辨官察行審材不得以清銖兩者也倘內閣而所  
舉者皆是材品皆當其官此固銓司之所禱祀而求也



白簡在旁流言在下夫豈敢以任私當抗節之奇哉今  
不審流品不叅月旦見一缺出輒以所偏與者擬之已  
收其實而使部當其名有不應則曰權不在也善宰天  
下者固若爾乎今欲兩降意也其誰先哉矧我太祖不  
以尚書隸中書省也本意在不令相壓若不能守正而  
視眉睫以曲伺人意是失官矣且非獨今也唐宋有中  
書省其制亦云四品以上降勅銓除五品以下則吏部  
專之彼時侍郎四品而宰相亦抵稱同三品然則降除



者固無多耳今制亦彷彿如此即邇者內閣辯疏亦謂  
自庶卿上猶得與聞則勅除之意固不廢也乃相欲取  
其柄盡操之耶或曰如此則吏部不幾專乎嗚呼此江  
陵相語也凡專權自有地吏部係分職即為有司五部  
事俱不關涉精神不貫趨附者必不堅故守正則已設  
欲行私非與內閣深相結藉其聲勢必不得逞也故內  
閣能默吏部吏部不能搖內閣今冢宰奉身退者屢屢  
矣而內閣安然如昔也謂吏部權能居內閣上哉夫官



人者與衆共之者也先朝已事具在果登進者皆賢也孰為閣謀孰為部議夫既有主者則委之吏部宜耳即或不然執大義請旨以詰之豈不可溜渾涇渭其誰清焉故曰莫相憎于膠漆莫相愛于冰炭故造父不為奚仲不御部具疏而閣擬旨此成祖相鈐制意也人主親吏事者昔猶非之而必欲以鼎足攘天官事哉不明於義而惟爭權恐政術將為天下裂矣公出都行裝止書一篋衣一笥冠紳二事見者莫不歎息好事者至欲繪



為圖歸仍寓羅巖寺中讀書自娛間與衡州公及諸故友詩歌相酬答食指漸繁則復市一故樓徙故址上而前軒三楹居常或在家或在寺敝冠澣衣不問者不知為吏部尚書也其前軒繕治尚未畢戊戌正月十八日遘疾至二十三日卒得年六十有八檢篋中止白金三兩幾無歛貸於姻戚乃克襄事四月起南右都御史先時吏部尚書鮮以他官起者間借起亦必用原官領之屠襄惠掌都察院楊襄毅嚴恭肅掌兵部皆仍冢宰



御即公前一人南大司馬楊公成起掌南院亦仍故銜  
獨公以右都起蓋政府素嘆未釋名用之實抑之也然  
捐館已可百日浙撫按兩公聞之急以請卹疏上詔與  
祭二壇遣工部司務馬夢吉治墓贈太子太保謚恭介  
錄一子入太學蓋仍從冢宰例云而都憲公廕竟復與  
光祿公子啟孫今為袁州府同知公廉直細行必慎余  
自幼與公交未見纖毫過清節聞於天下至取人則絕  
不苛責有一善則力為稱譽然主在辨真偽尤重大節



寧取有瑕玉砭砭雖瑩白弗眩視也好讀秦漢以前書  
刻意古文辭即小劄無不經意常有志全史余曰司馬  
公通鑑唐公左編讀者皆未能竟何自苦為公曰第恐  
才謝左馬爾果勒成一家言後世必有鍾期未必即以  
覆醬瓿也然竟未克成惜哉宅兩經火著述稿多不存  
今存者有奏議若干卷詩文若干卷公初娶于邵宗明  
縣知縣雙栢公炤女累贈宜人繼娶于徐興化府同知  
鳳山公希明女累贈宜人男子三長啟瑞邑庠生今廕



國子生次啟草邑庠生次啟竝女子六孫男二本暉本  
述孫女二公高勲偉節著於朝端今天子方命史臣啟  
金匱石室以隆大業則不朽者當在彼矣

明文海卷四百五十二

總督薊遼保定軍務兼理糧餉備倭經畧都察院

右都御史兼兵部右侍郎震澤萬公墓誌銘

陳懿典

今上萬厯垂拱熙洽日久四方咸賓自壬辰而倭訌東



國戎馬之憂于斯方肇軍書押至中外皇皇司馬門議論  
煩興聖明肝食憂之然始以鄭司馬經畧於西後以邢  
司馬經畧於東而兩司馬所以得爭勝於疆場者皆藉  
手震澤萬公之共事行間也公自朝鮮經理竣事歸入  
副柏臺旋奉特簡代邢司馬總督薊門四鎮以勞瘁卒  
於官又二年褒叙在鎮保塞出塞功贈卹祭葬如例子  
世廕而公子參戎化孚輩將塋公於某山賜塋之原而  
錦衣邦孚匍匐以墓中之藏為請余辱公知且備員史



局國有勞臣而勒其勛伐以詔來者固簪筆之事也遂  
不辭而誌之按狀公諱世德字伯脩號丘澤後號震澤  
山西大同之偏頭所人系本江右始祖傑從軍隸徐中  
山王麾下遂為大同戎籍傑生鍾從成祖征邊以首敵  
功賜爵一級為總旗鍾生寧寧生瑛徙籍偏頭瑛生禎  
禎生億自鍾至禎世以首敵功世進爵一級由總旗至  
正千戶億襲千戶復由破敵功晉指揮僉事世襲旋擢  
守備應州守備四子仲岩即公父也萬氏自守備公以



上咸用武功顯至若始折節讀書聲籍籍諸生間以貢  
入太學仕為棗強丞有惠政語具王元美司寇誌中後  
以公貴贈如公官先娶楊繼娶陳贈夫人陳夫人實生  
公公生有奇徵穎敏非常四歲而解音律按節和歌拍  
拍相合五歲而屬對如響語意英特稍長就外傳授書  
解大意顧性佻達不能屈首受塾師約束時引羣兒為  
營陣之戲建壁壘設旗門自署為上將分署偏裨步曲  
鼓而麾之衆凜凜無譁或時馳怒馬挽雕弧射獵於榛



莽之虛奔逐飢渴則從田父索胡餅從村嫗乞水漿倦則與牧豎行歌互答而歸年十五一意下帷下筆奇文蔚起補博士弟子員試輒為冠二十四而舉庚午山西鄉試辛未遂成進士授南陽令南陽岩邑又當孔道邑多大猾舞文告訐諸老胥以公少每以疑事嘗公而公鈎稽得情洞中窳弊莫不驚歎帽伏一切治辦治行卓然以父贈公諱歸服闋補令元城其治如南陽又以母陳夫人諱歸服闋補令寶坻其治如元城壬午徵入為



兵部主事已遷員外郎公本將種生長邊陲為諸生時  
每慨然有勒銘燕然之想受職臬曹益考境九邊形勢  
諸方強弱戰歎機宜與人談邊情兵事縷縷不置或髮  
指冠或手裂地聞者推為真邊材丙戌出為陝西西寧  
備兵僉事至丙申擢公僉都御史開府天津公受命調集  
舟師建立營房選募智勇周視沿海要害雖建牙草創軍  
聲大振方將從海道下樓船與諸軍相犄角適楊中丞錫  
以掎擊去遣代者汪公應蛟而都給事中張輔之言非公不



可遂改公代揚經理而改汪代公於天津方是時邢司馬駐師朝鮮而遼陽告倣道梗公疾驅而前道遇敵斬其敵首敵驚遁遂渡鴨綠飛檄倭營新中丞率生兵十萬且至倭來與我兵相持久心憚其難勝會平秀吉死聞公來益氣奪公至則與邢司馬分布三大帥麻將軍貴董將軍一元劉將軍繼於中東西三路逼清正行長石蔓子之營預遣陳將軍璘駕餘艘於海以待倭還三路兵鼓噪進彼度不能支望風潰戮死者相枕籍墮崖



填塹者以萬計餘衆爭舟指如掬而陳將軍巨艦破浪  
衝之砲石俱發斬馘焚溺幾無噍類海水為赤水陸生  
俘倭將二倭衆數百輜重甲仗不可勝計釜山遂無一  
倭露布聞皇上御樓獻俘朝鮮始有寧宇邢司馬旣統  
大兵歸而朝鮮君臣怵於倭氛懇留公彈壓公與李將  
軍承勲戍守又二年善後區畫甚具海波無驚乃撤師  
歸擢副都御史貳院事會邢總督擢南樞推薊遼督臣  
具三人名上見無公名特簡公於鄖撫牘中代邢公固



素知公名亦由聖明瞻顧東國謂非公不終此局也豈  
尋常特達之知哉公既領制府節念茲土困於軍興務  
與休息而提衡文武為桑土計適獐兔撥計二部謀盜  
邊要挾市賞將從冷飯谷煨垣入公素嚴斥煨我得為  
備拒堵去已謀知二部借兵具甲將大舉公指授方畧  
于鎮道路將選壯丁驍騎襲之紅草溝斬獲八十級三  
衛脅息警公威不敢復動公自秉鉞立蒐羈身屬藩還  
朝未幾旋出總督拮据鞅掌竟以勞瘁致疾卒時壬寅



九月日也距生嘉靖某年某月某日享年五十有六真  
可謂死勤事者矣且人臣之誼援桴鼓之則忘其身封  
疆之臣身殉封疆苟其少有全軀保妻子之心必且曰  
我職發縱介馬而馳非予大夫之事也如公東西二役  
毋論躬冒矢石崎嶇戎馬之間義不反顧即車轍馬跡  
自出嘉峪涉青海自平壤歷八道中間包絡遼左燕齊  
秦趙竝海竝塞往返幾二萬有餘里觸寒暑冒霜露寧  
啻叱馭九折之坂哉而悠悠之口猶或異同亦未深察



公奮不顧身之一腔忠烈矣或謂公不過以功名自喜  
在湟中時不勝少年請纓之意一遭挫折未免却步贊  
畫西事遂因鄭司馬以利誘邊王還巢為功而竟不能  
制火長之死命經畫東事亦因邢司馬來瑕用間以倭  
自還為功而非盡出於陷陣摧堅之力夫制敵者不必  
盡用戰戰勝者不必盡鬪力故趙充國以屯田困羌未  
嘗以不戰貶功符堅自潰謝玄乃有淝水之捷金亮身  
亡虞允文乃有江上之勝晉宋推再造焉今必出於力



戰然後可是營平金城之算為畏戰而立與允文皆僥倖於敵國之釁而勝不為武者也必不然矣嗟嗟者定廓清要在可久方順義初歸時疇不有可去可來之疑今順義不渡黃河款貢不絕者又十有五年方倭敗衄固噴有煩言謂用構而去寧保其不突至今自己亥凱旋又六年所雖恐喝之聲時聞而鯨鯢之迹既絕譬之醫之治病已起疢危而安全之有年矣又安有不用以為功而反用為罪哉公於學無所不窺六籍之史百家



九流嘖英咀華詩歌詞賦大篇短牘狎主齊盟其他星  
野堪輿音律歌曲舞槊戲馬彈碁擊筑酒經饌譜無不  
曲盡其妙而性喜延攬重交誼騷人遊客稱一什擅一  
技者靡不倒屣迎而身下之人人分潤務厭其意賓至  
如歸絕無倦色家世為將選鋒家丁以家貲養者常數  
百人通籍臨戎帳下如雲皆與共甘苦所至得其死力  
生平擅人倫之鑒屬吏材官一經識拔者往往大用朝  
提猛士夜接詞人益二十年以為常友人丁參政此呂



以萑菲冒墨名得罪公念其困為代輸償官屠儀部隆  
負才落職公念其貧歲割俸遺仕宦三十年所得祿賜  
強半用以供交遊資斧尤厚於睦族婚嫁喪塋與不能  
舉火者皆周卹有加其慕義樂施固天性然也所著詩  
有署中稿湟中稿塞下曲媯上稿折津稿海上稿所署  
書有湟中牘家食稿經畧牘監司草竿牘偶語兩河邊  
鎮西事畫餘考海防奏議經理奏議經畧奏議藏於家  
古稱絳灌隨陸有能有不能長鎗大劔與毛錐並長者



惟諸葛武鄉侯與李衛公孔明綸巾指揮跨馬穿札或  
非所長衛公所著止有兵法問對若乃戎衣操管鳴鏑  
在前赫蹏在後滿志愉心如公者尤罕偕矣娶於楊封  
夫人子四長化孚山西河曲參將娶蘇繼娶沈次邦孚  
錦衣衛副千戶娶丘次有孚官生娶孫次國孚所庠生  
聘宋孫男二孫女二

銘曰古稱山右實繁虎臣然惟附注為國干城操戈執  
受允武允文二業並伯古今鮮倫偏闕突兀地靈攸鍾



挺生鉅人兩肩同工西走青海東渡綠江飛檄星燦揮  
戈天潢海外向化火攻蕩穴倭訏三韓水師橫絕縉紳  
憂時疇不談兵躬歷沙場獨公先登元戎開府借箸孔  
多執券而償能無牴牾梁州徙幕滄海恬波赫赫皇威  
震疊山河遡之古牒靖遠咸寧各樹一隅未聞兼能起  
家所象扶桑祁連川原列嶂旂鼓森嚴勲名麟畫盾祈  
蜚藩百千斯年鬱鬱芊芊

大理寺左丞鼎梅劉公墓誌銘

倪元璐



蓋元璐嘗讀鼎梅劉公封事作而歎曰嗟乎古今君子  
小人之相治不自為力而徵助則必皆敗也漢中平之  
後以君子內治具小人不足而延外力外力一入而天  
下盡化為盜賊明天啟之季以小人外攻其君子不能  
而仰內力內力一出而天下盡化為婦寺之羞亦不得  
存小人故此二力者難借也昔者伏馬不揚極於中歷  
貞皇一月環節雲流當是之時蒸蒸皇皇南北二龍俱  
興於位二龍者北有吏部尚書高邑趙公南則左都御



史吉水鄒公益當時所稱如漢云三君者然也二公之道異趨同歸趙公救時而急事功鄒公正本則尊理學學尊教立務廣聲緣惠此京師樹廬章鐸明誠正之宗發春秋之義鼎鏡並設筆舌斷然小人患之度不能制乃移其懼於中閣告其魁魏忠賢曰是等召徒集謀意在君側耳忠賢繇此甚恨清流以去鄒公為其始事鄒公既去會南吏部缺人廷議復舉鄒公請賜環名不報夜半傳諭內閣如鄒某衰老蹒跚何宜復用時首輔葉



公向高爭之不得力求罷歸於是山東道御史劉公上言陛下奈何以蹒跚棄元標元標自繇向者抗忠受杖狀已蹒跚豈關衰老陛下誠以元標蹒跚宜益重元標且元輔以不得其請求去陛下終不用元標是速之去也又言閣臣所司存乎票擬中旨頻宣焉用彼相奸人旁竊懼成鹿馬曹節王甫事可寒心反覆凡千數百言指畫危難忠賢聞之大怒已而左副都御史楊公漣疏劾忠賢二十四罪舉朝大譁忠賢乃益信其黨之言具



黨又告忠賢以劉公居鄒公之里而交楊公甚驩於是  
乃逐楊公而用他事黜劉公時劉公遷廷尉丞數月矣  
尋即逮楊公等六君下詔獄拷死緹騎日出以求其類  
天下謂必及劉公劉公旣治囚服訣妻子飲酒俟時久  
之不得命而先皇上賓今聖人當陽收振魁棟醜徒伏  
誅旌亡求廢有詔復劉公原官然劉公已無意更出時  
時與長安諸貴公絕交書諸貴公意少衰延俄十稔劉  
公竟死田間嗟乎元路觀於劉公之道則知居天下之



義其愚莫不利用銳居天下之利其智莫不利用鈍也  
當劉公首奮義推揚公從之羣賢慕公之義皆學揚公  
其後凡揚公之徒槩多死者然揚公實學劉公劉公顧  
不死及揚公首承譽命劉公從之天下發劉公之義以  
及羣賢其後凡劉公之徒無不用者然羣賢實貴慕劉  
公劉公顧不起繇是觀之可知龍德畢萬七戰亦在牖  
下介推十九年亦在綿上歷啟以還七十餘年之間天  
下之嚴節靜理握固養冲未有如劉公者也公名重誨



字忠甫其別號則曰鼎梅始祖德才君當宋南渡自閩徙贛十一傳為贈公梅隱先生是為公父梅隱娶於譚生公公生穎慧十八補博士弟子三十七舉於鄉又十年丁未成進士筮令臨淮其治決蘊洒煩均畸賦甦疲逃招撫流亡三百戶民用歌之以治行第一拜監察御史鯁固敢言他所條上君德固守正法等疏陸敬輿不能過也持斧畿輔豪貴屏息官終大理寺左丞生於肅皇帝御極之四十年九月十二日以今崇禎十年七月十



日卒於里第獲年七十有七元配黎早世追贈孺人繼  
娶封孺人黃氏八子皆才曰佺曰佺曰佺曰儉曰儉曰儉曰  
佺曰徐皆黃出曰佺妾白氏出曰佺即元璐丁卯所舉  
士也孫男良靖良竑良琪良珩良珩良珩良疇良  
暉繩繩凡九人曰佺等期以今年戊寅八月癸丑日葬  
公南畝淵之陽而曰佺以元璐一日長又能知公輕千  
里乞銘其隧元璐雖病不得辭

銘曰章水貢水交靈起哲天祿卯金元城漢鐵鳳咻能



鳴豸角誰截虹飛義鬚霜揚諫舌攀檻婉忠破柱方烈  
北寺嗟嗟黨碑業業碩果或存玄芽具茁介推不言元  
亮不折世亂埋輪時清結轍奸曰殺之亦不得殺帝曰  
爵之亦誰其爵殆古至人莫可濡熱養浩尚玄因時而設家  
近鵝湖恣其澡浴猗與劉公豹文龍德生氣熊熊千年墓碣

明文海卷四百五十三

原任資政大夫禮部尚書兼東閣大學士青丘劉



公暨元配累夫人曲氏累夫人王氏合葬墓誌

銘  
倪元珪

夫崇濟之業所以考名人憂患之心所以正君子是故  
苞桑休否蒺藜乘剛負弘者無狹模審端者無回志亨  
困之德篤于劉公矣公諱鴻訓字默承別號青岳其先  
自寧津徙居長山始祖善興善興生謙謙生拳拳生達  
達生元元生璽璽生伯能伯能生天賜凡傳八葉代有  
聲聞博陵士族之宗瑯琊人倫之盛所自來已天賜生



公父觀察頃陽公尉倉言乎其學江海以為之才強諍  
之聲體雖同鳳於蕃之績追峻嵩高教篤慶流法宜繩  
繼公其長子也公生有異徵幼形奇表黃中等身之書  
流涕可盡長吉嘔肝之語入手能成總角升分名謹一  
郡十舉不第囊錐相疑幾及會稽富貴之年始售廣川  
天人之對故知洪音不爭於急節修翎必資乎利風遂  
以雋選為翰林院庶吉士橐筆三期聲稱日出授官翰  
林院編修公綜習典常精疏義務昌黎之起當一變之



時習生史才有不常之譽知制誥一年獨持體要如絲  
如緯其觀較士春官囊綜梗梓廬陵之勒軋茁興國之  
榜龍虎方斯蔑如也于是國家多故顯皇帝登棄天下  
貞皇帝俄繼上賓鼎湖再號連山幾沸離婁覲軒皇之  
座旭馭委虞淵之都公乃戟手掀髯昌言聲義錫責時  
宰其音琅然同列聞者舌吐而已尋奉詔以兩朝勅旨  
頒諭朝鮮賜一品章服時四郊多壘制閫非才公道經  
三韓為出籌箸奈聽藐藐中用惋憂既渡東江俄聞烽信



名城墮為丘墟巖鎮沒於榛莽公撫膺太息而已既而  
弭節元菟大禮克舉又以海國我之外籬綏遐激忠存  
乎推置於是裁約享饋章示規繩是使卉服之長感激  
而效干城窮島之人慷慨而知內嚮公之能也復命擢  
右春坊右中允旋晉左諭德遭頃陽公憂摧毀之誠幾  
於死孝服甫禫起少詹事維時節甫乘權膺固駢戮岵  
虎懼其多翼謁者怪其有兒招賢苟朋剗割剛士公入  
都門義形難犯璫之郡兒以難告璫曰黨染不除後其



臍噬繇是矯旨褫公冠衣而公自意言笑宴宴三公於  
我乎何如黨人無慙于不與矣跨衛還里彌益夷猶非  
有山鹿庖厨之懼野鵬坐隅之感陽陽陶陶貌日華舉  
古之樂天知命無日不自得者夫居之二年否極以喜  
今皇帝乘乾出震鋤奸顯忠金天作則九黎誅玄華升  
而四凶革訪予落止懸銘闕門詔廷臣極蒐舊德凡疏  
朝野十人比於周亂公名與焉皇帝考慎且日召執政  
以下入對乾清焚香禱天冀得良宰覆名金甌明憑帝



賚首探得公上心甚悅即家徵公為禮部尚書兼東閣  
大學士發冊遣使肩背相望控辭不聽凡五閱月隨使  
者至闕下陛見之日嶽立鵠舉音吐軒訇上遙見曰成  
喜著瞳采當此之時地氣猶結首肱分道荃施競時晁  
其窮漁夫有留菟產祿窟而猶在牛李壘以方爭綸扉  
之長引質溥先朝之嫌畫諾之司慙兩魏同心之致公  
至木彊感知氣昌章邪摘疑察察如也于是奸徒大沸  
剗手須剗遂乃召鷹起犬移眩縉素有覲面目視人罔



極商英報元祐之憾宗孟以司馬為譏賴夫聖人瞻言  
王赫斯怒刑天干戚投於帝江營蠅樊榛欸然離破群  
迷衷聖國是以明公是用感泣刻肌益靡避惛因承密  
對力言吏速化則治不成民重征則盜不息又言帝王  
之道必世後仁譬身元氣久自蒸徹又請渙居益饋任  
人責成既以魚水方乎無言不得退朝目送勢所難居  
遮道手加情何易答且夫指天畫地壯論也以為過厲  
其氣雖誼辟不必保交會食拂鬚寅衷也以為孤遠其



情即微言可以弋禍始終之際明哲所憂會以京軍置  
帥制書不符議者毛吹歸諸機密原其顯過小事糊塗  
閣班後公則猶叔季而言者倉卒承詰遽以公稱值上  
勵精無私制治不欲使人揣疑秘旨以為天子箝鍵言  
路祖翼凝丞乃下所司雜施窮鍛孔璋石烈今世所希  
咄嚅之間已成大獄詔下成公雁門公奉命坦施北向  
稽首臣罪彌天死不足塞幸承貶竄夫復何云即日徒  
步出國門書衾悴然見者哀歎至則雜諸戈矢致恭其



帥雖元鎮吉陽不移岨強而子方淮水能聽風波循省  
之餘益脩性命暇或攤書詩藥賦詩泳游間選緇留與  
爭道韻適如也亡何寇犯五臺雁門雲擾公獎鼓家雜  
仗劔登陴傾囊鬻裝以享戰士敵不敢犯孤城獲全方  
之殺千深坐以保西河王蠟閉門而全畫邑雖休瘁不  
同抑亦各有其力乎風霆易涑水石能明天下方矯首  
啓遵鴻之儀五位或拊心思放麋之過詎期疾作竟致  
彌留以崇禎五年正月十有二日卒於戍所枯竹未生



曷明不負牛車共見已白非欺悲夫既卒大吏以聞詔  
辭感惻聽諸子得以其喪歸葬其土仍勅給傳官為治  
行非諸流人可得而望斯明至仁之存乎墜履定論準  
諸蓋棺矣公泰山之容滄溟為量髯戟載義眸電曜靈  
正骨嚴顏晶衷博體室鮮抱綢之媵門無彈鋏之賓矜  
岸方幅不以厲物靜穆虛澹不以篤時道廣渙羣才周  
勝鉅迷翫資其斷斧驚颯恃其智樯然而挺柯寡枝遙  
流不由體誠曰坦測表云疎此其所短是以困也夷考



平生每逢奇異讀見黃衣死流巨響負瘕臨危化人饋  
之神藥涉波胥溺靈禽定其傾舟豈惟生有自來抑亦  
誠之通召然與公生嘉靖四十四年七月九日享年七  
十元配累贈夫人曲氏同邑通政使曲公遷喬女繼室  
累封夫人王氏同邑太學生王公東漢女齊德均禮踵  
美增華鷄旦奉以翱翔鳩桑形諸帶弁亦簧翽之唱和  
梁筍之規隨也曲歸公七年以勞沒王後公一年以悲  
殞子三孔中孔和孔武女五孫男一曰愷配嫁姻婣悉



於家狀父書能讀祖笏行獻龍文麟室挺挺耘孔中  
等今年某月日奉公柩暨曲王兩夫人合葬黃家庄之  
東阡禮也伏波發藁不假大招之文玄成仆碑共切重  
興之望元璐不敏敬為之銘曰泰山巖巖峙為人鵠學  
山至山予何不穀扶滋氣道昌沛文辭使則不辱名流  
奇夷瑤銚渙然誠帝之賁朝踐斗樞夕清薈歲茂名難  
居殊恩莫報夏氏之璜則亦有考英州儋耳槩多名人  
露靈皆教天王聖明孔璋何人谷永不作為臣不終死



而猶矜帝施敝帷賻曰車馬魂乎歸來若無罪者佳城  
鬱鬱三英榮兮馬祠魏碑臣日望之

明文海卷四百五十五

范養吾墓銘

陶望齡

公諱櫟字子美號養吾其先宋叅政文正公之裔文正  
公之曾孫曰直愚者為永嘉今當南渡時徙居會稽四  
傳至澧泉令宗堯居九節坊宗堯孫完當國初時官光



祿署正生溥溥生封川知縣鑪鑪生垣垣生錡公父也  
仕為江西新昌典史後以公貴封奉政大夫刑部雲南  
司郎中新昌公廉介歸十有九日而卒於是公年十五  
矣貧甚幾奪業已益自奮滿服試縣中第一大為令所  
賞補諸生十年受徒自給嘗開兩館往來講授時母老  
而配沈病卧講畢復步歸為炊常奔走無課文暇時於  
塗間默構之每往返輒就雨義晚歸恐兒啼煩大母因  
取懷之潛步月中運思成課課更多其伍其精苦如此



嘉靖己酉舉於鄉連成進士第授工部虞衡司主事管  
節慎庫蒞事日嗽餅數枚以廉謹稱職得時譽當事者  
因令人要致之公不肯往見以是差滿換職需二年餘  
始補刑部廣東司明年審決關內未報命就轉雲南司  
員外郎尋為郎中時有昌平窰戶百許犯陵脈論讞罪  
悉死公心哀之念必有首事者得之餘可活也竟坐一  
人死餘悉減再考出知淮安時倭驟犯鹽城轉掠廟灣  
實淮安地公行次徐得報疾馳詣郡未至泰州復告急



時督府集兵五萬七千人分十七營以禦之而公自將卒屯菊花溝以扞城晝繕兵械宵嚴守備時荒後府藏虛諸軍所給餼日十石餽者三萬人商賈希少倉糧告匱公揭榜增糴價招之是時廟灣賊方發民屋甃墻築堡因鹽商積粟為持久計公度賊勢未解慮餼不繼言於漕臺請發數萬金告糴湖廣漕臺難之而先是軍門已截留運糧五萬石公竊計即彼聽而上請朝論未必從即從亦緩無及於是擅發銀三萬兩六道往糴五旬



米至就船中減價糶之頃得三萬償糶本而空獲米五萬石軍興給足卒以殲賊自受事不解帶者半歲衣漬汗表裏粘合為一肌染如漆兵事甫罷而景藩役興王舟之涉淮也從彭城建於寶應供頓千里舳艫萬餘艘兵衛夾塗錦纜而牽者五萬人兩涯各除道五丈直民廬輒撤之公傍廬置敝船覆土板上望如平地居者以安淮人表水而濟公笑曰無庸王舟至上流開水從水患淺邪時諸郡括丁夫俟役呼召甚棘公畧不儲侍漕



院大憂之召為語公謾曰明公在何慮邪怫然起曰府  
乃欲委罪於我役我止一老夫何濟曰非敢然也獨仰  
明公斯易集耳曰柰何公曰今王船方出糧船必不敢  
入閘比次坐候日費為難今以旗甲守舡而用其七人  
為夫彼利得僦直趨役必喜第須一紙牌耳曰如不足  
何曰今鳳陽以夫數萬協濟於徐役畢必道淮而反若  
乘歸途之便資而役之無不樂應者則數具矣於是都  
御史大喜稱服公進曰無用也復愕然起曰何為曰方



今上流養水以濟王舟比入黃則各閘皆洩勢若建瓴  
將安用衆曰是固然矣彼肯恬然自去乎曰更計公勿  
憂都御史嘆曰府君有心計吾不及也先是光祿寺劄  
沿途郡縣具王膳食品珍異每頓直數千兩公袖大明  
會典爭於撫院曰王舟所過州縣止供鷄鶩柴炭此明  
註也且光祿備萬方王食以辦此窮州僻縣何緣應奉  
乎撫院然之為咨請禮部部更奏令第具繕直王頓二  
十兩妃十兩省供費巨萬計比至公遣人持金逆於塗



遺王左右曰水悍難泊惟留意於是王舟皆窮日行水漂疾如激箭三泊供祇千三百比至儀真而一夕五萬矣時王重載出羣盜謀劫王布黨起天津至鄱陽分徒五百人往來遊奕一日晚衙罷門卒報有貴客入僦潘氏園寓帑者曰有傳牌乎曰否命詞之報曰從者衆矣而更出入公心疑為盜也陰選健卒數十易衣帽如莊農曰若往視其徒入肆者陽與飲飲中挑與鬪相搏繫以來而成曰慎勿言捕賊也卒既散去公命與謁客西



門過街肆搏者前訴即收之比反得十七人陽怒罵曰  
王舟方至官司不暇食暇問汝關乎此令就繫入夜傳  
令做備而今皂隸飽食以需漏下二十刻出諸囚於庭  
厲聲訊曰汝輩謂官府當出迎王而欲乘空虛為亂吾  
久知之徒送死耳咸叩頭伏曰朝廷洪福奴輩當死侵  
辰捕賊首已遁其帑妓也於是令飛騎馳報徐揚諸將  
吏而斃十七人於杖餘賊散潰是事微公且不測疆吏  
皆悉誅死矣居無何而玉帶城之議復起淮安故兩城



者南宋時築也時亂後漕院以多備乃議合之公意弗  
同院怒逆舉之身為植工竣命曰玉帶繪聯城圖大享  
勞郡吏令人邀公公固讓不往出行城上歎曰此城患  
也務大難固速成不堅是功必敗矣院聞愈憾於是搜  
遠歲逋為罪劾奏之得旨奪一階而公竟罷公為治英  
敏善決斷不畏強禦摘姦雪滯通於神明鄉宦某者淫  
暴擅殺大為鄉里患海賊之亂築郭絕衢道自固府判  
出經其郭閉勿令過判還以訴公公怒命墮馬無何其



徒殺邳州三郵以賊級報驗得之遂以兵圍其第執徒  
三百餘人併發其所為諸姦利事訊之皆歛伏某知其  
不解而憾公切骨陰謀刺公公偵知之不得發則賂於  
朝得復起脫身亟行赴官會為臺糾奉詔逮問而歸獄  
詞於四郡公焚香誓神引囚七百鞠之得實以報某竟  
獄死民家子徐栢及婚而失之父訴府公曰臨婚當不  
遠遊是為人殺邪父曰兒有力人不能殺也久之莫決  
一夕秉燭坐有濡衣者臂兩臂倮而趨公默詫曰噫是



栢魂也而繫甕水死耳明日問左右曰何池沼最深吾  
欲暫遊對曰某等遂與以往指池曰徐栢屍在是乎網  
之不得將還忽泡起如沸復於下獲焉召其父視之栢  
也然莫知誰殺公念栢有力殺栢者當勅一日忽下令  
曰今亂初已吾欲簡健者為快手選竟視一人反襖脫  
而觀之血清焉呵曰汝何殺人曰前陣上沉耳解其裏  
血清霑續公曰倭在夏秋豈須襖殺徐栢者汝也遂具  
服云以某童子故童子至曰初意汝戲言也果殺之乎



一時傳以為神馬去郡日郡人扶攜悲戀婦女皆登堞  
呼嘯或騎馬拏船尾之川途為隘踰數百里至江而後  
反或裹錢物投舟中公遣人追還皆莫得主者復為立  
生祠祀之其惠愛如此公於學以力行為尚每談論經  
史風旨超邁終日不倦敝衣徒步遇之者以為老先生  
其臨事明足蚤知勇足以斷仁足以守刀斬鏡別毅然  
不移惟識與力可謂兼之所著洗心居格言觀史雅言  
首尾吟等集行世少嘗讀書道觀數怪見同學者死焉



公與翫習無懼色其膽決益天性也卒歲有降紫姑者  
諸孫就問壽以詩呈公詩有半醉逢司馬句公笑曰吾  
今死矣半八公十加一吾壽數也醉者酉卒丁酉卒也  
馬屬午也在午日乎果以六月午日沒及葬諸子以李  
公槃狀來乞銘銘之曰璧貴金良不可禦荒屑而食之  
不如稻粱積蘇千車困粟百畝以適市廛不敵寸珠誰  
穀於土誰玉於豐蕪者實難惟我范公淮方未平公卧  
而治療其調饑公也則批公之來還隱者之顏式是邦



家寶王韞山炯爾者識抗爾者力斯言不磨眎彼幽石

何長史墓表

婁堅

嗚呼天下固未嘗無材也而常患於擯不得用即用矣  
而人未必知之深也又患不獲盡其才若其志節不立  
媿阿苟且以自失其身且重負天下者即有材何為以  
予所聞若常熟何大夫其才其志節皆宜為世大用而  
卒困資格以老豈非當事者之責而士君子所深為之  
惜者歟公諱某字子宜父曰湖廣布政使司都事贈文



林郎浙江平陽縣知縣諱墨生公兄弟五人嫡長曰鉅  
其母王也再娶周連舉四子而公為長次曰鑛曰鐸曰  
鉉平陽之父輝大父采曾大父海海之季弟世學為士  
譜藏其家而燬焉故自海而上距宋靖康南遷凡數傳  
皆不得而詳也獨宗人之老猶能言裔東自別於廬江  
而已公兄弟皆少而力學意不專於浮華甫壯貢於鄉  
顧久困禮部平生自負其才謂功名可立致即終不遇  
寧跼伏田里豈能碌碌隨流俗人汨沒及第鑛登進士



第慨然嘆曰吾今而後殆亦可試乎遂謁選為令溫州  
平陽其地東並海於溫之屬最僻遠而瘠其民多去之  
永嘉瑞安佃而耕比公為之三年流離漸復二邑之民  
更視為樂土如異日平陽人也及公既去後之為永嘉  
者歸以告其里之人如此蓋公自踰冠讀書任陽田舍  
拾兄所棄汙邪而墾之其獲滿車則仍以歸兄而更受  
其瘠瘠又復穰故其為巖邑而治辦能若此平陽之輸  
或遠在鄰境及他衛所涉江即沉艘踰嶺即摧輶公乃



議折而益之美彼利其贏此享其逸人咸便之金鄉衛  
者介甌閩之交去邑南幾二百里湯信國公所設以備  
倭也久而備弛戍卒病於暴露猝有警無足恃於是條  
便宜築二石堡屹然為一重鎮使後之為邑者率能繕  
完則猶信國之遠慮乎其他魚鹽關市之征廢則修之  
或不足於額則轉移補之有勸之鑿空以佐縣官者謝  
弗為也而贖之緩稅之美悉以俱解省府費未嘗私以  
自潤焉蓋公既明而熟於計事至孰利孰害靡不究極



於毫釐而又本之以廉法出之以練達幹之以精勤以故規畫一定若操券而收責役興而費易支功成而民不勞能使旋至而有效每若此及朝京師以課最蒙白金之錫當得美官而當事者終不能盡其用僅遷南京錦衣衛經歷以閒散縻之公至樂其江山之勝意泊如也已又遷淮王左長史遂乞致仕歸而以圖史自娛數與親故共為酣暢而已尤好為弟若子揚抗古今以寄其感慨如是者又二十餘年以歿予生也晚憾不獲從



公遊聽其議論以開發其中之所窺老而無所用於世  
幸為太平之不遇人而撫時感事常思得當世之偉人  
以身任天下之重舉動光明卓犖剗去世俗之媿阿一  
切出於奉公守法而又有如何公者若而人以為之佐  
其於久安長治庶有賴乎獨惜夫有材矣能不失其身  
矣既試之而效而卒不使極其才之所至然則必媿阿  
苟且與俗同其波流者而顧與之共功也豈不可惜也  
哉予既獲論次其概竊以謂公之為平陽獨鳳浦磔之



役最大而碑記頗能詳之輒采而參之於表其畧曰平陽之南有江橫亘江之南又多太谿南北相貫穿則亦名曰東江西江凡溪水之來滙者三十六源溉田可四十萬畝獨患閘之山犬牙錯潮出其間若與之關闕即濤愈壯而谿水尚不能敵湧而壞民田者鹵也在宋端拱始築碣三峯嘉定中又移築鳳浦民賴其利元末兵起碣廢本朝自永樂迄嘉靖里父老凡四叩閤卒未果復當歲丁丑公以白備兵使者龔公遂與定築碣之議



經營凡八閱月而工畢是役也公謂用土不如石恃隄  
不如椿止磔下流不如并磔上流完皆與衆異議夫籠  
土石而投之石固易止而立也椿者下石而上土水之  
來者阻石而留石以為之閼也水之去者汨土而利土  
以為之戶也并備上流則無慮於蟻穴蓋既成而後人  
知其完焉計用工三萬有奇用金四千兩有奇而取之  
四十萬畝者不過稅民畝四釐而已公之子三人伯世  
滋撫其弟錡之子也已而舉仲子允澄叔子允泓其能



備述公之稱於鄉閭見於政事而謁予請表其墓者允  
泓也

明文海卷四百五十七

五人墓碑記

張溥

五人者蓋當蓼洲周公之被逮急於義而死焉者也至  
於今郡之賢士大夫請於當道即除逆閹廢祠之址以  
葬之且立石於其墓之門以旌其所為嗚呼亦盛矣哉



夫五人之死去今之墓而葬焉其為時止十有一月爾  
夫十有一月之中凡富貴之子慷慨得志之徒其疾病  
而死死而堙沒不足道者亦已衆矣况草野之無聞者  
與獨五人之皦皦何也予猶記周公之被逮在丙寅三  
月之望吾社之行為士先者為之聲義斂貲財以送其  
行哭聲震動天地縋騎按劍而前問誰為哀者衆不能  
堪扶而仆之是時以大中丞撫吳者為魏之私人毛一  
鷺公之逮所繇使也吳之民方痛心焉於是乘其厲聲



以呵則噪而相逐中丞匿於溷藩以免既而以吳氏之  
亂請於朝按誅五人曰顏佩韋楊念如馬杰沈楊周文  
元即今之僂然在墓者也然五人之當刑也意氣陽陽  
呼中丞之名而詈之談笑以死斷頭置城上顏色不少  
變有賢士大夫發五十金買五人之頭而函之卒與屍  
合故今之墓中全乎為五人也嗟乎大閹之亂縉紳而  
能不易其志者四海之大有幾人歟而五人生於編伍  
之間素不聞詩書之訓激昂大義蹈死不顧亦曷故哉



且矯詔紛出鉤黨之捕遍於天下卒以吾郡之發憤一  
擊不敢復有株治大閹亦逡巡畏義非常之謀難於猝  
發待聖人之出而投環道路不可謂非五人力也繇  
是觀之則今之高爵顯位一旦抵罪或脫身以逃不能  
容於遠近而又有翦髮杜門佯狂不知所之者其辱身  
賤行視五人之死輕重固何如哉是以蓼洲周公忠義  
暴於朝廷贈謚褒美顯榮於身後而五人亦得以加其  
土封列其姓名於大堤之上凡四方之士無不有過而



拜且泣者斯固百世之遇也不然令五人者保其首領  
以老於戶牖之下則盡其天年人皆得以隸使之安能  
屈豪傑之流扼腕墓道發其志士之悲哉歟余與同社  
諸君子哀斯墓之徒有其石也而為之記亦以明死生  
之大匹夫之有重於社稷也賢士大夫者同鄉因之吳  
公太史文起文公孟長姚公也

明文海卷四百五十九



彭老峯銘 鄒元標

彭老峯公沒者十二年予近從友人所得所謂四合燕語者益公生平所殫精者也燕語一名龍門步響一名史館銍毫一名樂部片瑯一名藥林國老并之名四合燕語步響者公雖握鉛槧乎勃勃有投筆志庚戌北敵兵連塞下欲上封事不果隆慶改元又欲陳萬年書俱為達者阻益取法布衣言事遺意云銍毫者公最熟往事有獨知之契者斧鉞袞袍毫不少假借庶幾一時直



筆哉公跡遍域中境與心會輒有題詠而詠不全錄錄  
有關世教者片瑣志不多也又閭閻瑣屑耳目覲記備  
書無遺取國老各適於用之義公用心亦既勤矣初為  
諸生最有名常遊羅文恭聶貞襄二先生門墻二先生  
大器之七試不偶人以為屈不知公得一當其英雄慷慨  
慨之氣或摧阻風塵即稍稍自監沉酣六籍發為著述  
未必若是富且都也由今跡之公必不以彼易此吾吉  
文運盛時公祖父魏科聯第一時煜華而最恬於利水



厓先生官方伯繼雲根公不事生產家無遺殖所遺者  
古書數千卷以故公兄弟子姪發而讀之能知古作者  
用心公弟筆峯君亦詩書滿腹雍雍揖遜若先生者可  
謂善自遺子孫公可謂不負先生矣予高公誼嘉公學  
敬索公子元鑑狀而為之銘憶予初中鄉試公持刺謁  
予同儕憚公有心疾尼而不與公親也予時為快快今  
銘亦可釋予憾矣銘曰貌拓落國士之奇腹便便經史  
之笥獨抱遺卷系余之思噫



明文海卷四百六十

瞿幼真墓銘

婁堅

予友瞿君幼真年三十有五而夭其後八年祔於依仁鄉古江淩新塋萬厯歲丁未十二月甲寅也君諱汝誠幼真其字曾大父某大父某父為心疇翁諱某母黃氏生君兄弟二人伯曰某即塋其父母而以君祔且來徵銘者也瞿氏仕宋季世子孫散居於吳其在海虞者及華亭之上海市者皆同宗而嘉定之瞿則洪武中自上海來徙至於君十有一傳矣世居



松江東以本富君生而有異稟見父兄用服田益拓貲產奮  
曰吾獨不得為士人亢其宗乎成童之年即自知刻苦學問  
弱冠補邑學弟子員未有名乃遊杭州從專門經師學三年  
然後歸其篤志如此已就提學御史試御史果賞其文署為  
諸生第一君於舉子業能揣摩他人所好翫骹為之每  
當就試得旁郡縣所試高等文讀之即曰吾知所以與  
之矣已而果然屢不得志於京兆意頗怫鬱加以用工  
若積成羸瘵於是將一休焉而平居非書籍無以為娛



乃曰古今成敗得失之林具在諸史讀之足以自廣今  
經生之文殆欲充棟而一毫無當於用吾豈能終身作  
蠹魚其中耶聞邑有張茂仁先生者通古今好言經世  
之學即贅見而延致之與朝夕論說而君之讀史復如  
治舉子業之勤雖點畫音聲之偽必訂而正之不獨通  
其義而已張深念之嘆曰人性固不可化吾欲勸君少  
弛尚不能豈能令吾家更復勤也冀以諷止君而終不  
為改也客或以後嗣開君言某所有好女子父為官所



急謀嫁為人小妻以自贖方促膝語而張自外至客去  
問知之為言曰君且念無貽父母憂此事正當心跡兩  
絕耳君即時以其言謝客然至藝文之事進取之際往  
往獨行其意故其既病猶力疾再就有司試而卒以瘵  
死悲夫君事父母孝既踰壯每侍側色如嬰孺兄年二  
十以長獨持門戶使君得優游于學故事之加恭性儉  
素見人有鮮衣怒馬者即代為之慙尤不喜相徵逐為  
嬉遊至聞有好讀書學古道者雖其人或與世濶疏唯



恐不一當焉所以為贅幣餽遺之費畧無靳惜也君娶於沈所居鄉之望族也世多有顯者未及成子姓而君病以天以兄之子允晉為君後撫而教之庶幾終以慰君之意方君之讀書吳山也予遊西湖過訪焉問君亦數至湖上否君愀然曰吾去父母而羈於此將欲以得有為之榮也何心復為山水遊乎因引予至絕壁觀宋理宗所書見滄二大字且曰此先達茅公讀書處也予窺知其意為嘆息久之乃別又嘗偕試合肥還過京口



會雪霽未消與同行數輩往遊江上諸山予所至必陟其巔獨君能蹒跚以從因相與極論山川雄秀及六代之所經營皆弗成於大業而留為高皇帝興王之基至一時虎臣若俞廖之巢湖常開平之采石於茲行也皆得憑而弔之而想慕其遺風餘烈予以為如君精悍沉深使其遭時必當以功名自表見而卒困以天為可悲也因志其藏而銘之銘曰材也如弓受檠學也如賈欲贏孰虧其成而力與爭耶天乎人乎又孰於其生耶歸



爾之骨從爾考妣寔惟爾兄我銘以昭之俾後其有徵

朱濟之墓銘

唐時升

余友朱濟之內無治生之憂外無希世之意日與其徒  
奕棋飲酒未嘗有寵辱得喪之感身處薄俗機械在前  
戈戟在後君放言高論唯意短長無所避諱而利莫及  
焉朝廷之事薦紳先生不及知者君莫不聞當代閥閱  
之家雖其子孫所不詳者能道其所自家有圖史千卷  
名畫法書尊鼎玩好之物羅列室中良辰令節必致其



故人採擷名花之英徘徊美樹之蔭談笑傾倒非日夕  
不能風雨晦冥則焚香淪茗賦詩咏懷多至千百篇四  
方之賓客至者未嘗不留留未嘗不醉歲中不數數出  
戶偶過故人家必惓然一笑若自遠方來者三伏未  
至輒棄巾幘雖見所嚴事者袒裼相對無迎送之禮身  
不被風雨足不踐塗潦者殆四十年嗟夫人之生也與  
憂俱生富者患在多藏貧者憂於屢空狗當年之榮者  
營營如餓隸矜後世之譽者廩廩若拘囚若夫養志三



畝之宮放意六合之外曾無譏讒之累永保性命之期  
益千萬人不能一二也君十七為縣諸生性至孝友當  
其父對尊簿時君為條對始末庭燎燼熱衣及肌不動  
當事者以此重君事遂解散平居所述孝友之事意氣  
鼓舞若親舂糲鞠脰於其間者朋友有無唯力是視卒  
之日哭於其室者若失天倫焉元配張氏為安吉州守  
翬之女也通詩書能奕棋投壺恂恂如書生嫁未朞而  
天繼晉氏而養於其舅魏氏二姓皆崑山之甲族也孺



人恭順不如謹事姑嫜夙興侍立至中夜不敢傾倚見有所諄讓則顏色無主徐察其意者所在而解之及送終之日悲慙過甚宗族稱孝焉銘曰小而明經不及以顯榮老而為詩不及以成名然以是貽子孫之典則而陶冶其性情若令君逢時遇合丁馳驚於軒冕之途或與世之作者爭奇鬪麗於翰墨之場其為殘生傷性一也惡能散髮肆志以終天年而悔吝不生也耶大夢既覺孰得孰失當欣然一笑於太虛之表其視得之若驚



失之若驚者為何物哉

徐女廉墓銘

唐時升

余友徐女廉諱允祿年六十二而亡吳越之士推重其  
人以為海內寡二者益四十餘年而君顛躓困頓不得  
志於有司者殆亦四十餘年然其志節卓然自待以古  
之人造次不入非義博學方聞通古今事變識與不識  
莫不嘆息以為非濁世所有者終莫能泯也君之六世  
祖瑄官至中丞有功延綏為當代名臣子嘒亦成進士



至少參嘑生濯為縣諸生盡廢其先業為窶人濯生傳  
傳生應敏為君之考也為縣諸生君穎異絕人年十五  
就童子試郡守李公賞其文謂與竒童李名芳沈紹侃  
並驅三人皆嘉定人也是歲入郡學為弟子時已名聞  
四方後三年學使者謂變壞文體被黜特以年少收入  
社學自是文益竒一篇出遠近爭傳誦之謂為雲蒸霞  
爛紫鸞朱鳳翔舞霄漢間各欲延致之而獨不得一當  
有司之目後二十餘年乃獲一試京兆後罷歸時冢宰



孫公翰林學士馮公吏部顧公皆願交焉而王文肅公  
父子深知推獎謂目前無此人足數公者皆當世聞人  
為文章司命噓枯吹生齒頰所及立見光彩而君終無  
一言借其推挽亦有陰為君地者而君落莫自如自謂  
時命宜爾也君弱冠喪父家益貧半菽而食雜以藜藿  
為二弟婚女弟嫁皆假貸以集事已而有祖母之喪仲  
弟死有遺孤又喪其室人長子既婚而天有遺腹孫亦  
殤生人之慘酷無所不備而君阨窮中矯矯不懾高談



雄辨滿座推服性又好客客至輒留出其粗糲共食或不能飽君亦不以為意初余自郊外入城君時時止宿君與友人劉价伯談說經史余擁被坐與相酬答各盡異同率至夜分後余泛濫無常業聊以筆研自娛价伯兼通厯律堪輿陰陽術數別纂厯代事成書幾至千卷君獨表章聖經初為易說旁治毛詩尚書又理春秋三傳作史論自周威烈王起至元順帝止凡若干卷以君制舉之文而致身通顯誰曰不宜無何遭逢坎坷不得



與初學庸兒伍乃若參酌先聖之微言以垂將來固不朽之業也而其書出於淪落憔悴之人身沒之後誰復有知君者吾又恐其以覆瓿也子二人來京永邑長生二女未嫁飢粥之計未有所賴君平生常以義命自安若以他人處之有不任其憂者矣銘曰士不逢時一龍一蛇然唯世無知者故玉混於石珠沉於沙汝濂之文流布海內而學士大夫已採擷其芳華乃其終始齟齬抹掇以沒世人亦有言時耶命耶晚而羽翼前經其書



滿家後世觀之尚可想其人子孫保之勿俾疵瑕

陳大士墓銘

艾南英

公諱際泰字大士號方城其先系出江州義門自義門  
分入建昌雙井里數傳而有小五公者又自雙井徙臨  
川卜巖平居焉遂世為臨川人繇大士而上十世祖仕  
榮舉勝國鄉薦第一曾祖永厚祖金珂俱以淳德間考  
儀通五經及諸子家言少隨父客閩汀州武平教授其  
地號大師因娶於其里之鍾氏是謂贈母鍾孺人儀亦



以大士貴贈如其官大士生於武平象洞幼無師贈公  
得大士晚穉愛之尤不欲苦以吟讀顧其聰穎天授四  
子之書若五經章句聞而誦誦而解解而別出新意奇  
慧驚人其地宿儒名為淹雅出其下遠甚稍長竊模擬  
為文章所以能文章之故事絕嘗執語具陳氏三世傳  
畧中武平鄙邑無所用異物大士既冠而室乃決志歸  
臨川年蓋二十五矣歸而困乏不能為衣餼計居三年  
始受知於邑侯滄孺袁公督學太蒙王公補郡弟子又



六年而餽餽二十八年當崇禎己巳始終明經選踰年  
庚午始登賢書第七人又五年甲戌始以春官第二人  
成進士至丁丑始除行人官行人四年一奉差益藩再  
典試黔中最後護蔡相國國用喪而南以疾殂於濟寧  
終始四十年而出處之事畢矣然其為諸生特久耳大  
士曠代逸才眼高手捷生平以詣力佐其神悟筆下沉  
博宏麗途逕巉險不可思議掉臂軒眉孤行一意不為  
為故跡所封不顧世法世眼以振迅而興故大士之文



章道義意氣聲名鼓動天下數十年無能敵其響者而  
所及於當世之儒生士子殆志苦而功高老乃一第不  
獲竟其弘偉豈不痛哉且大士負經濟實用智勇沉深  
悉古今事變明練老成所抵掌天下大故必當隙會期  
可見諸行不苟為異同亦不屑屑於腐輩繩矩使國家  
能庸其少壯足有所委寄分朝廷一面之憂而困頓摧  
折之於彈琴寤歌之際顧若此何以徵大士大士初不  
意功名遲暮故其膽氣悍如能澹然於遇合通塞之間



不少芥蒂視一切矜炎競熱者胷中固奴隸之矣既晚  
達又不得上壽官亦不顯文止曰所云大士無從多見  
此真知傷大士者哉至若大士所微自見者於大士猶  
抄忽耳如戊寅建策平妖一事也已邠應詔陳言一事  
也戊寅之歲妖賊張普薇僭號峯山大士時以使差歸  
里普薇擁衆數萬震於其隣勢轟熾不可卒撲郡太守  
某臨川令某某不差講與走矣會撫臺解公視師至昭  
武大士發奮上密畫於軍府解公領其計曰解遂移節



盱江逼其穴而求之叛魁以其元饋焉散妖為民氛息  
平太守以下媿沮欲死大士功也臘冬大士報命未抵  
京敵已至內地崩七十餘城擄殺男婦生口百萬萬大  
士可以止而弗止也疾驅入都門憤憤對衆而言曰君  
父憂危而文臣工於處堂武臣拙於死難有識之士反  
噤亡以施奈何明年有詔諸臣皆得言方畧大士條十  
疏上之疏並留中予讀其疏慷慨激烈警切深摯語語  
破庸人之論惜其稿不傳予惟宋建炎間其大僚肯言



事而慷慨激烈警切深摯者無過宗忠簡李忠定二公  
然一䟽上黃汪輩輒以為狂高宗不省終至措國於西  
冷不復恢有中原大士喃喃崇禎之季豈異於此與夫  
以大士之志骨才識心魄而天不與之時人不與之位  
徒以老大傑特之氣談痛癢於庸人彼橫金尸素之流  
誰暇遠謀大士雖有喙三尺不嚙噓以死得乎嗟夫此  
國勢興衰存亡之所繇判也其幾見矣為大士者可悲  
也夫大士雄姿毅采英悍浮於眉宇聲琅琅如出谷鐘



名噪海外未嘗有溢志倨色以文章朋友為性命愛好  
人材稱引惟恐不及士有纖瑜必獎許播揚之使就其  
所長故世之學大士與為大士所拔濟而成名公鉅卿  
者無慮數十百輩善持議論微入豪出一往百折曲盡  
其波瀾宛委之致可令老嫗聽之亦令名流俊士遊適  
其中若高岸深谷不敢窮其所至冒勝舌舌勝筆筆勝  
千古非諛耳生平不喜講學不談禪蔡雲怡以二美妙  
天下欲與大士說微往返數千言竟不能屈大士而去



二書今存其一以觀大士灑灑落落固非目前講學談  
禪者之所得而裝裹斯人也予獨惜大士湛於經術精  
於史學而不得在中秘領袖諸賢以完一代之書具真  
實經濟而不得蚤遇俾居樞要若方面之任以展抒其  
懷抱區區用文人之雄取尊今後烏足以瞑大士哉子  
三人仲季以才著好學工古文詞磊落有高志知名於  
時大士瞑而無憾者乃此耳大士死時有四書讀四書  
正義五經讀前後制業近萬篇行世文集若干卷其半



久傳於天下其子編次其全部藏於家予思誌大士何  
易形容亦何可悉數然如張禮部采之序羅禮部萬藻  
之傳厥子之述詳畧相差法當並觀可以識其風雲銘  
曰大士之前無大士大士之後無大士以大士之志骨  
以大士之才識以大士之心魄而僅止於此天乎予負  
人乎予負仰聲名乎予負



明文海卷四百六十四

贈太子少保都察院右副都御史淳邱左公行狀

倪元璐

當天啟之世之稱楊左猶漢曰李杜也楊公左公相倚  
為義亦若鸛蜚駟虛然矣光皇帝彌留選侍李希封后  
不得及帝升遐哲皇帝即位既六日而選侍猶岵負乾  
清乾清者上及后所居宮選侍以上幼冲欲矯遺命正  
位垂簾母天下羣臣皆憂之於時楊公為給事中左公



為御史相與謀曰苟以驪姬良娣而攬雄盟之權禍豈止於歸胙寶鞍人彘房州而已乎先是左公先上疏力請移宮大畧云內廷有乾清猶外廷有皇極惟皇上御天皇后配天乃得居之今大行皇帝賓天選侍非母儀居正宮而殿下乃居慈慶不得致哀几筵顛倒乖舛不可之大者也疏上楊公繼之於是有旨移選侍仁壽宮上還乾清中外始大安當此之時以前光皇帝登極詔收召天下名碩充廷盈位銓總佐則趙公南星李公騰



芳陳公于庭總憲相繼則鄒公元標孫公瑋高公攀龍  
總垣則魏公大中總道正協則袁公化中周公宗建考  
功則鄒公維璉程公國祥並矯志澄清誓言必濟小人  
挾異議者大懼乃日環謁者監之庭而請焉於是魏璫  
忠賢怙寵用事而御史崔呈秀憾高公攀龍給事中郭  
鞏憾周公忠建內閣魏廣微憾魏公大中羣憾倚連摩  
厲須割其時楊公左公並為御史中丞兩公又相與謀  
今京貫連串指鹿日甚天下事不可言於是楊公先上



疏列忠賢二十四罪左公繼之草三十二斬疏未上而  
謀泄於是小人為忠賢謀矯旨斥楊公左公並為編氓  
既以逐二公為端於是譴正人無虛日其既盡小人又  
為忠賢謀置獄如宋同文別立私人為提帥長四出捕  
騎首逮楊公左公及魏公大中等時左公居桐詔始至  
公如遇其素期者容詞閒婉而桐數萬人哭且譟聲言  
必格殺死者公急呼諭之乃止數萬人又人出辦香禱  
於其里之神祠又數百密齋糧欲從公伏闕者至河公



始知辭之不得至欲自引數百人乃大慟而返其時道  
路為沸聞楊公之出應山也亦然小人乃益忌且懼又  
為忠賢謀必急殺兩公左公至詔獄坐妄議移宮為首  
辜吏子詰何以受遼撫及屯吏金公愕不得對既而笑  
曰誠上獄上飛賊二萬厲刑比追勅五日一具奏既拷  
掠垂盡乃書絕命詞著茗器中示其弟孝廉光先及子  
國柱等曰辱極污極痛極死矣死矣如二親何卒之日  
長虹亘天里中星隕如斗光煜煜然公既死而外大吏



承旨徵賊愈厲公家貧盡籍田廬二十不得一併及昆  
季宗戚三族十族之財俱為公盡子姪繫獄者數十人  
於是太夫人與其伯兄相繼死弟孝廉不敢赴春官危  
者數矣封大夫且死而蘇卒病痿得禍之酷古未有也  
而其時楊公同日暴屍廣衢吏籍其家不遺一椽太夫  
人七十餘至寄居城櫓其明年今天子御錄殛璫及其  
黨誅竄有差詔褒遺忠贈左公都察院右副都御史再  
贈太子少保官其一子予祠謚忠毅與楊公等云史元



瑤曰璫亂戮士至漢建寧明天啟而極然自其所執之言以量其智愚魏忠賢者亦安得比於曾節王甫乎節甫之誣君子曰是將為叛以叛為名掩而殺之其正也今之為詞則以三案三案者注誠震器雪痛鼎湖即如此何宜可罪夫家駭而索賊親死而咎醫者其情也今日賊不可索醫不可咎是為有罪猶曰是常嚴治其家而孝於其親為可殺也凡此皆小人之誤忠賢小人固亦須讀書也且夫小人既以異議取絀其勢不得不報



君子然而昔者君子之誅小人遠之而已而今之小人  
所為報東門之役者至於掩捕拏戮不已毒乎掩捕拏  
戮小人之已甚其在君子則亦有幸也蓋以今之小人  
倚璫猶不如宋之小人倚荆國耳故為三案之異議者  
自其持之何必無銖黍之義一倚璫而盡沒是故今之  
君子為易辨也若夫篤學貞志正骨孤情霜清電明霆  
決颺烈即漢膺密未有能如楊公左公者矣三案之立  
義始於挺擊中於紅丸終於移宮此以楊公左公為後



勁三案之承禍始於移宮而挺擊紅丸以類而求之此  
又以楊公左公為權輿流覽三朝上下五十年之間而  
不叩樞建於楊公左公又烏可謂之能知世務者哉楊  
公別有傳左公名光斗以生之辰月宿斗故以名字共  
之別號浮邱又曰滄嶼生時赤光滿屋九歲能屬文作  
粥賦十四作瑞麥賦公父碧衡先生嘗語人曰吾祖難  
當公以佐唐命封王爵世祠於涇長二公自國初由涇  
徙桐活桐人無算而近則吾大父及吾父並多隱德宜



有顯者其在是兒乎年二十六庚子舉於鄉又八年丁未成進士兩舉皆第十一人天下甚誦其文授官中書舍人久之權監察御史入臺謇諤有聲尋奉命視屯公以北人不知水利畏言屯田勝國初倚漕東南至以御酒龍衣求米張士誠今不改謀後將無食乃力請屯田又請做漢力田科以屯入多寡為殿最使人自為屯又請置屯學設博士弟子員因屯糧制餼詔俱報可於是屯功大興其年入穀數千斛季年倍之鄒公南臯道見



之嘆曰夫治天下豈不以才哉人苟有才天氣地力皆  
可得而變也往三十年都人之視藁秸猶扶桑也而今  
畝棲若此嗟乎當是時神皇帝不豫璫劉朝等矯東宮  
旨索世廟戚畹絕庄公封還不啟曰天地皆殿下有今  
日御史受命巡田安敢以田私進奉乎璫大恨去已又  
糾巨璫陳登奪子粒為屯臺璫當按一時咋舌曰真御史  
真御史云亡何改督學政獎才絕蹊倣古弓箭社遺意  
教士習射士皆能挽強於是以爭移宮聲大著遷大理



寺丞尋晉少卿又晉左僉都御史履虎得咥以及於難  
云公有深識是其力所由生也嘗言元祐去亂法不去  
亂人此為大錯又言李伯紀爭事不知爭人事失易救  
人失難回又言近見官府鈎連魍魎畫現以宵小託婦  
寺以婦寺釀厲階凝陰感召大亂日生原其本來皆由  
穢濁故徵人以品徵品以清凡此數言悉徵學問知其  
擊奸琅琅非由氣激者矣生某年月日卒某年月日先  
後娶某某子姓男女具詳家乘云



黃子澄先生墓田疏文

宋 榘澄

夫道生天地聖人備道於身為兩間之陶冶非特嚴其父而慈其母故堯舜孔子無名亦與天為一者耳下之或履堂與而成君子或率本來而成節士蓋任五行之偏行五行之一於是上極星辰下抵河嶽紛然相等數矣若夫志士幽閨或激於恩仇或溺於情欲挽日飛霜移山改物譬之子庶執偏強父母以必聽而莫之禁止者父母中和之心慈而子庶執偏之心誠也況乎任其



偏以行其倫造化猶將避之孰敢較量哉當高皇帝鼎湖之日黃先生首發晁錯削國之議用開文皇靖難之師及義旗南向自竄於吳將航海外邦甘心不逞跡其行事信迂遠不情所謂動稱古人而行不掩焉者也其亦狂者之儔與然當其慷慨就戮真有薄天地而恥鬼神之心使其偷生惜死少能委蛇於文皇其寵遇功業豈下於李楊諸君哉嗟乎妻子牽裾干矛繫頸恩威亂前利祿眩念有能視死如生食馬不避陷然之氣信上



可以無愧於九天下可以無愧於九地矣先生就執於  
吳之日二子匿於民間已而委中武臣執之以獻文皇  
帝赦不問至仁宗世始得攜喪瘞於吳中某山今皇上  
即位之四年其孫與隣人爭墓訟於縣縣尹申君令吏  
視墓吏至適霹靂擊其墓石裂吏驚告尹尹至墓令人  
從裂地掘下得碣石乃啟於憲副某公開府某公遂請  
於朝建廟於府城隍之左春秋兩祀焉夫武王伐紂夷  
齊切諫而武不以是貶王故文皇帝曰子澄在雖朕將



庸今天子賜祠之意與文皇帝寬仁之言有不合轍於  
武王者乎竊嘗論之先生之死於建文足以益開蒙之  
非於文皇足以抗征誅之義其精靈英爽千載如生是  
以數百年之後猶能為雷霆風雨之祥其與子胥屈原  
之怒濤何異乎昔衛輒之難夫子不以死非其道罪仲  
由則死於建文者又烏得深罪之也噫先生雖不得預  
於中和其亦秉五行之偏以行五倫之一者乎計祠墓  
所需終歲不過二頃之入凡我衣冠惟力所能惟願所



樂不惜捐貲助其營費庶司祠者因有業而守固受享者因有守而神寧既不煩天子之詔令亦興起百世之人心誠君子所樂聞而世道之急務也用列其所由如左

明文海卷四百六十六

曠父山墓銘

邱元標

元某體孱所至必訪名醫癸未而得曠君于都下甚神奇又最後而得梅坡吳子庸周子思蘭易子吳



嚴州人余相國客周濟寧人張相國客易臨江人趙蘭谿客三君皆有醫書行世然各有勝負易以脉勝方則苦跌盪吳主補周主涼隨時調劑不拘一方獨易山君勝然君不與一時諸庸醫角短長通靈樞太素玉笈等書聞與隨嚮輒應諸庸醫踟躕謝主而去君從容談笑立使人有起色庸醫以為不難收功奏效者君曰不然後竟不然如此類者甚衆多不可紀太守汪公習君延為九邑諸醫師君嘗嘆感語曰彼以不專之心欲竟不



傳之術良難遂退老于鄉享年七十一而卒叅知劉公  
曰君不但以術勝至與人忠信臨事識大體絕不為兒  
子媿阿俗媚態少困偕弟治舉子業既從醫而縱弟學  
弟學成而天不勝哀悼孝友有足傳者俾君不得竟其  
施可惜矣君曾拜太醫院吏目所著有家抄便方二書  
刻滇閩中君存予倚君為生君亡予欲以身寄命于天  
故思君而為之銘銘曰

古之至人隱于醫者其跡多神奇君精爽或不止于斯



予終不得而測君之涯知已寥寥敬勒短辭以寄予悲  
君知乎不知

明文海卷四百六十七

外史張公墓碑銘

張綬

嗚呼此句曲外史貞居先生張公墓也南屏之右西湖  
之陽梁題玉鉤澗度靈石路披篠樹隰帶烟霞石室藏  
書碑文紀事其形雖逝其神則存翰墨在人文章垂世



儼然生氣之張皇馨歎無聲周旋滅影穆若太虛而示  
寂開元精舍久無繼續之賢勾曲貞居全乏訪求之彥  
遂使墓門荒翳兆趾崩奔松柏摧新莫設時樵之禁身  
世何物曾罹夜客之侵痛茲劍躍雷津慨爾硯離玉匣  
既往何咎將來可圖曠世而默契乎心尚友而景行前  
哲爰合佳士聿來嗣人即冢土之增崇求體魄之綏靜  
其灌其柩予以植夫美材有紀有堂予以開夫幽隧不  
有伐石將安載詳是欲喚起今威再迂遼東之白鶴招



還曼倩同瞻雲外之青鸞第恐紫極高樓罔由下邁自  
謂黃中密通端異旁臨先作傳以述夫始終翌珉是託  
復贊銘以紀夫歲月彤管庸書銘曰

於厥張公天雨伯雨是名是字蚤曰貞居晚曰外史厥號  
不一幻仙亦爾文章闕古鑿鑿蓋蓋書法俊逸不邕以  
止樂道忘我人莫之訾相靈石澗爰基于此有峯而爰  
有水而駛喬喬者林盈盈者芷迥絕風塵攸驅虎兕以  
巖為局以雲為峙朝烟夕霏紆青委紫時遠世異毋惟



顏杞聿增修之屬後來士於厥張公克具衆美周昞之  
學洞究玄旨獨立羽化匪忽焉死光華曷居天漢之溪  
誦予銘者式味妙理矧嗣教人其不興起薦溪之毛挹  
齋之醴公恒賁斯以陟降只

謹附碑陰先後贊語  
先曾祖侍御穀庵先生尚友勾曲張外史嘗為文勒  
石表其事曾祖卒碑卧予家者六甲既周矣嘉靖乙  
亥秋七月增如杭遊開元宮見道士范玄智字希仁  
者胡勾曲五世孫也言及碑故希仁以請增許之是  
歲冬增丁內艱未暇如諾越明年季秋希仁來弔中  
請愈恻又明年季春乃克昇碑以往碑樹勾曲墓畢  
吾先人志焉嗚呼百物顯晦數懸于天茲理克立當



自有時堦何容力乎故贊教語以識歲月云嘉  
靖二十年歲癸丑二月望嘉禾姚堦題識  
年丑歲碑將舉行會後故稽留自是十二年來  
滋多弗遑畢事於丑秋更訪希仁甚已及差懼  
期且見布仁嗣孫沈如愚頗可終志結言而歸  
是冬十二月之吉勉力奉往嗟乎日月易逝茲  
卧復越一紀之餘而始克顯立其間可感慨者  
詳也因再歲之嘉靖三十二年臘月前七日  
于雲漢之陽

明文海卷四百六十八

微道人生壙記 陳繼儒



修微姓王廣陵人自幼有潔癖山水癖書癖自傷七歲  
父見背致飄落無所依眉嫵間嘗有恨色已奉竺乾古  
先生之教刺血寫小品經間讀班馬孫吳書人莫得而  
狎視也嘗行靈隱寺門見白猿坐樹端迫之展翅疾飛  
去包圍夜半有兩炬炷射牕縫上諦視之虎也修微挑  
燈吟自若其詩詞娟秀幽妍與李清照朱淑真相上下  
至於排調品題頗能壓倒一座客慕翰墨者輻輳案前  
如農訴水旱修微攢眉應之擲筆出避西子湖避鄧尉



山避廣陵尋獲兄指其父埋骨處仆地哭失聲延僧作  
水陸道場凡十五日以薦父靈筭中綺繡環瑱隨手立  
盡矣修微飯蔬水布綽約類藐姑仙筆牀茶竈短棹逍  
遙類天隨子謁王樞于太和參憇公於廬阜登高臨風  
飄忽數千里智能衛足膽可包天獨往獨來布帆無恙  
既歸出楚游稿示余冰雪淨其聰明雲霞汰其粉澤抑  
名山大川之助于修微曰自今伊始請懺從前綺語障  
買山湖上穿容棺之墟茆屋藤牀長伴老母豈復問王



孫草劉郎桃蘇小小同心松柏哉子曰今君才貌兩艷  
人間所擅出世之盟將毋太早修微曰嘻是何言孔雀  
金翠始春而生四月而凋與花萼相衰榮每欲山栖必  
先擇置尾之地然後止焉然禁中綴之以為帚璽中采  
之以為簪甚有烹而為脯為腊者色可常保乎鸚鵡馴  
擾慧利洞曉言詞官家奇愛之或教詩文或授佛號而  
未免閉於金籠搏于鷲鳥則韻語又可常侍乎予歎曰  
常情仕諱歸年諱老而修微少不諱死死不諱墓昔者



淵明自祭樂天自銘司空圖引平時故交痛飲生壙中  
三君子以後鮮有嗣續高風者修微達視死生如晝夜  
寒暑之序女史乎女俠乎一變至道矣生壙成諸名士  
為彈孔雀經一卷供鷓鴣舍利十餘粒并穴置其詩稿  
百餘言眉道人為之記

虎邱合葬三姬墓銘

陳仁錫

高仲子姬教十二娘墓銘

姬臨清女也昨事仲子今侍天妃

卒天妃宮

葬于虎邱七十



日爾姬美而敦禮三五在東游雲散之悲夫余仲子友  
也既卜葬歲一享坡公曰豈伊無主仁人君子斯其主  
矣否否流水蒼山無非主也系以銘銘曰

舍爾貴竹酌茲三泉山藏古寺劍靜淵澄白雲欲歸青  
松半筵永寧貞魄鐵花秀巖何以比德潭影離烟

前郡司李某公二姬墓銘

姬不以喪歸久露命也俾與教姬姊妹見永結泉好二  
姬主教姬賓風雨欲來梵唄亂鳴借問千秋孰主孰賓



余既職祀事無所辭銘銘曰

行即此路遑分先後今夕奚夕明月在天一行秋鴈環

佩遊仙芳魂落日幽寄遐仙長留一道堤上春還

白樂天詩

久住湖堤上  
長留一道春

高仲子諱梁楹字明柱黥之行義孝廉教姬年十八

葬千頃雲下

司李某公二姬姓氏無考柩寓禪室有年茲合塋教姬  
墓傍距數武相地視葬司松楸者山長張君天和也



孟秋二十八日莖教姬越明日作合葬二姬詩以酬之

其一

繡屏曲曲掩回文冷落空箱白練裙江上彩雲秋共長  
欲寄芳杜弔湘君

其二

露萎蘭芽冷玉階水萍離合總天涯休嫌花事須臾盡  
相逐南征有鳳釵



其三

蒼霞片片玉為阡  
幾瓣花飛點翠鈿  
誰謂紅顏嗟薄命  
劍池流水自年年

其四

翠雲千頃鬱松楸  
寂寞三姬傍一邱  
夜靜月明連袂出

可中亭畔聽吳謳

萬曆丙申  
七月既日

明文海卷四百七十一



明奉直大夫協正庶尹刑部四川清吏司員外郎

近邾何公墓碑瞿九思

嗚呼此吾友蘄水近邾何季子之墓始余九思過不自  
量謬欲引三極爲己任既筋骨小厥任重鍊幾覆則微  
聞旁郡邑又有欲爲厥瞿生所爲者余咄咄嗟嘆曰有  
是哉斯人之迂宜必不然則走而行到蘄爲向風而聽人  
言良然則余又仰天長嘯曰茲事體大余慮弗克盡  
負荷以皇天后土之靈寔是式靈之此勢必更它得一



人乃幸可足吾事吾今茲天幸可稅肩卧矣然視聽頗  
貿亂終不敢甚信聽何季子既壯則日益有休聞國中  
壬申夏會攜李禹門姚先生以良史材出督楚學一日  
行部黃則余與何季子並舉高等兩人從國清源門望  
見各相視而笑遂爲石交久之余竊見何季子負抱大  
蘊藉閎吾終不能及請兄事何季子然陰自仰天恚恚  
曰既生余又生何國有人吾不敢復負荷天下事復誦  
讀天下書矣明年上新即位是爲歲萬厯癸酉何季子



遂與余並舉於鄉名爲同年友以此我兩人日益親洽  
明年上春官季子遂成進士余以謝罷歸當別去則相  
與往造適長安酒樓爲取一巨觥自謫罰而因奉金叵  
羅一爲季子壽取國家事咩稽首而屬之余拜季子亦  
拜爲涕泣蔽面下相顧視拊其背足下好爲之吾不做  
矣其後吾適得罪適之不意凡受繫以一年所久之乃  
去而投塞逮再上先大夫丘壠則何季子在四方余從  
茅茨中微聞問季子所行事既已奇而每從四方縉紳



大吏問季子所郡治狀暨若郎曹舉措如季子即令  
在田間豐草長林亦非必有顏色即薜蘿麋鹿亦非必  
有聲氣況復乃可以死吾請囚衣冠跪庭中與詰問三  
數日問公所以當捐棄何罪如其不能對簿我請得批  
其頰而唾之乃今上博採廷議修舉曠典用吳康齋故  
事見召余余馬首過從滹川相與驗問季子安在其鄉  
人謂季子已棄置我去第未莖不然者且墓有宿草矣  
夫生非金石其孰能老不死然亦必三極功畢已成夫



然後乃可死彼近邾者何以死而我乃尚得苟形顏得  
偷幸旦暮豈漢以上之事公爲政漢以下之事我爲政  
公故勉爲其易者而遂以其難者詒我乎哉按狀公諱起鳳  
姓何氏何故著姓父南陽公以嘉靖辛丑六月十有八  
日生季子假設令它人載筆此必叙季子方幾歲輒不  
爲羣兒嬉戲或岐嶷云何或設俎豆云何吾謂季子故  
上天所賦畀材品大此自故常事無足深彌道說我所  
論獨欲論其最大者上誠神聖然天下顧盡不知前時



爲宵人所熒惑即如權稅事上誠不能自爲解即臣亦不能爲上解說然余則獨深心曉上誠聖人曰聖人則不當有礦稅事蓋旦而思暮而思至不能假寐者以旬朔許乃博取一部十七史坐而讀當宋神宗稅間架鬻古帝王祠廟則豈不爲古今一黷貨人主哉卒其後於熙寧某甲子則捐給十萬緡於元豐某甲子則捐幾十萬萬緡夫然後議者始大愧悔以爲我前是所論列非是然後日夜尋求其說而莫得逮最後始曉知帝意



在復燕雲十六州故寧以其身受天下垢辱終不肯自  
白有言者至則放棄之擯落之於是海內愈益交口以  
爲殖貨至萬世後夫然後宋神宗所以爲英主始白以  
我陛下之明睿千秋百世後豈不會有知者而世莫可  
與莊語則上即神聖將安所自解免以上之轍朝講不  
躬親郊廟主爵大夫以缺官請以遺佚請假令上適恭  
默思道而於四方事未及讀則天下視上爲偷惰以  
故諸賢者日上書危言之公車之牘日幾滿一尺非朝



講則郊廟非缺官則遺佚上日徙倚行步至明光宮取  
諸封章陳置几席上爲挑燈而讀之咄嗟嗟亦倦矣何  
季子即號名慙不阿然當在比部時所上封事則亦寧  
能越前是數者而他有所論奏然其所不可及則大要  
在以輟朝講罷郊廟疎君對廢遺佚一切盡歸於權稅而  
又以權稅歸於心乃復奉迅雷風烈因天威天怒監而  
臨之余嘗讀虞書二典即雖以二帝之明聖而尚未露  
見端倪及心乃好生之德洽於民心自率陶始創發之



而帝舜遂延引之以爲人心惟危道心惟微之旨與精  
一執中交相授受即餘姚之學亦第得其微旨以爲良  
知而餘姚遂以千載顯與聿陶邁種德見而知之者不  
啻合轍今季子仕宦至刑部尚書郎此即古聿陶司寇  
職任而所上十二事疏乃獨舉本心爲旨將無此心學  
即從自聿陶來哉且季子又獨不於此已耳今夫天斯  
昭昭之多方穹然在上何與季子而季子必欲作筭理  
明解以弧矢法上測天以勾股法下測海已覺尺寸微



差殊又復作筭理切近發微與余作歷正旨微今夫地一撮土之多方塊然在下何與季子而季子必欲作地理書取三極相撮而論乃其中則爲人季子即仁愛亦豈能必百千世溥海內外即盡無顓蒙者而季子必欲作斷易啓蒙令世無冥行者即百千世後溥海內外亦豈盡無廢疾者而季子必欲作針灸教經自漢魏來世多爲耳目所熟習不信針灸祇深心信草木業所從來遠而季子慮萬世後容或多疲癯殘疾故復作此書傳



千世夫上及天下及地中及人間世似季子於人間世已  
無所復事事季子不大歸而他又何爲哉余嘗誦之季  
子之行已事上有子產之恭敬其令葉有葉公之近者  
悅遠者來其領國邑有公叔文子之貞惠文其再守廣  
德不啻十年不見之趙卞七邑重迎之張詠至天心仁  
愛疏既上上大震怒幾蹈不測同舍郎某公某公卒耦  
俱得罪而季子竟以身免斯又甯武子其智可及而其  
愚不可及抑或者天地之大德曰生季子業知仁仁固



無死道不然當時同舍郎業連頭罷去乃何獨置季子  
不問也季子做范姑蘇敦睦事置菽田如干爲國矜式  
從子弟月人幾十斛以上旁族姓月人幾十斛以上又  
錫類至國人率有廩餼亦可謂誠極慈惠極孝友然在  
他庸衆人則當極稱之如季子吾不謂奇自不當置喙  
豈季子於人間世事頗可幸已畢獨霄漢上或容有  
闕員以故遂趣裝亟去乎哉他如今中州令閩守廣德  
諸善行及所生歲月日時與子若孫名氏出處自有狀



余不論此特論其最大者云爾蓋季子卒可三年所而  
余不佞始至益余至不畧刻而公冢孫彬然遂執贄造  
請爲弟子夫彬然博雅藻麗翩翩佳公子有西京大厯  
風且追軼鍾王即無余百輩何缺渠要亦以爲天壤間  
非不佞無足與叙說大父者慮失實然則公孫誠仁孝  
此詎非天所以報施季子者歟余用是大書於豐碑令  
百尺樹青天以告千世



明文海卷四百七十二

金此川墓銘 鄒元標

金隱君者永新人也名統和字太乙別號此川終萬曆  
辛丑距生嘉靖壬午稱八十翁矣有子光弼為世名士  
泣而告余曰光弼稍知慕古皆先大人力先大人日盼  
盼期光弼成不啻農之望歲而今已矣乎所不朽先大  
人泉下者惟先生是賴鄒子嘗心知金生而又憫生之  
不遇也敬諾之序曰金故永新鉅宗云其先為休寧汪



溪里人高皇帝下金陵駐新安樹旌幟白者民而赤者  
軍金之先有彥恭者遂立赤幟從余總兵鎮江西留戍  
永新世為永新人數傳為石崖翁石崖有子曰忠江君  
忠江君有子六此川公其長也公幼負奇氣十歲覩石  
崖翁倩人作書公內自傷慚遂發憤閉戶讀書不輟石  
崖以誑誤置獄有沈令者物色公於獄中遂與定交問  
公曰有子學乎曰有孫見公於沈而沈大器之公終沈  
身不出試沈去乃出試而首諸生公之為諸生也最有



名顧奇於數至六十始謝諸生籍非遇矣石崖翁有西  
昌理公徒跣赴訢崎嶇巖谷中者日一百里歸而覓舟  
扶石崖翁歸風雪颼颼為翁禦寒具者備至是時公年  
尚幼也翁曰吾有孫如此更復何憂石崖死所更娶梁  
孺人者公事之二十年如一日終不以異祖母故而有  
二心忠江晚而病痿公事之萬方將終口囁嚅欲有所  
屬公跪曰大人得無心季弟乎忠江公首肯公跪曰季  
弟吾弟也所不如大人者如日忠江悅而瞑卒為季完



娶如禮所以撫諸弟綏和繼和者有無與通即諸弟不能盡心公不計也祖母劉堊已久而公以夢徧告家人曰地不吉諸不信開視之久為水浸矣公獨禮堊之讀書在古寺夜有扣門聲者公視之無有晨遷邠外寺矣此兩者或曰公神故通通則有神物預告之公異人耶鄒子反覆公狀而有遐思焉吾吉欲哀揚其親者其先人足未踰講堂耳不聞良知何其子嗣輒連篇累牘以為其先人學於新建有聞若曰舍是無以追崇其先



人者問其裋躬又多敗闕公不聞哆談何若而所敦惟  
孝慈友義節烈事光弼於道浸浸不作章句尋討其狀  
公亦絕不如世之裋顯其親者亦據公倫常事彼誠知  
倫常之即道也然予問公之鄉人亦謂公嫉惡過嚴且  
多隱行有光弼所不及載者予聞之益喜無愧辭矣嗟  
乎彼謂新建未入吉虔時吾郡遂不聞道乎無論諸顯  
達者隱德名儒老於牖下不汲近名如公等者益班班  
可數已予惜吾里人以求名之心求近道而昧於曠識



也公父子間得予心矣

銘曰其心純其行恂隱士耶天民耶有子而文公志其  
將伸耶世好以良知尊其親者聞予言亦可以破迷津  
者耶

明魯山主簿吳公墓表

趙南星

吳公以壬寅八月往為魯山主簿至癸卯二月卒於任  
其士若民無不流涕靈輜北歸無不設祭遠送鄰邑曾  
見之者無不歎喟以為天道不可知云吳公名尚綱別



號望峰世為神武右衛魏家人口父曰希康家始富有田七十頃公少而讀書為諸生父老以家委之乃入貲為太學生修父之衍世其勤儉田多至百餘頃居家孝友父早歿與弟尚朴同居金錢由其手絕無私藏為弟入貲為鴻臚鴻臚病狂易所以瘳之者萬方不效則為之立真武廟於所居之西南蓋鴻臚嘗至其地畫曰可作真武廟公遂因其意廟焉欲以獲福佑竟不起子文藻甫離襁褓公慈之如子及長折箸悉以好田宅與之



公溫仁謙謹見者知其善人也福人也姻族鄰里之貧者以告即賑之無怙色貸即予之負亦不言凶年所全活甚多役不能墜者為墜之無墳者割地予之其不逞之徒或恐嚙詐騙公皆如其所願未幾有敗者終不以為快以是愈富人愈稱之公初無仕進之意晚年乃曰吾亦將出而稍効職業以行吾志矣或曰作官勞曰吾居家亦殊勞恐州邑小吏猶間也遂謁選得魯山竟鬱鬱而歿蓋是時令魯山者為杜和春老而貪其貪又世



所布聞受取無所不至能為屑銀恒衲襦衣脫冠冠皮冠覆頭及面有孔露两眼手鼓索其點汞之藥取諸婦人聚穢處娼家大擾銀成以收買市中諸物送之其家每與直四分之一又贖銀民無不唾罵詛呪者然上官以其起甲科左遷又相識多皆佯聾民無可奈何吳公至今欲吳公如往時主簿管錢穀多收羨餘益其囊篋公不敢加毫釐又欲急於完後者扑治之公不從訟不論曲直皆罰鍰不即欲者扑治之公惟論曲直又不罰曰吾



民貧吾不忍也令則謦謦呶呶以主簿不任事公乃仰  
天嘆曰今天下一千百有餘縣而吾正得魯山遇此老  
而笑歟者何哉無疔發於頰而歿公歿後為大計之歲  
百姓皆發令貪婪事告之上官計偕後告之猶五十餘  
人點未之事聞於長安談者無不絕倒乃始罷官以去  
昔班叔皮續太史公書載鄉里人以為惡戒以世所公  
惡不容避諱况非鄉里者乎余是以表吳公之墓書魯  
山令事吳公在魯山僅五月而民思之公歿而民以公



憤告令去公可謂有功於魯山矣官之賢不肖固不在  
宗卑久暫哉

明文海卷四百七十五

祭李司徒文

丁薦元

維天啟三年癸亥冬十月舊淮撫李公以南司徒將正  
冢宰之席奪于中旨當軸以故事爭之亡何司徒不起  
矣舊客曹故鄣丁薦元聞訃為位而哭如禮明年為甲



子春二月朔越某日乃以辦香束帛遥寄莫通州將之以文曰嗚呼小子竊嘗俯仰古今反覆邪正消長之機而知大功之難居也盛名之難竟也蓋不可測者物情不終蝕者人心猗歟先生命世雄才震古奇氣當江陵之驚悍先生怒目瞠視幾捋虎鬚蒲州抹時辣手賢者盡入網羅先生獨發其欲逞之奸萌以致外謫而不顧世以氣節皮相先生不足盡先生也迨礦稅蠹起虎而冠者橫行中原而先生隻手擎天神謀蓋世談笑而誅



陳增縛程守訓一時羣小縱橫埋輪請劍之士幾以九  
死殉而先生仰射天狼立掃雰翳剛柔並用身名俱泰  
江淮數十里間得以安枕無虞者誰之造也真千古豪傑  
哉至若馮太常緹騎之難郭宗伯妖書之禍白日震霆  
賁育奪氣先生九死不避千金一擲且驛馬不絕于故  
人餽問時勤于落魄節俠之氣庶幾古人而世乃略其  
肝膽而訝其揮霍不亦鄙乎已而討四明發婁江陰謫  
而聲其醜聯絡山林朝守之賢盡歸索綯先生明目張



膽中外快心得意之日正禍機所伏也名重太山身危  
累卵假令列先生于王恭襄喬莊簡之列其險夷醇駁  
淺深大小吾不知所甲乙二十年來合天下小人猛力  
攻先生不遺餘力然而白先生心跡者即在讒口何以  
明其然也首坐先生者賍私鉅萬然所勘不過借皇廠  
皇木二事即劉太僕亦以為不足蟻先生他可知也坐  
先生以黨者東林已爾東林之冤白賜卹賜環者彪炳  
宇宙矣公論所最不齒者莫奸于四明莫險于龍威莫潦倒于德清



莫橫于中貴此四者之黨悉與先生為難明為先生白  
心跡者也近年來所合謀欲殺先生者莫驚于熊經畧  
莫毒于劉太僕太僕以通謀敗矣經畧以逃重辟矣凡  
為婁江四明崑宣楚浙諸小人一一蒙不韙之名則先  
生自處不言而定矣雖然向之忌先生百計謗毀皆小  
人也不足辨也天啟數年微不與先生者其人君子也  
同一君子而作用各有不同一片深心反中小人之計  
不可得而解也辛亥以後阻先生之出令不得終其令



名先生之名故在也邊事債于債帥喪地數千里駢戮數百萬騷動海內如黔如蜀如滇皆因三方布置之說釀禍無窮竊謂此際非先生霹靂手不足以坐制三韓彈壓遼鄙九廟亦式靈焉即先生時攘臂發憤願捐七尺以待終不得出而一展其奇假令羣小以傾陷先生之精神制首何不可滅天乎冤哉可為痛哭流涕者也先生嘗寄近作數首忿忿時事一念忠魂死而猶未泯也昔武穆抱北伐之志死乎檣賊忠肅成迎復之功死



於武功先生猶得完名餘年白首牖下幸矣嗟乎嗟乎  
先生垂沒而得留司農之旨則朝廷之于先生終始無  
負也天亦不負先生也小子狂慙平生止一面先生先  
生所以力為洗滌援手于衆人欲殺時耿耿一念總為  
梁谿梁谿先生一生精神强半瘁于先生小子不敢以  
衆口諭訛殺機橫熾諱避縮舌不忍負梁谿先生也先  
生會梁谿九原執手道從前世氛及平生心事可以瞑  
矣可以瞑矣



古陵坡弔古文

黃鳳翔

正統間江西劇寇由永春向吾郡勢輒張甚太守熊  
公尚初率民兵禦寇卒遇戰于古陵坡時衛將觀望  
不至我兵敗績熊公被執不屈死之晉江主簿史孟  
掌陰陽訓術楊仕洪亦以身殉焉余遊安平經茲地  
遙感往事愴然興懷爰為文弔之

嗚呼噫嘻茲地曰古陵哉層岡陀岸宿莽荒坵棲烏舍  
咽潛狄吞聲濃烟晝晦燐火暮騰行旅躊躇而縮步征



馬躑躅以悲鳴與僕相與指顧偶語曰異哉乎曳霧朱  
幡浮空熊軾旖旎搖颺交馳四陌是何祥也乃令人眴  
目怵心遭迴棹栗顧望怵營厯隤愴惻耶繫昔黑山聚  
蟻綠林揭竿狼奔狶突蹂躪閩關嬰孩懸梁村堡摧殘  
矚我孤城黔蒸膽寒爾其虞四郊之多壘坐黃堂而蒿  
目陳師鞠旅建牙豎纛組練揮虹勁弩貫驚躬介馬以  
前茅約屯帥為犄角已乃梟鳴營樹星落郊陲右軍迷  
道樓船失期狡兔潛伏駭虎猖披旗靡轍亂矢竭鼓衰



羞投衡而拔旆，猛裂瘡而含吮。遭還淨之見獲，恥改館以賂免。踞坐罵賊，旁觀泣泣。吏士感憤，怒目攀轡。九原同歸，白刃可踐。委忠肝于藤蔓，蒙貞魄以塵沙。天淒涼兮，閭閻人慘疼兮。痛嗟紛迸，淚兮零雨。招遊魂兮，悲笳鳴呼。自古皆有死，所欲甚于生死。有重埒泰山生乃輕，等漂萍先軫免胄。李路結纓，節槩義烈。雷掣雷轟，疾風勁草。繁霜杜蘅，復有廣陵功曹。漁陽掾簿慕義，慷慨捐軀。殉主如模在型，如方在矩。民到于今，稱之詎不聲施。



千古哉江山猶故青史具存流馨垂耀標表睹聞豈曰  
大炎蘭艾俱焚英靈岳峙殺氣雲屯伊余散人登山臨  
水矚風景于新亭續歌謠于下里隨老馬而識途詢居  
民以故址步斜陽之倒影嘆風埃之滿前對觴咏兮失  
懽懷忠貞兮涕漣望城東之遺廟惟荒墟之數椽薦蘋  
藻兮靡及寫余哀兮短牋

明文海卷四百七十七



年兄劉庭蘭哀辭

何喬遠

萬厯四年予與梁山劉庭蘭同舉于鄉今九年矣其時庭蘭占舉首侍御晏清江公竒庭蘭為甚閩中前後首舉者多推庭蘭又五年而庭蘭舉進士文名海內吳越人好偉健之言尤好學其為文嗚呼衆萬之生襍糅紛龐誰知其然然天之生才與人之自成之難也縣都厯井家諷人喟而不得一人求通于古嚮于古矣而不能成其辭成其辭矣而不能道其意辭比意致矣而不能



專一家庭蘭能道其意矣而不愁留之後之專一家者  
誰邪明二百餘年天下漳州人踵貴上國能以道學鳴  
者一人而已布衣陳真晟也其鳴文辭者自吾身而方  
聞見三人焉梁山林纘振劉庭蘭天寶黃一龍三子方  
有意于古之作人弗逮也纘振官京師以卒庭蘭今已  
矣一龍方卑而未自致二子自致矣而竟不留天何為  
哉庭蘭未謁主爵遭其父喪哭泣垂絕服除且戒行又  
奪其幼女而哭之悲其配病悸而革庭蘭又病死配亦



死而莫相聞其夫之死也嗚呼庭蘭何罪而罰之烈漬  
甚其弟問之可奈何曰天固生我而無意邪而終然邪  
又甚又問之曰天固命之又誰解之予達人也嗚呼庭  
蘭醇而慧其容齊而栗白面秀眼與之居而終日沖沖  
予及同舉時尚未辨文章讀其文但知其句讀訇然嗣  
後以事過漳則庭蘭詩詞已清冷可聽語自庭蘭成進  
士而又不與居殆五年矣必其神識加于曩者而不終  
遺之也黃一龍居常謂吾曹品隲闕後世都鄙是以不



敢妄歎林公悅為文多取咄嗟辦欲令我俟公悅於後  
世則公悅猶在汗血也彼謂續振實之不知是以不長  
不知庭蘭今生何等耳古之為哀辭者以相其父母舅  
弟之哀而寬其悲悅庭蘭之親既歿其舅在遠獨吾二  
三兄弟弔斯人之云亡然庭蘭誠自憐愛其漬甚之言  
懸解于天刑吾二三兄弟縱悲庭蘭能勝庭蘭之自解  
乎辭曰

盤礴百歲兮挺南漳誰師友兮能文章志準古今行蹈



方翼足具兮道煩長孤生孰究兮修名孰張幽門黯黯  
兮燭不光君執文螭兮立帝傍乞魂司命兮還我藝場  
魂不還歸兮徜徉扶桑太悲無為兮君能齊同

林庭霽哀辭

何喬遠

詩人林庭霽故與孝廉陳榜李宗熹遊一日為二詩因  
莊應曙謁予驩若平生予故好為驚人語不必自唐道  
者庭霽始駭予予漸與語乃漸然予說庭霽曰有唐三  
百年來稱詩諸君子其初則沿六朝駢麗之習其後浸



淫于科舉矣杜甫一生謂語不驚人死不休也當時孰  
為語所經患不經語于諸子百家者耳不患唐矣又馬  
嵬回紇流傳篇什唐之當時孰是經者宋元及今四百  
餘載矣其事輒諱而不敢道道則謂非唐即唐人生今  
豈庸不用宋也令馬嵬回紇當今乃見吾輩不瞪目歛  
手耶士君子上下觀千載直為用奴詩為庭霽固甚然  
予說益發憤讀書丙夜倦隱几卧起復讀至晝其家中  
一貧無所之庭霽皆不問雖病猶強讀居久之過予曰



吾今得之矣向所駭子者未涉子所至耳因數與陳榜  
李宗熹諸子分韵賦庭霽每見子詩則曰子詩病人之  
詩也予每與子會歸而不能寐者連日夜求為子語弗  
得予則病矣余曰予欲剌取本朝文字成一代之書皆  
可被之金石明示後世賦頌之事一以累子因盡發國  
朝諸子詩與庭霽詩中有鄭善夫集庭霽弗善也曰是  
其才能為發端而不能竟其意予曰若則子之居子詩  
也何居曰子詩當在獻吉元善間予曰甚矣予之不知



詩也善夫先生吾閩桓丈而子貶焉固以我詩病人也  
置之李王間庭霽雖居予李王間固並彈射予甚居有  
間病並進焉不下浙一夕夢有義冠君子造焉曰吾鄭  
生繼之也吾詩為閩桓丈乃獨不當子庭霽曰固也善  
夫見庭霽無遜降意因出明之夜復來曰即爾所善諸  
子讓予矣曷獨不當子色有作庭霽驚悟逆嘔血數升  
沒所善諸子謂予與榜宗熹也嗚呼庭霽居吾詩獻吉  
元美間未然也數數彈射予而今不復得矣予能不悲



哉作哀辭以與榜宗燾共哀之辭曰

室赤貧兮耽詩書飢糟糠兮飽璫珥心千古兮金石歌  
有志無年兮孰為子謀諱詞人兮下黃壚郢人亡兮子  
期徂徂子期兮亡郢人鼻不可與聖兮琴不可與陳吁  
嗟兮余山中之人

明文海卷四百七十八

祭徵君張紹和文

魏呈淵



嗚呼文以載道經緯區宇旁通無涯渾渾灝灝上哲之  
所以不毀也若乃剖判頑才比方夫仙鬼靈竒肝鬻精  
氣會昌宜亦可信況以師表之姿肆力尋源於典墳丘  
索間蹈所未識探乎不言有當吾先生者哉先生雄文  
麗彩早登詞壇天下有道之士爭先推轂薦章凡數十  
上先生矢志不赴而國家之憂嘗形于色天啟初年甫  
及服官即焚鴈臣之車當時毀者以為戀家園厭計偕  
故耳不數年璫難大發諸所交知羅織殆盡獨先生超



然物表蓋其先見云繇是先生杜門絕游雖隣邑不一  
至會有少子異才修文促去衆論感之為立幼清祠先  
生又自營洞窟以老纂書為樂蒐彌其中成文章等諸  
七十二家卷數自為雄伯即郡廬亦罕居焉銅陵黃幼  
元學士嘗與予輩論先生文有三景非時流所及曩在  
卅年聿賦公車而萍觀菰林漁獵四部著書已踰三篋  
中遭人倫之變觴詠自遣風度不減晚即石成基憑林  
起棟弓旌式問問字履接而浩歌窮巖靡憚酬和使登



其山者虛往實歸無不心懌其所詮次復倍前什斯詎  
未聞道者天不憖遺遽捐館舍豈非文章道秘麟管應  
斷使兩楹置奠壁僅藏書即天亦若患其才多然邪先  
是雲間陳徵君仲醇化為異物政爾愴懷先生貌澤氣  
厚絕藥餌去冬臆前微中風露燈後猶出眎親故四方  
客至酌酒相勞若平時嗚呼誰知至是竟成長別者哉  
嗟夫先生家無長物侍無箕帚弱子孳孳飄然而去無  
一語及家人事惟喃喃勅所藏書非明于死生之故者



不能何足為先生憾也某等惟是痛扶風之帳北海之  
車幾成絕學躬往弔唁見其襆被淒然永念平生遺愛  
罔極相對而慟何能已已人有言道之通塞有命在天  
斯文未墜必有英靈傳于世載嗚呼先生其能歸來鑑  
此漿酒否耶哀哉

王百谷先生誄

夏樹芳

萬厯四十一年十二月乙巳故校書太原百谷王先生  
卒嗚呼哀哉先生諱穉登字百谷余邑利城青陽里人



也負僕易不羈之操挺瓌瑋殊異之才文麗碧雞辨雄  
黃馬諸所結撰可勒名山噓毫字扶風霜矢口名高月  
旦書法乞靈于子敬作賦揚芬于仲宣談玄不讓夫茂  
弘奉佛堪擬于摩詰一時吳下諸名士與先生稱鼎足  
者彫落殆盡而先生以碩果在上獨著靈光垂綸渭水  
之年抗跡酒泉之日永錫難老逍遙大椿斯韻士之遠  
謨畸人之勝福矣僚期告終一朝怛化人同跨鶴迹類  
駢驚駭壇之牛耳之盟文海暗龍鱗之色弔傾通國感



動中州王孫慷慨以扣扉公子殷勤而挂劍子建述侍  
中之誅廷之草徵士之章余小子漫辱交知能忘鉅麗  
哉先生早歲有燕市客越諸篇明月清苔諸集晚年制  
作並夥不可亶記三吳兩越之士競擗殘膏嶺南冀北  
之英爭夸片玉余每讀其詩若文直欲御風而行干霄  
直上夫榮華有歇金石無窮非繫玄德以昭素旂則寂  
寂青山孰問千秋黃絹哉詩亡迹熄吳市為墟大雅黍  
離傷哉百谷嗟乎茂苑蕭條才人失矣靈巖慘愴翠烟



孤笑震澤魚龍孰揚波矣洞庭葉下歛驚秋矣南望玉  
遮吸其泣矣我欲執鞭何嗟及矣爰作誄曰

先生任世七十九年人壽榮名于昭太原溯公桑梓聲  
余江汜擢秀晉陵聲華鵲起垂天之翼詎肩枋榆躋屬  
擔簦燕山上書湛盧出匣光芒射斗白鳳飛肩金龜在  
口平津閣上賦就琳瑯丞相憐才國士無雙史館校讐  
青藜分艷先生睥睨雞肋靡羨闔閭城下伯鸞僦居四  
壁臨邛名動九區子墨客卿酒徒劍俠誰為游揚先生



緩頰法書名畫夏敦商彞誰與鑒定先生品題傲骨稜  
稜義不逢世芳蘭當門見者多忌龍性難馴白雪自操  
笑彼甘人貝錦徒勞先生快語駛如倒峽矢較譚天四  
座並屈先生薦士怒如調餓入洛游梁多士蒙噓先生  
義烈懷恩必報南洲東蜀千里赴弔先生激壯排難亟  
趨聊城射札鏌壁告辭問舍求田平生未有是故芳名  
不踴而走囊無長物三尺芙蓉騰有遺篇秀句摩空客  
星黠靈天風吹墮紫氣西沈真人夜度解嘲堂在玄亭



已非繡虎雕龍名士安棲半偈庵虛蔗園誰托雪竇丹  
霞淒其冷落人琴愴別邈若山河門無問字客羅籠鵝  
獻歲發春計聞江上余母告灾五中摧喪今我輟哭敬  
弔先生天高沈寥莫為招魂先生畢世法門策足僉曰  
往因發源金粟生居勝壤死亦超然白馬澗上地出青  
蓮落落長松泠泠澗水以是誄公公當色喜嗚呼哀哉

祭樵李丁烈婦文

陳繼儒

余讀嘉興柳志志節婦僅兩人耳益嗟而悲之夫禮義



之鄉度必有奇節而委巷婁人婦或閭史不記國史不  
書式廬表墓闕如也人固有幸不幸哉丁烈婦端平巷  
中婁人婦也夫亡葬火烈婦年十七投焰者三父母掖  
之堅不死數日翁與姑將強嫁之烈婦伏刀自刎不死  
傳以藥手掣之不死皮肉綴附一絲許號哭震裂喉斷  
竟死矣嗚呼異哉方烈婦之死也翁姑駭而走有小姑  
來視屍鄰里父母繫其髮屍上椎詈之不聽出業訟之  
官天暑烈婦不得飲吾友賀伯閭聞而義焉身詣巷中



問其事事核為解諭呼翁姑來釋小姑去凡紀綱敝樵  
幕旒悉無憾郡邑長與士大夫爭為文以祭且醵金卜  
壤葬之烈婦非特身名不辱且不朽矣夫槁李自二百  
年來節婦湮滅不勝數丁烈婦年甚少家甚貧一時老  
稚奔走告語郡邑士大夫哀輓而表章之者獨甚著人  
真有幸有不幸哉語云無言不讐無德不報烈婦其何  
以報鄉之人大抵愚夫愚婦之死生如飄風游塵何關  
聚散惟節義之精靈英爽非歿為神明則轉為男子將



無驅車鬼吞妖魅以清此一方民不可知將無再世更生為孝子忠臣湯火惟命不可知將無生他方吏於故鄉為監司郡邑長整齊綱常捍恤灾患如同室之救不可知嗚呼是皆爾丁烈婦死後之責也雖然西子沼吳隨范大夫買臣妻去更嫁聞吏檣序至今羞稱之有丁烈婦慷慨殺身以張越勁則烈婦之報檣序多矣且以丁烈婦之故里中聚談或旁引某婦某女或嫁或未嫁或死或尚未死或不及旌或待旌或負賤格不得旌者



縷縷追述其年歲日月里居并及其父母夫之姓名宛  
如昨日事一丁烈婦死而衆貞女烈婦皆生則烈婦之  
報槁李又多矣豈必徵靈于烈婦之身後哉嗚呼深閨  
寡婦拭淚而施簪珥立朝大臣易姓而拖青紫下玷丹  
書上汙青史彼何人哉死而已矣嗚呼尚享

祭鄭閑孟文

婁堅

嗚呼維歲之初予往叩門君聞曳履貌頓色溫君病水  
涸不勝火焚告以靜息百慮遂巡先屏宿好遂謝所親



塊然獨居以寧其神君雖首肯曰我未能歸依釋氏庶  
幾我振為寫大來灑塵沃根疾高下治從此聲呻奄然  
病革遂脫垢氛嗚呼哀哉君匪食病而拙治生麴蘖之  
好醉可無醒每揭愛弟如篴如壘當其意適顛倒主賓  
清言為侑譬猶八珍性既嗜古尤矜時文已擯于俗自  
此芳蓀彼幸而售要為液欄前後作者豈其遽泯予笑  
而言此道如羶妄謂羊耳芻狗之倫又如吟嚙寤豈云  
云終不我信為之益勤以俟子雲知其所存不多為詩



文膽以溫其于哀誄娓娓千言而今已矣齋恨典墳平生友愛撫弟有恩何圖嫡長歿無負薪顧謂梓子以嗣而昆朝夕大父則猶元孫嗚呼哀哉嗟予衰老困于暑煩踰月而平硯枯穎髡迨茲冬首潤回焦脣乃克伸紙寫此悲辛一告几筵賈涕霑巾嗚呼哀哉

祭萬茂先文

黎遂球

維崇禎十三年歲次庚辰六月十三日癸亥徵君南昌萬茂先生卒于揚州客舍通家社盟弟黎遂球既為之



視含殮蓋如禮乃以牲酒香帛拜于柩前哭而而奠之  
為詞曰嗚呼茂先已焉哉蓋遂球之復渡江而北為送  
兄行不謂送兄之死也兄之行行復止遂球留之不謂  
留之而兄乃死于斯也頃在都聞兄且至亟望之因但  
為書寄巨源而不及既南歸稍留潤州使人人踪跡兄  
未得四月廿五日客有持鄭超宗書至言茂先在此將  
行矣因亟報云幸稍待當即來相送比五月之二日而  
遂球乃克至至則見兄且病利然飲噉訓和如恒但日



下必十數行不得止至月之既望且屢易醫無功效康  
小范至言高郵有國手欲載兄往就徘徊不可于小范  
往高郵後遂球因與超宗大宣展轉為書使必得此醫  
來來則兄已誤服饒醫丸其藥峻甚本方云虛人宜參  
湯下饒醫忘之適遂球過超宗少坐而兄輒以白湯引  
服矣然丸之力緩故高郵醫來視反云病且愈無恙但  
留藥而去時廿三早也去則丸藥性大發日夜暴下不  
得止遂球深憂之召饒醫至叩其故則相視失色因亟



進參日加至數錢而下尚如湧泉注水竭火且起委頓  
在牀不少食然兄意尚疑補藥不可進他醫有用術者  
輒自擇而去之廿七廿八二日乃大劇則自分必死輒  
閉卧內起自書遺囑于是從周超宗士預諸鄭氏羣從  
暨社中諸兄弟乃日奔走于寓無可如何既越月七日  
遂球為文告于神諸君咸積誠為禱果暫止復甚幸而  
兄從子汝士在里中為塾師日奔走侍兄乃特移枕席  
來榻前晝夜不暫舍去因竊出所囑與遂球觀中有欲



得姜燕及宗伯為題墓徐巨源為行狀周仲馭為誌銘  
遯球為立傳語諸凡處分家事皆楚楚有致無若丈夫  
短氣亦無兒女子流連態間語超宗與遯球曰公等皆  
宇內才德絕倫與其死于家人婦女手無寧死于諸公  
之手獨中有立後一則若甚不能自決于易簣之際乃  
索筆硯就榻割其中幅續紙更書字畫如平日且口占  
為四絕句詩令汝士書之語超甚十一十二日猶見聞  
語言如常夜四鼓一燈熒熒乃寂然而瞑嗚呼茂先已



焉哉夫無子而客死者固俗人之所諱忌甚能文章而不登第以保舉薦微車且行而未及就官以展其生平經術固為士者之所惜具此四者云胡不哀而兄乃能飄然無繫其頂煖甚殆佛家之所稱聖果生天而意想豁然殆仙家之所謂尸解骨蛻夫復何言獨憶兄頻出所作而問我曰後世其可傳耶予速應則喜遲則憂又復為語曰昔石曼卿文與可諸人以東坡傳孔巢父鄭虔諸人以青蓮少陵傳他日吾黨中有一二人傳則人



人傳矣又復索遊球所為古文序記日必手一卷枕問  
觀之則曰善哉黎子傳無疑當附以相傳又何憂也嗚  
呼茂先夫遊球之所以依依而不忍遽別去者為望兄  
之起既而不起則倉皇籌策為斂兄之體魄反覆而相  
商為兄之家事而兄之所以相信而托者則在乎兄身  
後之名嗚呼茂先茂先生平腹富五車眼空千古筆落  
紙貴詩成神泣兒視孔揚衙官屈宋而且綱常名教卓  
然為一時師表其自命不知當如何人其交遊盟好為



先達顯貴巨公名卿又不知幾何人其成大名顯當世  
附而合之則生羽翼凌蒼天異而離之則三都笑為僞  
父一文詆其不值如此者又不知幾何人而所若悲若  
慰舉身後託之長暝無他疑慮者乃必在一後起之遜  
球此即茂先能步履飲噉如故談及此亦不能不慨慷  
發嘆感其為意繼以悲泣而況呼之已不復語其安能  
不持此酒而哀也嗚呼哀哉兄有從子汝士可以扶柩  
而歸居停鄭家諸公又皆能經營終始其事遜球當入



吳門為兄行其遺編還過豫章與巨源圖所以傳兄者  
兄其有靈尚或耿耿相助俾逆球克昌其文以為兄傳  
也嗚呼昔人有言生死異路永從此辭呼兄不應為文  
哭之庶其兄知哀哉尚饗

告亡友鍾伯敬文

譚元春

鍾子伯敬死之前三日告于佛受五戒發願來生甚為  
寂遠友人譚元春不敢用人間庶羞重違其志延僧眾  
誦經是日設花果香燈供佛因以及鍾子而告之曰天



乎春之無罪也喪我鍾子乎鍾子在時即久不相見一  
見脈脈心目深凝開筴質詩文相賀曰別來無恙幸甚  
大異夙昔近閱何書書所得究其中之故若何有佳山  
水必以告見奇士必以告如是而已然爾時鍾子與予  
皆人耳二十年交如一日者人之說也今鍾子死則固  
鬼神也且事佛則佛眷屬也淚化血血化碧子勿厭聽  
予今日乃當與子有言耳予平生豈負子者然亦實難  
如昔年書中所謂敬身醒眼閒坐朗懷不敢自蹈于非



禮之動自陷于有戾之物予豈真能若是徒以負子為  
恐耳由此言之予之不負子也固也但子晚年參尋內  
典披剝妙義病中猶為學人端坐拈說嘗因予塵累尚  
少欲引共無生之學微誘重喝極其痛切而予以雜念  
尚多遠適域外遂至語亦不答招亦不往臨危囑累然  
後一許可謂負子甚矣豈惟自愧念雜猶豫不進兼亦  
病子情想各半脩習無多何苦談此今覩子倉皇去路  
猶與諸佛結願山僧尋盟泉壤下安得有此志士予既



自謂相知而子反不知人世管鮑一何麤也予真負子  
矣詩文之道受命于胸中譽不可受譁不可改人皆劫  
劫已獨有餘予嘗抽其緒肩其紐冥目幽思望遠汲深  
不務多取于古人以力自致于後世而余嘗避同調之  
聲厭爭趨之陋灘移帆折泉去瓶流雖未知栖翔何所  
然子在日子之文有未經子目者意欲待業就志滿而  
後與子各置一地以雪天下人二子一手之名業未告  
成子不一見予則負子矣子澹素踈拙營生最其所短



偶一日與子談曰看子命相骨法不亨于官亦宜稍策  
田廬杜門古處乃為不俗士大夫安可以飢寒告人為  
不俗子時歎美此言而性無遮欄間受一二贈遺遂為  
人所檢點天下之人謂子不宜爾而予回思之昔者一  
言過聽至此子則又負子矣予以頑曠之性見人嬉遊  
狂顧勃發常同子書史靜對澹若無物杯棗遙陳酌勸  
不施雖懽情日接而樂事時乖旬月之內吟嘯他往當  
其挽袂固留予嘗不顧而去始知靜者朋侶倍篤此又



予負子矣子既死人皆引子期伯牙為言予謂不然予  
年已四十世情不復塵意惟願經始誦讀力于作述思  
得一當以報子耳夫子期先逝而伯牙推弦古今之負  
友者伯牙一人也是豈子期之意也哉天下之真音濫  
于手耳而流于山水又豈吾欲止之而止者也記己未  
歲予在汪閣夫山中客有傳子死白門者汪歎予知音  
再難予曰此君一亡予筆墨間可傳可愛之路從此遂  
寬矣知己者知其中毫釐異人者耳能多賞乎世無嚴



人因無知己彼都門中紙貴而絹酬者豈皆我知己耶  
今而後決不敢以漫好浮動之物裏我心乎請日日懸  
我鍾子冰面霜瞳照察物我終其身而後已告子而後  
子即入玉泉桃川尋子故踪于秋聲月光之中因攜子  
所著楞嚴如說質之海內善知識求其中安穩無細微  
惑而後津津入焉即以是報子矣子能信我哉

祭馮元成先生文

宋林澄

嗚呼自先生之遊九京也四海皆謂朝廷失一老成文



章失一司盟乃澄更有隱痛隱憂不在老成司盟而在世道夫世道之隆替徵于陰陽而理徵于風俗而遞變故先王于陰陽風俗委之宰輔封疆之臣而厯採五方之音以觀王風王風者田畯紅女成之文人騷士飾之而所以養丈人之生氣生色者非二三賢士大夫不以聞之君父互相吐握默致太平之治者乎澄生也晚聞知者為弇州先生若李本寧馮元成先生則從遊最久三先生皆噓吸兩漢吞吐六朝其視前代曾無偶俱之



者而下士若渴四方士歸之如大海之納百川士得三先生一札則羽翼生一言則寒灰舞因是以發舒其意氣進行公卿間藉吟咏以代從橫家言恃唇舌以代古任俠士其最下亦能使酒罵坐公卿率以三先生故多優容之夫優容一狂士似于國家之元氣無闕然四民惟士鍾宇宙最靈之氣士數奇于制舉而援戈貫弓又不忍低眉人前不得不借文詞以洩其忿懣不平彼不平之氣每好凌人有三先生覆露之因得海內縉紳先



生優容之則不平之氣皆轉為陽和何自而不生太平之景色觀于今上辛卯已前可知已自朝宁之間不知何意而沮尼三先生于是縉紳之抱奇才負盛氣者逞衝車馳突騎欲以偏師抗衡三先生先生雖不屑與校然所謂孤鳴其穴斯文之不祥起矣先下之能溺一字成一韻蚌蛛初孕崑璞甫攻無不起而與三先生爭輝毒逐三先生憂讒畏譏僅堅壁深溝以御翰攻又何暇養士而縉紳之偏師亦罕墨守所以然者人人自以為



得大將而不收養士之益也尤有異焉宗京山則攻瑯  
琊宗華亭則攻京山宗李虎中朗伯敬則不持一槌張  
空拳奮發足以侮三先生騷人墨士從而効之雅道淪  
亡矣無何王先生卒兩先生浮沈仕路文章之典刑幾  
無以自存而士之窮困來歸兩先生者若瘡痍之禽聞  
鳴弦而殞安能附青雲之士以自致霄漢使翰音戾天  
哉不過如振羽之蛩附砌成響其音細矣細甚則民不  
堪關係豈淺淺哉向令搢紳之抱奇才者共尊三先生



三先生不惜齒牙獎借時彥四方之士庇兩先生宇下  
雲附景從加以聖主之教育賢輔之吹噓以暢適其神  
情文章詞賦當有傑出于世宗之朝雍和之風成而明  
良之頌奏國家蕭瑟之氣未必若今日也今海內諱言  
文章之日久矣縉紳之號為好士者遇能誦邸報數章  
識權要數貴人則謬為恭謹不惜杯酒延之上座遂為  
其最上客能陰陽于時局則稱俠士如是主客在黃髮  
而口尚孔臭亦能勉之果可謂能養士乎為其所養者



果可稱文士乎俠士乎而文章之士焉得不從業乎今  
天下奇士不屑為古文詞矣乃壯夫少年舍制舉外又  
無所以耗其雄心設有若唐李之黃李者求一逞其志  
患且不知抵止則世道何可一日無兩先生為文士之  
四豪哉夫兩先生為天子養士氣生士色皆相忘於寰  
區而縉紳士大夫亦畧而不察則兩先生之默有造于  
國家非淺鮮矣噫當今四方多事苟當局者存兩先生  
好士之心何患不得國士是文章外更有好士之道在



所可痛者自以為姬公復生而不知姬公成東征之功  
在吐握今縉紳非特不能吐握也含城沙攘鼠社衛故  
交于几上爭相割烹庶幾一嘗以狗食指其人更出驕  
吝下萬倍今天下之士倣效成風禽心獸腑豈僅羽毛  
哉此澄所以既為馮先生痛而又深為國家隱憂也嗟  
乎自文章之道不尊使才情曠世若董先生元宰不專  
志詞場而游情于藝圃天下慕其才孰忘其文章又并  
才孰疾之致鄒毘陵先生輩皆棄文章而托于他好若



此而文詞士安得有生氣生色乎無惑乎頌聲之不作  
矣人知先生為文章宗盟而不知先生憂國最深故澄  
不以文章痛先生而痛失好士如馮先生者為國隱憂  
如左雖然士有不屑受人之吐握其人雖姬公豈得而  
吐握之哉吾未見其人其人亦未易見也云

明文海卷四百七十九

雜記八條

沈懋孝



戊辰春余過齊魯間見犢生子首尾徧體皆肉鱗頂中  
有小肉角或曰此麟也產于吳冢宰望湖公之別業三日  
而殂

金吾筭菴朱公晏一二交友余與焉深更撤燭出一金  
函乃寶珠一顆大如核桃其光四照滿室如中秋夜色此  
真明夜珠耶

空青是黃石子大如拳諦視之膚裏沉沉有青色命匠  
氏以金剛錐錐之滴出翠色如漿此張太史家寶也



王司馬有玉帶一圍日色映之宮袍盡篆及莫夜置室  
中紅光遶梁常以金函函蜂蜜養之光采勝常

衡山有明月巖在山正中處東西如小閣道入東洞門  
如月之初漸行漸盈過中岩如月既望漸行漸減其洞  
中石崖上多山水人物之形刻秀如畫圖然

解序吾為余言其解州有鹽池者蚩尤所窟穴處平時  
淺淺清波耳每歲九月九日先後數日常作大風雨此  
為化鹽之候彼二十里之聚各儲草蓐木屑竹枝樹根



敝履壞絮之屬一切雜投焉狂風一夕作凍明日眎之  
滿地皆鹽華矣味甘鹹甚瑩潔始祭蚩尤之旗官收其  
半民取其餘亡不滿志

張勇嚴兵部為余言其邑中有鮫人之室室在深淵下  
每清明市人携百貨精品至水濱戶戶設大筵高酒歌吹  
甚盛張錦幄樹銀屏如延上客也日正中鮫人二三輩從  
水中起爾迎之甚恭循次視諸市物擇其尤者書一籍上  
遂各進飲食焉日將莫竿榼俱傾洋洋樂甚衆各持其



籍上物一一投水中竟收去不復見乃謝衆人坐水崖  
上大哭美珠珊珊滴下滿地圓走衆隨手囊收之唯力  
是眎亡不給足者鮫人乃逝及衆各抵家檢囊中珠其銖  
兩一一如其物價正值外微有餘潤即善取者無盈溢  
焉鮫人帶劍衣皮唯額以上如魚頭然

太華之上有玉井其蓮花如車輪異香飄飄數里此周  
茂叔所愛蓮也素履善為余言曾至小西天界上去蜀  
中三萬里滿地皆旱蓮花一朶大于一室曾繁可以登



而坐焉

紅鉛法 馬一龍

紅鉛法白虎首經但居室時元氣未破不在年之少長也  
景鸞治療余疾若神其治史升甫升甫終不起余受其  
法屢試之知與人參附子同功而力百倍服食苓附不  
得者用之促死耳此坎中一點真陽乾健本體元胎苞  
命具焉傳送臟腑流貫經絡大助氣血運行然化陰火  
為病之人合併成害矣丹溪論陰虛火動服參者多者



不治又辨蒼黑人肥白人有宜有不宜蒼黑人多陰火  
肥白人多氣虛氣虛者宜助陰火者不宜助也觀此紅鉛用  
于宜助則效用于不宜助則不效也余生而升甫先  
可以為鑑併紀以詔後之人

明文海卷四百八十一

靜觀軒瑣言一

張維根

文章經國大業不朽盛事其離合高下國運關焉我明



以經義取士士或白首咕嗶詩文之學多從餘力及之  
安能凌駕古人故非具夙穎年少通籍兩發無留行不  
能習此道非沉浸博雅脫牙籌荒澆習氣文經子左國  
馬班及韓柳歐蘇詩賦從三百篇楚詞漢魏六國唐初  
咸極深研幾邇原循委不能精此道近季如王鳳洲余  
君房孫文融胡元瑞之評詩文也似已得其梗槩乃輕  
薄之徒稍窺一斑輒擠前輩學未博而虛張空拳見未  
精而借言逸致思之沉鬱而文之以清空神非雋永而



派入于亂道人自有眼夫將誰欺愚問嘗取諸公之評  
斟酌之明文修詞而宗左馬兩漢者如王元美李于鱗  
李空同汪伯玉為名家主理而祖八大家者如王伯安  
唐應德王道思為名家至若楊用修王允寧劉子威余  
君房陶石簣皆斐然克實者也明詩如空同于鱗元美  
高季迪何仲默徐昌穀為名家若熊士選邊庭實鄭繼  
之孫太初高子業薛君采宋子相吳明卿謝茂秦沈嘉  
則徐文長胡元瑞王百穀皆爛然成格者也今學詩文



者自攻瑕短則可妄肆彈射則不可君房論文曰文不在詰屈聱牙而在博大寬閒元美論詩曰不深不玄不沉不堅入之沉深出之自然完之粹然如大鈞雕物而不見工如良玉夜輝而泯其痕斯三百篇西京建安之懿乎且又有進此者孔子之論文曰辭達曰草創討論修飾潤色而其言詩曰可以興觀羣怨如此境地豈易深造自得愚髮種種矣安能揮櫓揚戈今日再中亦徒就批削之間婆娑蠹魚間送餘齒已矣若夫枵中



而輕非先正則愚豈敢

靜觀軒瑣言二

張維樞

邵樗朽乃駟騶之豪者跡其為高新鄭謀相市官爵見  
厭把持守令長短江陵修新鄭之憾并惡其事屬巡撫  
張居徠斃之獄此自有權譎豪橫取死處至顏山農何  
心隱以講學中法心隱至殺身王弇州推與邵樗朽並列  
江湖大俠似為不倫夫太州王心齋固陽明先生之徒也  
心齋之後為顏山農山農之為羅近溪何心隱此真衣



鉢頗有承受據弇州謂山農與趙文肅為患難交以計取其財不遂而棄去之嘗以羅近溪為門人彊使勿廷對至南京挾詐人財事發被捕笞坐戍近溪為營救納贓始脫又謂心隱師事山農例受三拳而後拜及密同山農淫村婦扼之亦毆三拳使拜削弟子籍因縱游江湖以計挾吳興富室子數百金在耿楚侗坐見張江陵來訪既去忽然耿曰此人能操天下柄得志當殺我益放浪大言無忌事消聞江陵屬江西湖廣撫按密捕之



為巡撫王之垣斃命此果足盡二布衣平生乎文肅近  
溪何等氣魄識力山農果污醜文肅安肯引為患難交  
近溪如貪一廷對豈山農所能答而疆至死生不相背  
負營脫之獄免禍乃已此不惟見近溪師友誼重山農  
亦何如得此于近溪則道學淵源素必有中心悅而誠  
服之者至心隱家世饒財棄家學道危言危行獨往獨  
來特以聚徒講學吉安為仁隣所怨且平日有得志必  
教我之語傳播四方及揭榜通衢列心隱罪狀聚觀者



咸指其誣由祁門而江西而湖廣無不嗟吁代冤湖廣  
曾密揭于江陵江陵曰此事何須來問輕則決罰重則  
發遣而已矣迨應城李義河授意而心隱始不免大率  
布衣而隱必如龐德公蘇雲卿輩瀟然自適于岑寂閒  
曠之鄉始可全真若欲主盟道壇招呼朋類雜引時事  
密示刺譏而不類之徒又工構煽為在事所窺未有不  
恨刺骨而下之石者况江陵自奪情後方欲以威箝天  
下舌而可櫻其鋒乎卓吾子曰匹夫無假不能掩其本



心談道無真必欲刻其出類此憤語亦實語也惟尊山  
農為正派擬心隱為亢龍不無護法之報余姑斟酌王  
李之評曰是二布衣可謂之索隱行怪蓋隱恠足以有  
述而其無忌憚足以取禍且無忌憚之與時中辨特在  
幾微耳若淫村婦詐富室子數百金或者通衢榜類耶  
當一付之齊東野人

弇州史筆多出自私心山農心隱之傳據其爰書而  
為之至如吾邑呂相得其潤筆千金不難竭力回護



此亦已矣唯楊忠愍彈嵩奏章及于呂者作忠愍之傳亦為削去將誰欺乎凡文章捧其珠盤者無不贊揚徐文長楊秘菑不受其寵絡者則推築不遺餘力豈可令之作史

書萬元彥數

祁永燦

余癸卯之上公車也以孟冬望日抵都更五日而就寓得僧舍甚精潔可喜杜門彌月頗有跼然之思偶于長至日間步菴門顧問老僧此安巷有公車稅駕可共語



否僧指一方丈後有彭城萬君寓此已一月余始知一  
菴而各為門戶者也即携僧共往賓主尚未通款元彥  
惟熟視而笑予初不解竟啜茶二甌方別歸元彥即踵  
至其視更頻而笑更劇予固叩之因問卿家山陰去吾  
鄉幾許曰二千里而遙然則居左有大木當戶者予曰  
然因舉予生平纖悉事質之無弗如夙習者乃撫掌大  
笑曰異哉吾鄉之張子也張子善姑布子卿術方吾之  
北上親友餞之祖道就席上強令張君卜乃預筴我當



寓某地而同寓者為某郡人南宮屬當聯榜然賜第則  
皆不前也且其云顰眉面孔衣冠言動無弗與卿合者  
是以不禁目逆而嘻因袖中出紙一縷則固已悉書之  
矣予且喜且駭詭謂元彥吾兩人倘能酬此側注會當  
以七寶莊嚴乃生耳元彥更笑曰獨慮一事恐不能符  
彼期以某日有少女贈我紅絲客中寂寥是安所得此  
哉余亦心難之乃元彥適以季冬舉一子其家小姬以  
以羅帶為信令蒼頭馳至正筴之日月合予兩人益自



奮及放榜果先後成名都門好事遂哄然以為佳話每  
宴集無弗詰此者夫余與元彥南北各天夢寐不相及  
笑元彥而巧中奇矣乃因元彥而及其所同寓之人又  
奇矣既及其同寓之人而且一一若寫照抑何巧發奇  
中之至此乎然片紙中所書某日當納某姓之女為妾  
言卒不驗非張君之術有合有不合也但始以無心之卜  
而終以世情之度大抵進取一念吾輩素心故數與心  
而相啓若乃漠然絕無意想雖數亦如之何哉彼胡僧



能測忠國師于天津橋而卒罔然于三問也意正如此  
即此可識吾人涉世無息不遊數中而奈何逐逐于夸  
父之愚也雖然雲谷老人有言大善人數固不能拘最  
惡人數亦不可拘然則吾輩何甘自處中材為數所囿  
乎因書此以自勵

崖鷄 趙統

客能籠鳥者謂為崖鷄丹喙殊趾閣閣聲杏佳尾鳩臆  
大倍家鴿蓋亦雉屬也因指其喙此雛時殊黑成翮而飛



後始脫嘴褪黑出丹鵲鵲之褪易其色崖雞之褪并脫  
軀殼方褪時喙吭腫敲如蛇蛻然漸析而離有不克連  
化者為之死蛻因為言蛇蛻嘗得伺蛻蛇當褪時病而  
漸腫腫極復縮腫殼枯虛裂頂而出如蟬蛻然嗟乎此  
仙家裂鼎之所象也嘗聞客言伺蟬蛻者漸次間闕大  
抵物蛻皆病如更生然時四座集客或言麀蛻曰麀蛻  
眼嘗求七年得麀窮谷草中故睛閉而新眶未起蓋麀  
性知蛻預託山谷人不至處稍得自全嘗見肆葺麀有



三蛻眼痕者已漏滿面不知塵壽止凡三蛻或亦二睛  
出王相遞明復耶與夫蛻嘴與殼者皆未伺得其凡幾  
日病而來復也物有成性理有間氣何其察之隨有言  
獺蛻肝者曰獺肝凡十二析月腐一析則他一析更新  
循環歲更故人之常言曰人心象膽世事獺肝因憶昔  
嘗見解象象股骨殊異他獸畜凡出膝肯綮接處皆小  
骨攢束外環而肉其中窵以為膽路故其膽得四時循  
乎四足嗟乎造物巧變如此哉良獨病崖雞乎他客有



繼言獬之蛻角者與昔所聞于韓一槐總兵者畧獬野羊也野羊亦多種大概好崖棲凡自固耳獬之大者肉重千觔嘗見全蛻雙獬病並鋪足滿一案方當蛻時苦無他蛻法則自投絕崖翼撼震以自解而獬亦自決死矣已甦而自逸土人時收其蛻角或有並獲獬者但不得其蛻期如呂氏春秋所言麋鹿夏冬之解者可芻養而家觀之也隨有會寧趙生西北邊士也其地多麋因馭之曰諸言物蛻未必目見前人言麋噬虺食栢而香結



退臍而藏覆以自珍吾閩邑無栢何食而結香然未聞  
其退臍如象之退齒而曾有獲其藏者象之退齒東  
南土人言解之澗溪中時日來視之久而漸踈漸遠視  
之人或墜木偽齒給而竊之否則大暴山氓甚之鼻傾  
其屋人言屏退角罕見而未聞也至言噬虺傳之訛耳  
麝春和其臍自張躡諸花卉得其香而括之蠅蠊集其  
臍腫然亦括之凡諸花香蟲肉固皆其香材也至其遇  
蛇回旋數周撐足張臍以當蛇蛇自起而納諸其臍以



收入之獵者或有得其臍而收蛇不既者或有收而未  
化化而不盡者大抵蛇為其香之主也然寔非噬非退  
藏天地間物事可舍目而任耳哉言既他客有談龍者  
言龍之蛻以首昔見晁櫟南畜藥嘗得全首置之牖下  
高可二尺許骨嘗聞他掘地得骨血尚未乾而龍不痿  
亦或有得骨石中者不知龍何以神化而為蛻法也隣  
客聞談龍過而轉言九龍蟄法曰陳圖南竊之而能睡  
因再言蟄法誦蘇東坡詠檜詩地下惟有蟄龍知之句



欲相叙諸蛻以為詩話適壁有蟲響廉而得之乃俗所

謂磕頭蟲者纏蛛網中為之解之妙契天成效唐人李

杜元白為駢後絕句一首

佳音隨鳥短尾者之總名

尋常頗病分衰

聾天網束人笑有躬蛻背自憐慟雌雄磕頭何乞脫愁

蟲

慟蛻為死  
蛻蛻子也



二家詩選

總集類

二家詩選序

明興至弘治百有餘年朝宁明良海內鳬藻重熙累洽  
名世輩出於是李何崛起中州吳有昌穀徐氏為之羽  
翼相與力追古作一變宣正以來流易之習明音之盛  
遂與開元大厯同風洎嘉靖之初後生英雋稍稍厭棄  
先矩去而規模初唐於時作者頗有數家例乏神解惟  
高子業繼起大梁自寫胸情掃絕依傍弇州詩評謂昌



穀如白雲自流山泉泠然殘雪在地掩映新月子業如  
高山鼓琴沈思忽往木葉盡脫石氣自青談藝家迄今  
奉為篤論其弟敬美又云更百千年李何尚有廢興徐  
高必無絕響其知言哉不佞束髮則喜誦習二家之詩  
弱歲官揚州數于役大江南北停驂輟棹必以迪功蘇  
門二集自隨順治辛丑閏七夕泊舟海陵嘗取二集評  
次錄為一通大抵於徐主迪功集而外集別集什不取  
一於高主五言而七言則姑舍是此本貯篋中久矣康



熙己卯居京師是歲復閏七夕悼亡之餘夜旁皇不能  
寐燒燭檢故書適得二集鉛槧宛然如旦晚脫手者迴  
思往事忽忽已四十年嗟乎此四十年中哀樂變遷之  
境如夢如幻而予且閱歷憂患由少而壯由壯而衰頭  
童齒豁久非故吾惟此丹黃手蹟觸目如新其情事有  
足感者輒取舊本略加刪補鋟版京師以申平生辨香  
二公之志亦以誌余今昔之感云是年仲冬資政大夫  
經筵講官刑部尚書前都察院掌院事左都御史濟南



王士禎撰

二家詩選

附錄

徐昌穀如白雲自流山泉冷然殘雪在地掩映新月又如飛天仙人偶遊下界不染塵俗

昌穀自選廸功集成自精美無復可憾近皇甫氏為刻外集袁氏為刻五集五集即少年時所稱文章江左家  
家玉烟月揚州樹樹花者是已餘多稚俗之語不堪覆



詭世人猥以重名遂槩收梓不知舞陽絳灌既貴後為人稱其屠狗吹簫以為佳事寧不泚顙

高子業如高山鼓琴沈思忽往木葉盡脫石氣自青又如衛洗馬言愁憔悴宛篤令人心折

子業少負淵敏生支干與偽漢友諒同既遷楚臬恒邑邑不自得發病卒實友諒彭湖之歲也其詩如積賤詎有基履榮誠無階既妨來者途誰明去矣懷茫然大楚國白日失兼城久卧不知春茫然怨行役為客難稱意



逢人未敢言失路還為客他鄉獨送君衆女競中閨獨  
退反成怒寒星出戶少秋露墜衣繁以我不如意憐君  
同此心當軒留駟馬出戶倚雙童里中夷門監牆外酒  
家胡為農信可歡世自薄躬稼問年有短髮逐世無長  
策林深得日薄地靜覺蟬多清婉深至五言上乘  
王世貞藝苑卮言

昌穀神清體弱雙瞳燭人幼精文理不由教迪上探騷  
雅下括高岑融會折衷備茲文質其所研索具在談藝



錄可謂良工心苦者與贊曰博士清資冰壺斯濯遺編

熒熒鳳毛麟角

顧璘國寶新編

徐集獨綜菁英莫可瑕類

皇甫汈

迪功格高調雅馳騁於漢唐之間婉而有味渾而無迹

尤長於賦頌其反騷已馮陵班揚矣足冠宏正名家

顧起

綸國雅品

空同開創草昧大復繼之昌穀以獨造驂乘其間故明

詩首稱宏正

胡應麟詩藪



迪功存詩無多乃與二雄鼎足觀其談藝皆深造之言

宜其短章片語無不連城也

陳子龍

子業詩如磊磊磊松凌風迴秀響振虛谷

顧起綸國雅品

高子業視李何後出其五言古律之工不欲作今人一

字在唐不減張曲江韋蘇州

詩數

弇州評子業詩云云余舉羊孚語贊之曰資清以化秉

氣以霏遇象能鮮即潔成輝此四語可畫一子業也

馬之駿

子業詞存清曠意成淒楚

陳子龍



昌穀之於詩也黃鵠之於鳥瓊瑤之於石松桂之於木

也子業空谷之幽蘭崇庭之鼎彝也

藝苑  
卮言

徐能以高韻勝有蟬蛻軒舉之風高能以深情勝有秋

閨愁婦之態更千百年李何尚有廢興二君必無絕響

王世懋藝  
圃擷餘



明詩綜卷四十七

查秉彝 一首

秉彝字性甫海寧人嘉靖戊戌進士除黃州推  
官徵授禮科給事中厯戶科左右給事中坐建  
言謫定遠典史稍遷建寧推官陞刑部主事改  
吏部進郎中遷太常少卿改大理少卿轉太僕  
卿終順天府尹有覺菴存橐

贈悟齋吳諫議奉使琉球



玉冊傳殊域天朝簡近臣漢官陳法從周禮貴王人橫  
海樓船使明河博望津長空浮遠樹疊浪淨高旻馳傳  
祥飈護揚旌水怪馴彭湖晴似練天界雪如銀雨過龍  
宮曉雲開貝闕真千年存故國八葉沛恩綸異俗敷文  
教通儒羨席珍一新唐號令不數漢和親磊落凌霄氣  
昂藏報主身鳴珂期不遠民瘼陞前陳

詩話京尹為諸生時夢受杖暗室中仰見廟額  
懸天上春回四字後任戶科給事中上疏劾嚴  
嵩父子詔廷杖六十請定邊典史恍惚前夢因  
賦詩云九重天上春回日二十年前夢裏身京



尹為今吉士慎行嗣琛高祖嘗出家集見示鈔  
撮數首近覓笥中散紙不得僅存長律一篇

明詩綜卷四十九

王好問 二首

好問字裕卿樂亭人嘉靖庚戌進士歷官南京  
戶部尚書贈太子少保有春照軒集

春江曲

東風度江城四山漾新綠江頭蕩舟人載酒過江曲少



婦白苧歌風吹斷還續春鳥似相依雙雙沙上浴

幽居

幽居少煩慮愛此屋上山嘉木蔭方池流水常潺湲東  
風弄晴和好鳥鳴關關觸目若有得撫景心自閒育哉  
廣成子望望不可攀

王叔杲一首

叔杲字陽德永嘉人嘉靖壬戌進士官至湖廣  
叅政有玉介園藁



詩話王氏為永嘉族望其先世毓生七子七子  
生二十八子二十八子生九十四子九十四子  
生二百六子二百六子生三百五十子參政其  
一也三百五十子生四百九十子其枝葉亦繁  
矣昌

初冬登大伾山

初冬飛蓋拂晴雲共陟嵯峨探秘文河勢已非神禹鑿  
山形還是太行分崖端想象懸金粟洞口虛無散紫氛  
登眺壯懷聊此寄酒闌歸路已斜曛

穆文熙四首



文熙字敬甫東明人嘉靖壬戌進士除行人進

司副遷工部員外改尚寶司丞轉吏部員外出

為廣東按察使有逍遙園集

石拱辰云敬甫早年詩頗豪宕摩鍊

既久遂臻大雅

詩話敬甫論詩沾沾自喜亦強作解事爾集為劉子威石拱辰所定又安得佳

送葉龍塘道長謫邵陽

重來燕市蹋紅塵  
驄馬憐君氣象新  
一疏即看成遠別

寒風冷雨入三秦



贈張弘軒都諫出叅晉省

馬度恒山萬嶺西  
天涯何處為招攜  
玄都莫道花如錦  
一日東風盡作泥

明詩綜卷五十

蘓潢一首

潢號杏石官王府審理

寫蘭寄王湘雲



幽蘭兩三花寫在齊紈扇寄語女校書秋來心莫變

張鳳翼 五首

鳳翼字伯起長洲人嘉靖甲子舉人有處實堂

集

詩話伯起好填詞梨園子弟多演之然俗筆耳其弟叔貽詩亦庸庸惟幼于小有才然亦頗情自放而吳人之詩比於四皇甫論其工拙判若雲淵矣

養蠶曲

曉露沾我襦採桑過南陌葉少不盈筐蠶飢妾行迫蠶



眠妾不眠絲成供夜織勞苦有如此方能成匹帛奈何  
衣帛人翦裁不復惜

西苑志感

芙蓉別殿未央西爐氣晨飄雉尾齊出洛神龜將寶錄  
銜花馴鹿遶金闈近臣拾翠供玄草使者乘驄訪碧雞  
一自六龍天上去幾回清禁改璇題

蟬

抱葉微沾露臨風響遏雲偶然鳴木末非欲使人聞



竹枝詞

妾從湘江歸君向湘江宿欲識淚痕多請看湘江竹

暮春感懷

野花開遍又殘春買櫝攜尊好及辰待得何平昏嫁畢

青山應笑白頭人

張獻翼一首

獻翼字幼予更名牧國子監生有文起堂正續

集

魏仲嘉云幼予資鑒超畝標峰削迥與兄伯起婉章新藻齊芬互映劉子威云幼予詮



詞清麗體舒興遠故能  
聲傾一時標映多士

詩話切于早擅才名見賞於文徵仲讀書上方  
山治平寺中撰周易約說雜說臆說及請易紀  
聞請易韻攷不失為儒生後乃狂易自肆與所  
善張孝節檢點故籍剽取古人越禮任誕之事  
排目分類仿而行之兩人為儔侶或歌或哭或  
紫衣挾伎或白足行乞孝資生日自為尸幼于  
率子弟總麻環哭上食設奠孝資坐而饗之翼  
日行卒哭禮設妓樂哭罷痛飲謂之收淚又有  
劉會卿典衣買歌者俄而病卒幼于持絮酒就  
其喪所哭之以詩復令會卿所狎歌姬為尸仍  
設雙俑夾侍作使伶人奏琵琶再作長歌酹焉  
其放浪亦甚矣晚攜妓居荒園中為盜所殺詩  
乘輿會源書  
無暇持揮



七夕同趙今燕賦

翠帳紅妝送客亭佳人眉黛遠山青  
試從天上看河漢今夜應無織女星

明詩綜卷五十五

林兆恩 一首

兆恩字谷子莆田人

詩話林谷子李卓吾閩中二異瑞也



題室

茫茫天地一閒身  
寄跡榕州今幾春  
日暮潮平沙欲合  
隔江還有未歸人

董宜陽 一首

宜陽字子元  
自號紫岡山樵  
上海諸生

初發谷陽夜泊追懷舊遊寄袁魯望

不寐嫌宵永  
殘星帶月明  
城烏喧夜柝  
岸葉亂秋聲  
世路悲今昔  
存亡念友生  
淒涼感舊賦  
轉見古人情



汪淮 一首

淮字禹乂休寧人有蘿山詩稿

聞報懷族孫時元

聞道東南寇烽煙處處昏  
倉皇悲客子流落向江村  
野曠雲迎陣人稀晝掩門  
更誰如漂母一飯識王孫

明詩綜卷五十六

黃鳳翔 三首



鳳翔字儀廷晉江人隆慶戊辰賜進士第二歷  
官南京禮部尚書贈太子少保諡文簡有田亭  
草

告歸發潞河作

方朔恒苦饑相如常病渴明時許乞身初衣辭魏闕  
車逐扁舟長河接溟渤舳舻爭唱呼鷗鷺閒出沒帆影  
日外落棹歌津頭歇舉酒酬暮雲卷簾對夜月悠然萬  
里心頓與江天豁



穆宗莊皇帝發引挽歌

垂衣方在御憑几那堪聞雨暗虞淵日星沉華渚雲周  
宮開翼室漢曲罷橫汾百辟趨蹌地傷心望紫氛

萬厯宮詞

霜毛鸚鵡傍雕闌巧舌依人似結歡白髮宮娃空墮淚  
先皇覓到不曾看

王家屏 六首

玉河新柳



水繞沙隄曲春看御柳眠柔條輕著雨嫩葉暗抽煙影  
落波間細陰垂檻外偏亭亭依漢苑遲日待鶯遷

沈一貫

一首

一貫字肩吾鄞人隆慶戊辰進士歷官少師兼  
太子太師吏部尚書中極殿大學士諡文恭有

喙鳴集

望西城宮殿

莫殿重開寶厯春竹宮長鎖屬車塵煙霞自護祈年閣



星斗曾傳醮夜辰  
帳裏流蘇閒甲乙  
爐中寒火憶庚申  
茂陵松柏蕭蕭老  
無復相如賦大人

侯堯封

二首

詠石牛

田入山鄉少時將  
孟夏終如何尚高卧  
不起助農功

劉元震

一首

元震字衍亨任丘人  
隆慶辛未進士歷官吏部

左侍郎掌詹事府教習庶吉士



月下聽琴

明河澹月挂疎林此夕張君綠綺琴一曲正堪清夜聽  
幾人先動故園心寒催兔杵霜前響靜愛龍脣泓下吟  
流水高山意何限遙遙天路彩雲深

黃洪憲

五首

洪憲字懋忠嘉興人隆慶辛未進士改庶吉士  
除編修奉使朝鮮還進侍讀歷右庶子陞少詹  
事掌翰林院事有碧山學士集



觀蘭亭修禊圖

夙昔秉微尚縱情寄丘壑  
晞髮秦稽陽俯觀但寥廓  
蘭亭被荒丘羣賢不能作  
風生松下寒月出雲上  
薄觴咏已無歡墨妙虛有託  
崇峻迹未殊清朗又如昨  
彭殤誰見齊庶幾達者樂

穆宗莊皇帝輓歌 二首

祇德符神禹成功紹帝堯  
冠裳臨萬國干羽格三苗  
碧嶂龍輶入青林鳳翼遙  
淚痕消不盡斑竹日蕭蕭



魚鉤開清禁鑾車出紫薇忽移丹仗去空憶翠華歸天  
路應非遠人寰惜永違霸陵秋色裏愁見白雲飛

山海關

長城古堞俯滄瀛百二河山擁上京銀海仙槎來漢使  
玉關秋草戍秦兵星臨尾部雙龍合月照平沙萬馬明  
聞道遼陽飛羽急書生急欲請長纓

別許都監

萍水他鄉聚多君傾蓋懽九秋迎使節千里送征鞍久



客歸心切孤亭別袂寒遠星江上落殘月馬頭看豈不  
懷瓊玖無因託羽翰相思不得見努力且加餐

劉元卿一首

元卿字調甫安福人隆慶庚午舉人徵授國子

監博士遷禮部主事有山居草

別王以忠

王桀樓前賦梁鴻廬下居死生奚不可歸去復何如計  
日浮炎海經時返故廬憑將越溪水還寄八行書



明詩綜卷五十七

李三才 六首

和李茂才春日見寄

滿路生芳草歸心羨馬蹄何當明主棄遂作故園栖  
梅柳愁爭發山河望轉迷忍貪朱紱貴一任白頭低

李化龍 五首

化龍字于田長垣人萬歷甲戌進士除嵩縣知  
縣陞南京工部主事歷郎中改吏部出為河南



提學僉事轉參議遷山東提學副使轉河南參政入為太僕少卿陞右通政以右僉都御史督川湖雲貴以工部右侍郎督河道入為兵部尚書加少保晉少傅兼太子太保卒贈太師謚襄毅有李襄毅公詩文彙

詩話于田詩雖沿王李餘波然頗稜稜露爽乃或以其為胡元瑞所稱譏其醲厚肥腴而棄之不錄未免矯枉也

古行路難



君不見鳳凰臺前人已去後人來又不見長千里昔時  
樓榭今荆杞白雲蒼狗只須臾世間反覆何所無衛青  
未遇平陽奴衛青既貴平陽夫萬事無如眼前好守株  
待兔何為乎

秋日飲張司理

關河秋色晚蒼蒼江畔逢君更憶鄉海內弟兄多意氣  
天涯雲物總淒涼三山木落啼猿急八月風高旅雁長  
此夕燈前拚盡醉故人明日權相將



登醫無閭山

天柱高標九域東，振衣萬里受雄風。  
雲煙低擁黃龍府，日月高懸黑帝宮。  
截海帆檣來徼外，防秋士馬下回中。  
分明半壁歸撐拄，合有明禋禮上公。

題清苑涇陽驛壁 二首

短牆小屋柳垂垂，二十年前此咏詩。  
今日重來無覓處，空餘烏鵲繞寒枝。

南去北來枉自嗟，閒愁贏得鬢生華。  
數行遺墨猶難保，



何況玄都觀裏花

鄒迪光

六首

迪光字彥吉無錫人萬歷甲戌進士除工部主  
事歷員外郎中出知黃州府陞福建提學副使  
左遷浙江僉事調湖廣提學僉事有鬱儀樓調  
象菴始青閣諸集

詩話彥吉詩材庸熟望而  
生憎絕句差清婉可誦

行經舊院



曲房深院草萋萋不見嬌鶯滿樹啼  
惟有秦淮舊時月夜深相送板橋西

沈淵淵置妾金陵為作花燭詩

蘭缸四照月痕新繡帳牙牀疊錦裯  
不羨鄰家金作屋請看夫婿玉為人

賦得西湖柳

一種腰肢浥露妍湖光占得倍堪憐  
縱然春盡須飄泊只在瑤箏錦瑟邊



西湖竹枝詞

杏子單衫窄地長  
裙拖八幅石榴香  
只知此日遨遊好  
不信蠶家四月忙

澄江舟行

夕陽秋色布帆懸  
霜葉霜花送客船  
雨過鳥啼多竹外  
月明人語在沙邊

逐臣

桄榔木落嶺猿啼  
瘴海蠻煙路欲迷  
回首銅駝三萬里



不知何日下金雞

朱期至 一首

期至字子得蘄水人萬歷甲戌進士除戶部主  
事歷員外郎中終懷慶府有王屋山人集

送蔣太守之瓊州

五羊南去客星孤銅柱遙分使者符為語越裳諸屬國  
清時不用貢珊瑚



明詩綜卷五十八

陸可教

三首

可教字敬承蘭谿人萬厯丁丑進士改庶吉士  
除編修歷官南京禮部右侍郎有學士遺橐

吳宮引

姑蘇臺前鳥飛絕西施醉舞吳宮月  
織桂長袖香不歇銀燭金釭半明滅  
羅帳流蘇四垂結銅壺丁丁漏水咽  
伍胥大夫雙胛裂



春日郊游

出郊時駐馬物色澹春陰  
偶爾耽幽賞因之愜素心  
人家隔水見僧院入花深  
似覺仙源近迷津未可尋

陶山幽棲寺

萬山迴合隱招提聞說鷓夷舊此棲  
三策早知能霸越千金何意復居齊  
人尋古洞穿雲入木落層巖聽鳥啼  
欲向山僧論往事五湖烟櫂至今迷

黃克纘

一首



克纘字紹夫晉江人萬厯庚辰進士除壽州知  
州入為刑部員外累官太子太保兵刑工吏四  
部尚書有數馬集

將出都門和潘王見懷韻

平臺跋履憶當年榆莢楊花四月天授簡總慚枚叔賦  
耽詩獨記楚王賢寒嘶匹馬春明外晴落孤鴻魏闕前  
南去虔州千萬里薊門章水各風烟

許弘綱一首



弘綱字張之東陽人萬厯庚辰進士除績溪知

縣累官南京兵部尚書

丁酉再告

多病年來不耐官柴門柳色意中看偏於蓴菜思張翰  
自分圍棋老謝安長日生涯惟點易故人書問且加餐  
畫溪烟雨春蓑綠重與君王乞釣竿

明詩綜卷五十九



朱國祚 五十八首

嘉禧寺

山牆圍作化人城  
榆柳陰濃信客行  
始信精廬風日好  
秋深猶綠牡丹坪

江上夜泊

江上扁舟一葉輕  
夜深燈火滅還明  
枕函未作寒山夢  
卧聽潮聲帶雨聲

梅家蕩櫂歌



梅家蕩口蜆子黃瓜皮罾船七尺長剪取東園白頭韭  
蛤蜊風味勝橫塘

李廷機 一首

廷機字爾張晉江人萬歷癸未賜進士第二授  
編修歷官太子太保禮部尚書文淵閣大學士  
贈少保謚文節有集

靜志居詩話文節清畏人知奈為黨論所攻攢  
機疎誚而君子之守確然生時以帖括名詩非  
專務聞蟬一  
絕正自翩翩



雨霽聞蟬

五雲初霽曙光流  
垂柳千條蔭御溝  
兩岸新蟬啼不住  
隔林遙送漢宮秋

郭正域

三首

正域字美命江夏人萬歷癸未進士改庶吉士  
授編修歷中允諭德庶子遷南京國子監祭酒  
入為詹事掌翰林院升禮部右侍郎卒謚文毅  
有黃離草



詩以文毅坐妖書繫獄九死不悔可謂骨鯁之  
臣其論樂府云今人全用擬議而無變化令人  
讀之如挾陳人口中珠殆為于鱗輩發也又言  
文章不可學一家詩必自三百篇漢魏六朝下  
至唐人皆在胸中筆底乃稱  
作家蓋有志而未造其詣者

### 長安道

長安道春無花夏無草何不歸來山中好

### 遣祀景陵恭紀

宣皇陵廟天山裏王氣蔥蔥鎖帝梧只見丹臺餘寶鼎  
不聞銀海繞金鳧千官露舄朝珠隴五夜雲車下紫都



記得當年巡幸日道傍駐輦問農夫

宣德十年事

廬山五老峰

湖中五老峰去天不盈尺澗底白雲生五老頭俱白

朱長春

十二首

長春字太復烏程人萬歷癸未進士知尉城常熟陽信三縣入為刑部主事削籍有太復文集

詩話太復頗類孫太初其宰陽信狀海濱風土如海時雲連舍春寒雨近城沙田惟種黍園井不通泉過雨如霑雪無風自落沙白沙風裏下黃日霧中生薄祿供囊藥齋厨費水錢頗盡其



致他如折藕露華白采菱秋水香悠然西湖曲  
坐對南屏山高樹晨光動空山衆響聞麥花來  
社燕小雨破春泥落日餘高柳空江起暮鐘酒  
船晴盡出賽鼓暝猶聞纜外春沙沒燈前獨樹  
斜蒼藤緣戶結羣鳥落階飛驛火依沙出春星  
倚浦懸孤飛江上鳥半滅雨中山皆秀句也晚  
學修真鍊形蓋不得志而有託乃或訕其登  
梯累十重學耕耨而墮地幾殞殆未必然

秋日詠懷

白雲自西來經風忽從東鳴鳩化蒼鷹世變安有窮昔  
種蕙蘭花將以遺所同一人懷一心兩心故難終鷓鴣  
熙春陽蟋蟀吟秋風萬類各有時吾其守愚庸



出三江口南下

日出漾清渚三江帆正開白憐茅步

山名

過青見苧蘿

邨名

來海氣如秋雨春潮似薄雷空餘好山水已是越中回

赴歷下塗中作

白日散原霧秋光照井閭海田秋歲早寒木落風初天  
地身長滯風塵役未除病夫心尚壯不敢憶鱸魚

舜廟

玉座垂衣古秋風謁帝祠蒼梧狩不反黃屋儼如斯石



鎖青苔井松巢白鶴枝歷山千古淚泉響至今悲

發縣次日過鹽山

宿雪古原清川陵動客情啼鳥非昨日嘶馬復空城世  
路勞為役生涯恥薄名十年一墨綬暫解也身輕

六月復病寄弟

白霧連春瘴長風起夏寒三年幾死客每病欲休官短  
髮催初服空牀媿素餐行藏日夜淚謀及室人難

再贈伯念



茂陵多病日詩句轉清新麗藻看時輩窮愁近古人  
蓴絲吳苑暮蘭草楚江春珍重凌雲賦君王問侍臣

對月

千乘城西百尺臺九河沙曲斷潮迴邊隅落日風常慘  
海口初春霧未開南國漸遙空夢斷北人雖近少書來  
自然對月淚堪下何況啼鳥聲更催

對雪

狂風吹雪海荒荒遊子將歸尚卧牀二月天邊未花草



三年寒色故衣裳即看慘澹迷虛牖轉復霏微壓短牆  
寄語東皇休更妒暫開春暖放還鄉

移家

翠竹新栽映白沙碧湖深處此吾家欲逃城市移居遠  
頗有山林發興賒野鳥乍過窺几席鄰人相見饋魚鰕  
蓬蒿不比揚雄宅翻喜門無載酒車

端午

菖蒲艾葉泛杯香午酌曾軒對雨涼野水茅籬三徑竹



貧家風俗五絲囊轉因卧病朝參嬾不是逃名隱興長  
長憶九華明月扇漢廷此日賜諸郎

入山

山深石色古洞草無行迹何處有人家朝烟澗西白

明詩綜卷六十

何喬遠

一首

喬遠字稚孝晉江人萬厯丙戌進士除刑部主



事改禮部歷員外郎中謫廣西布政司經歷起  
光祿少卿遷太僕少卿轉左通政歷光祿卿通  
政使升戶部侍郎有鏡山何氏前後集

湘南雜興

桂林秋色滿清湘天畔登臺百粵長南入交州多薏苡  
東來海國有扶桑雲浮衡嶽窺三楚風馭羅浮限五羊  
鴻鴈稻梁無信息不知何地望江鄉

全天敘

一首



天敘字伯典鄞縣人萬厯丙戌進士改庶吉士  
授編修歷官侍讀學士天啟初追贈禮部右侍  
郎有鐵菴集

曉望

巖壑開新霽秋容倍可憐雲中聞水碓竹裏出廚烟捷  
鼠穿松徑飢鳥啄芋田閔農知感激瘠土幸豐年

丁元薦 一首

元薦字長孺長興人萬厯丙戌進士除中書舍



人歷尚寶少卿有尊拙堂集

馬君常云先生立朝未淹期月痛哭

言天下事皆關繫國是維持清議遺文幸在風範儼然匪汎同風雲月露之什也

詩話慎所仕無言責而彊直自隨屢折不回劉啟東目為名臣第一高景逸亦謂正氣足以千古蓋東林諸公推許若是其作五君詠於許孟中云夫子多苦心河津有正路於沈純父云之子排天門隻手驅豐隆雖以贈友君子以為自道也

秋日廣寧園急有懷仲父

仲父參戎幕遙聞羽檄飛官貧生事拙將弱壯心違客  
夢關雲杳家書塞鴈稀日歸腸欲斷何計突重圍



劉黃裳 一首

黃裳字玄子光州人萬厯丙戌進士除刑部主  
事歷兵部郎中有藏徵館集

題小李將軍畫

畫山何得用金碧小李將軍創其蹟近來僅數仇十洲  
筆法雖工損氣格當年傳說文皇時陰山之旁陳六師  
連峰疊嶂出大漠金碧照面光參差馬上大叫龍顏喜  
世間山色無如此天開圖畫北海間小李將軍筆法是



乃知將軍之畫有所傳即如此幅何工妍瑯樓翠閣空  
中懸綠松片片龍鱗然將軍逝後八百年猶有生氣飛  
紫烟堂中風吹山欲動耳邊飛瀑鳴濺濺樓中之仙身  
似鶴珊瑚鈎卷明珠箔蓬島能移席上開雲霞攬取尊  
前落鄭生才高類此峰相邀把酒弄山松披襟若坐翠  
山裏海上羣仙爾定逢

周獻臣

一首

獻臣字歙六臨川人萬歷丙戌進士除太康知



縣改許州學正遷國子監博士升南京刑部主  
事京察謫福建布政司檢校轉龍安府推官有

鷺林外編

道路憶家園

謝豹啼殘麥燕飛山花伴客送春歸家園此日無人賞  
社雨冥濛掩竹扉

焦竑 二首

竑字弱侯上元人萬厯己丑賜進士第一授翰



林修撰謫福寧州同知追謚文憲有漪園集

詩話修撰晚振魏科仕雖不達公望歸之亳州  
李文友仁卿詩云文章南國多門下翰墨西園  
集上才蓋實錄也詩特寄興若儲書之富  
幾勝中簿多手自抄撮惜近年俱散佚矣

西園

林皋颯欲秋閒園自成步駕言城郭遊翻愜滄洲趣臨  
深杳難即躋險倏可度危藤緣澗上遠岫當窓露崖壑  
既盤紆竹木亦交互怪石森餘株清川貫中路微雨逗  
涼颼煩暑漸以去同人自相將杯酒豁情愔棲遲少日



懷緬邈平生故流光豈不邁延賞未云暮詠歸各怡然  
撫景謝良晤

絕句

花明月淡海天秋三十六重烟雨樓數載欲歸歸未得  
看君先上木蘭舟

吳道南

一首

道南字會甫崇仁人萬歷己丑賜進士第二授  
編修歷中允諭德少詹事兼侍讀學士遷禮部



右侍郎以憂去召拜禮部尚書兼東閣大學士  
進太子太保戶部尚書兼文淵閣大學士贈少

保謚文恪有曙谷集

詩話古之國史恒以本朝之人述當代之事故  
文獻足徵出於一家者無論已光武注紀定於  
永平武德貞觀國史成於顯慶宋則兩朝三朝  
五朝七朝四朝先後撰述榻前論議斯時政有  
紀柱下見聞斯起居有注類而次之謂之日歷  
修而成之謂之實錄然後一代之典備焉明則  
第有實錄實訓而已建文草除景泰附錄何以  
成一代之典章善夫吳文恪之言曰曾南面者  
當知史不可滅之義曾北面者當思名必先正  
之文是兩朝帝紀不可不特書也萬厯甲午允



大學士陳文獻公之請詔工部葺史館禮部自  
尚書下同詹事春坊司經局翰林諸臣分門受  
事先太傅文恪公領修孝宗大紀而吳文恪公  
領修河渠志今載集中惜文憲公逝不獲竟其  
事今其條目志之類二十有二傳之類二十有  
六讀吳公正史議其大略猶可觀也然如中官  
之驕橫土司之順逆顧獨遺之  
何與因錄吳公詩附識於此

### 送朱養淳太史典試江右

紫陌新輶夾道看詞臣分命出金鑾片帆左蠡乘新漲  
一榻秋屏對早寒南國文裁運斤手西江派重采詩官  
何當更問問閭苦歸與君王策治安



陶望齡

六首

夜泊桃源

迢遞憐行役其如客思何孤雲將短櫂十月渡黃河水  
泊兼鷗宿霜清聽鴈過更堪寒夜盡歌枕遠鐘多

途中雜詩

一騎風塵裏千山縣郭東畏塗逢落日別思對孤鴻仗  
策心逾遠談詩氣更雄驅馳丈夫事不必恨飄蓬

沛縣過高帝廟



路經舊沛山川古龍起中原戰國多一代雄圖開赤市  
千秋遺廟傍黃河雲歸尚識真人氣風起猶傳壯士歌  
魂魄來游長此地漢宮秋之近如何

塗中雜詩

風塵忽換舊鬢寒之偏侵紫帽上馬踏一邛月迴鞭避

一作迎  
雷度獨木橋

董其昌 六首

其昌字玄宰松江華亭人萬曆己丑進士改庶



吉士除編修出為湖廣提學副使召入為太常

卿歷遷禮部尚書追諡文敏有容臺集

詩話趙承旨註大政尚書亦註大政內公書畫  
三足相當畫詩三下如楚鵲皮之亭我鴻之堂  
風流弘  
長一也

送陸伯生歸吳

神皋落木後秋水灌河時鄉夢催游子川程訪櫟師自  
憐玄尚白未遣素為緇等是春明路閒雲不可羈

望岱



百里看山眼迢遙岱色分  
應為天下雨不斷封中雲  
漢簡千秋祕秦松萬壑聞  
何當馳匹練高揖碧霞君

同唐元徵宮允游善權洞

神功開混沌水府亘氤氲  
峽隱將飛石巖垂欲墮雲  
龍堂陰壑迴鳥道亂泉分  
今日摩崖記知同藏史羣

送范爾孚北歸

旅食同千里分襟此一時  
烟沙征路遠風雨客帆遲  
鄉夢隨芳草春愁帶柳枝  
平生任慷慨能不灑臨歧



登翠微亭

烟迷楊柳洲水拍芙蓉岸我憶南湖秋西山暮雲畔

題畫

近水晚逾碧遠山秋未黃夕陽寒滿地松影落衣裳

孫羽侯

四首

羽侯字鵬初華容人萬厯己丑進士改庶吉士

授禮科給事中有遂初堂集

小除日登玄石山歷石門七女諸峰



歲暮野遨遊駕言陟層嶂萬木日蕭疎十里峰遙向高  
高玄石山獨立心怡曠巨人跡夏竒雲母泉清漾中與  
石門連絕境凌蓬閭黃精神女供丹藥羣仙藏松檜蟠  
靈根衣冠閤深窅葵嶺雪競晴暉崖瀑散餘瘴強臺意愜  
多仙廬懷恣放江湖左右流鹿豕朝昏傍俯視貌培塿  
四顧離塵埃安得同廬敖八極隨筇杖

春園雜詩

二首

到處徵求苦蕭然老一丘誅茅揚子宅種橘李衡洲濁



酒人間世青門故里侯梁鴻亦有婦隱計誰相投  
野曠炊烟迴江深宿霧重藥苗經雨長竹筍破苔封  
高枕移清晝深杯到夕春柴門無過客病體得從容

擬古樂府

郎船泊湖頭儂船傍湖曲夜半風浪生移船相並宿



明詩綜卷六十二

王在晉 一首

在晉字明初太倉州人

履歷注  
濬縣

萬曆壬辰進士

除中書舍人歷官太子少保兵部尚書有龍沙

會草越鐫楚編蘭江集遼海集西湖小草

道旁歌

莫作道傍民道傍之民多苦辛莫作道傍舍道上之人  
行徹夜南來北往齊叩門只聞門外聲爭喧厨下無薪



馬無料暮夜行人索火照官家不聞給一錢  
叫呼不應揮長鞭  
紆如已急三更鼓道路之人走傍午五里一堡  
寒無烟寒落人家不得眠  
貴人如此夜行促點火無茅  
且拆屋

徐必達

一首

必達字德夫嘉興人萬厯壬辰進士知太湖溧  
水二縣升南吏部主事累官南京兵部左侍郎  
有南州草



讌集中山

幘山山寺倚江隈  
脫幘仙人去不迴  
華頂峰連雙塔迴  
海門潮湧片帆來  
疎松礙月娟娟淨  
細竹含風个个開  
握手共成雲外契  
一回清話一傾杯

岳和聲一首

和聲字爾律嘉興人萬厯壬辰進士除汝陽知  
縣入為禮部主事遷員外郎出知慶遠府調贛  
州以憂歸補東昌升福建提學副使轉廣西參



政以右僉都御史巡撫延綏有餐微子集

柳林操

并序

秣陵有柳林者建文殉難臣黃侍中觀暨夫人  
二女墓在焉侍中奉詔勤王夫人知必及于難  
先事招魂葬之江上而後自沉于江兩女并溺  
死岳子展其墓而悲之作柳林操

河瀰瀰兮白日翳露塗塗兮不可以履吾足陷於汙泥  
兮不如其蹈於水上顧滄浪之天兮下竦夫子



金忠士 二首

忠士字元卿宿江人萬厯壬辰進士除樂平知  
縣擢廣西道御史巡按貴州浙江河南轉福建  
左參政累官右僉都御史巡撫延綏卒贈兵部  
右侍郎有旭山集

瞻尼父像

瞻彼百泉流春來何澠潏新廟貌崔嵬儼存尼父像日  
月雖遞更素王靈不爽俎豆有明禋光輝在吾鄙瞻依



適所願聖門如指掌嗟哉戶外人宮牆隔天壤

慨時

黃怕朱幡紫貝囊朱衣小隊儼成行奉何教使留都去  
為摘楊梅四月嘗

李日華 十首

日華字君實嘉興人萬曆壬辰進士除九江府  
推官謫汝州判官轉西華知縣徵遷南京禮部  
主事升尚寶司丞歷太僕少卿有恬致堂集



詩話太僕怡澹自持居官日淺優游田里以法  
書名素自娛家近春波橋為吳仲圭舊里暇寫  
墨竹兼擅雲山其詩非選非唐別裁風格頗與  
王辰玉陳仲醇同流微尚纖豔近家宴集語

### 石佛寺冰鑑房

秋來風日好瀟灑放輕船僧院房房竹沙村處處橋清  
吟黃葉句雅坐白雲寮妙悟仍相許時煩慧遠招

### 挽吳少君

海上孤明月天南失少微江山餘涕淚冠蓋盡欷歔  
咽莓苔井雲封薜荔衣梅花三萬樹差可想容輝



春日送徐岡卿北上

青莎白鷺洲細雨桃花岸看乘春水船遙遙到天畔

題海湛畫卷

溪漁罷釣歸殘雪蓑上落暝色踏扁舟翩然似孤鶴

贈顧長卿

碧梧風葉響虛廊細葛輕含午夜涼不獨疎螢能照字

明河高映讀書堂

山居絕句

二首



雪花撩亂撲春蟲  
擁褐單牀睡思濃  
夢裏一聲聞折竹  
呼僮亟從小盆松

四月雨晴山路香  
松花灑地鶴翎黃  
輕衫短笠荷鉏去  
斲得青芝一尺長

贈維揚王孝廉中玄

蕪城春雨漲江沙  
沙上紅樓映遠花  
一抹濃烟萬株柳  
紫騮嘶入玉鉤斜

贈陳禹玉



木蘭零落海棠殘風雨蕭蕭欲釀寒  
花氣曉來渾不定  
暗隨春夢到江干

書贈小友張叔度

張緒風流正妙年一春常自手芸編  
偶隨草色湖隄去  
醉裏逢人墮馬鞭

韓上桂 一首

上桂字孟郁南海人萬厯甲午舉人  
天啓初以  
學官上公車遷南京國子監博士



歸里

栗里歸來尚未荒  
蒹葭深處水周堂  
一雙白鴨對人語  
七尺青梭共我長  
耨子能尋蝴蝶繭  
村姑不少鷓鴣香  
此中嘯傲倏然足  
休對仙家問海桑

明詩綜卷六十三

湯賓尹 一首

賓尹字嘉賓宣城人萬厯乙未賜進士第二授



翰林院編修歷中允諭德掌司業事遷右庶子  
升南國子監祭酒有睡菴集

詩話嘉賓以黨論受攢譏終以不振詩派  
近但罕足錄者詩中所弔懷寧於國重也

弔同年友於鼎李

落木淒淒江水渾行吟澤畔已聲吞三年地下君安否  
人世風波不可言

蔡復一 二首

復一字敬夫同安人萬歷乙未進士除刑部主



事歷負外郎中出為湖廣參政遷按察使仕至

兵部右侍郎諡清憲有遜菴詩集

詩話景陵之邪說行率先倒戈者蔡敬夫也其  
駢體亦不屑猶人亡友漢陽王亦世最賞之然  
以詩論寧取  
彼而舍此矣

秋坐

夕照盡歸水秋聲半在林飛蟬過別樹未斷曳來

一作  
舊枝

音

夕陽



夕陽欲下山一半戀流水短笛牛羊歸餘光照童子

查應光 一首

應光字賓王休寧人萬厯丁酉舉人有麗崎軒

集

澹碧軒

門開日影來一片蒼苔色花氣引游人山風吹未息

顧起元 六首



起元字太初江寧人萬厯戊戌賜進士第三除翰林編修累遷南京國子監祭酒終吏部右侍郎兼翰林侍讀學士諡文莊有嬾真草堂集  
遯園漫稿

方正學先生祠墓

白馬魂空結丹蛇讖豈真九重原叔姪一死自君臣鼎  
鑊當時事蒸嘗異代人西山一抔土寂寞亦冬春  
君葬於西山  
不封不樹



熊廷弼 一首

廷弼字非伯江夏人萬曆戊戌進士除保定推  
官入為工部主事擢浙江道御史巡按遼東提  
學應天遷大理寺丞以兵部右侍郎右僉都御  
史經畧遼東駐山海關進尚書兵潰棄市傳首  
九邊有性氣先生集

新卜東園

為愛池塘好辟喧  
新開別業向東原  
梅山樹遶斜連谷



蓮渚橋通直到門傳是舊時花柳巷  
竭來漫作桔槔園  
主人初領林泉事  
鎮日經營不憚煩

陳邦瞻 四首

江南樂

鷓鴣南枝鳥愁從北鴈去  
儂家在江南但愛江南住

董應舉 二首

應舉字崇相閩縣人萬歷戊戌進士授廣州府



教授升國子博士歷吏部郎中南京大理寺  
丞太常少卿太僕卿終工部右侍郎有董崇相

集

雜作

小官事大官曲意逢其喜事親能若茲豈不成孝子

丙寅聞邊報

出山已分沙場死今日生還亦主恩忽報遼陽飛騎近  
白頭垂泣向江門



何棟如 一首

棟如字子極無錫人萬厯戊戌進士除襄陽府  
推官以阻礦被逮起南兵部主事升太僕少卿  
監山海軍有南音攝園二集

午日秦淮雜詠

深潭日落停舟滿高柳橋迴夾岸齊燈影不分波下上  
人聲莫辨水東西



范鳳翼 二首

鳳翼字異羽南直隸通州人萬歷戊戌進士除  
灤州知州屢遷吏部郎中天啓初歷尚寶少卿  
以朋黨落職崇禎初起復尋遷光祿少卿有勲

卿集

鄭玄岳云公在吏部以用賢遠姦為已任  
有一君子必亟進之如顏端文高忠憲是

也有一小人必亟退之如楊慎杜原牛惟昭是  
也其兄善如渴見不善如離而忌者至矣以八  
年里居之官而星拾遺之疏以十七年不入都  
門之人而奉削奪之旨公獨處之怡然所謂德  
音不瑕者與



水閣

涼颼動水閣卷幔坐能幽竹嶼連朝雨荷池三伏秋茶  
聲入高枕花氣上層樓鎮日無人到凭欄數白鷗

夏日李後岡先生五柳園讌集

三徑何幽勝居然陶令家涼風鳴豆葉疎雨落桐花虛  
院疑秋早深林信日斜最憐塵事隔心賞足烟霞

秋日渡江

瓜渚輕舸破浪風金焦山麓亂流中秋高不避波濤險



欲看江南柿葉紅

鄧雲霄 一首

雲霄字玄度東莞人萬厯戊戌進士除長洲知縣徵授南京戶科給事中升湖廣僉事厯四川右參政湖廣左參議降陝西僉事調廣西升右參政有百花洲集

隄上行

萬井樓臺落鏡中環隄處處小橋通吳娃慣蕩蓮舟劇



水淺沙明不畏風

黃汝亨

一首

汝亨字貞父仁和人萬曆戊戌進士授進賢知縣升南京工部主事歷禮部郎中出為江西提學僉事轉參議有寓庸集

西山

悠悠逆旅間忽忽意不展振策西掖門佇覽西山巘北風紛車塵曉日出林岵遵塗泛洲渚披草踐平行水清



既近矚峰遠亦流緬故術尋嶺嶽新蹊遞深淺靈巖恣  
冥搜秋容歷餘眇營魄境互託貴賤理無選微尚儻有  
愜非譽自茲遣

張履正

三首

送張二府擢太平守

南粵羈縻地旌旄漢守行解維春浪濶到日夏雲生風  
掃蠻天瘴威傳遠徼名聖君應有意賴爾作長城



明詩綜卷六十四

熊明遇一首

明遇字子良進賢人萬厯辛丑進士除長興知縣徵授禮部主事擢兵科給事中出為福建僉事轉陝西參議召為尚寶少卿轉太僕少卿升右僉都御史兵部左侍郎拜南京刑部尚書改兵部尚書有綠雪樓集

釣舟



竹竿溪上釣魚舟  
洞口桃花信水流  
曉月半輪新雨霽  
春山缺處是嚴州

茅瑞徵 二首

瑞徵字伯符歸安人萬曆辛丑進士除知泗水

調黃岡擢兵部主事歷郎中終南京光祿寺卿

贈大理寺卿有澹樸齋集

詩話大理鹿門從孫家世饒裕鹿門孜孜治生  
大理耽情吟詠雁官有康吏之目壯年即解組  
郎田自叙云炙手不知炙下石不知險脂膏不  
知潤軒冕不知榮胸無機械意無好醜殆天下



之至愚人也因自號苦上愚公官職方時  
著有象胥錄三大征考詩亦真率自喜

### 彭城懷古

望彭城彭城面面水環匝與城平君不見馬中赤兔人  
中布引水灌城走無路

### 送薛駕部還陝

朔風日以厲蒲軫超西秦行行歸古鄉而我失所親與  
君同舍郎况乃託比鄰相望朝與夕綢繆亦有因一旦  
出門辭飛飛關陝塵仰盼浮雲駛悵然憶遠人懸知經



歲別分手自愴神願展平生意河梁寫其真聊將盈尊  
醪叙此離情新我亦賦歸來離合難具陳

徐禎稷 三首

澱湖

雪浪堆三泖風帆挂澱湖斷雲收雨淨高樹入秋孤暮  
色諸峰碧寒聲一鴈呼滄浪歌罷去漁父定吾徒

浦口望金陵

千金紫陌駐遊驂繡閣銀燈酒半酣十四年來魂夢斷



今朝江北望江南

張

鼎

八首

鼎字世調松江華亭人萬厯甲辰進士改庶吉  
士授檢討歷國子監司業諭德庶子少詹事升  
禮部右侍郎加太子賓客落職起南吏部右侍  
郎掌詹事府事有寶日堂集

南山猛虎行并序

景州道上官餉四千二百暴客十六人白晝被



劫作南山猛虎行

南山虎北山盜行路難三河道三河健兒氣縱橫彎弧  
躍馬矢鏑鳴征車鱗鱗出官路官錢私錢走如鶩官錢  
押解濟遼軍私錢與販資商賈河東一路村無烟枯楊  
荒草六月天車夫汗喘車輪折百里五十行不前霹靂  
一聲呼廣漠壯夫墮馬魂膽落止求買命不求錢官錢  
破櫝私傾囊何圖遼餉四千餘景州白日供搜攫刺史  
傾家上已空地地方捕盜捕虎同



援兵謠

老翁卧牀覆牛衣老嫗當牕績繭絲小兒竈上戛釜糜  
糜薄不充兒腹饑驚聞一聲叩門急彎弓帶箭橫攔入  
小兒哭走牀下匿曳翁下牀相煎逼驅嫗取火急烹煮  
東鄰買酒西鄰黍東西兩家各受兵一粒一滴不肯予  
老翁老嫗跪痛哭今日腹中昨日粥賣衣典袴止百錢  
獻與長官來折乾長官出門氣如虎走往前街尋大戶  
前街大戶緊閉門以石敲破翻怒嗔直入卧內據牀裯



一女含羞各奔竄竈前火滅入影斷纔供醉飽一隊過  
後隊又到須徵辦

登醫巫閭山絕頂挾一老僧以從放歌

神州五岳神所居遼西乃有醫巫閭長城不能斷地脈  
靈氣盤結東扶餘翠屏萬疊遮大漠危峰千尺凌清虛  
砂頭西奔似駭浪山勢北曳同衣袖石壁巉巉俯絕壑  
泉流滴滴下深渠鼉岡硨磲苦折屐鳥道盤屈驚推車  
逶迤百折山之半別開一洞棲猿狙山樓突兀鑿新磴



佛火荒涼依舊廬  
攀厓披棘上絕頂  
天風欲墮吹襟裾  
何當一掃狼烟息  
山巔可勒燕然書

送茂倩侄官南水部歸省

悲哉是秋氣黯爾別銷魂  
九月黃花節三家白酒邨  
砧鳴驛夢曉笳動戰塵昏  
行矣東方騎高堂正倚門

清音閣同平仲夜話

平子吾宗望相逢此地遊  
湖山同是客雲物已先秋  
北嶺看松路西溪聽雨舟  
眼中惟爾我沉醉坐江頭



過大名舊城

日落征途訪故宮  
行人指點舊天雄  
女牆斷續牛羊下  
墟墓高低禾黍中  
漳水不堪添夜雨  
澶碑依舊立秋風  
古來河北關興廢  
一說干戈恨未窮

唐中翰束抑辭講筵  
出佐浙醯戲贈鹽字韻一律  
并懷其二仲中甫熙甫

青案翻經職典籤  
亭亭玉樹謝家簷  
前籌借箸海為賦  
舊學調梅羹作鹽  
篋筆長騰池上彩  
賜衣猶翦尚方鎌



斷橋鴈影孤山月幾度懷人試卷簾

樓居春暮

春事初殘雨一犁豆苗瓜蔓長春畦客來烹茗供新水  
興到銜杯續舊題剩有圖書翻枕上總無亭館近溪西  
小樓日出朝眠穩為語流鶯莫亂啼

過庭訓一首

庭訓字爾韜平湖人萬厯甲辰進士除江陵知  
縣擢雲南道御史督學南畿遷江西參政轉福



建按察使升應天府丞有平平草

辛酉秋日游茅山

海內真靈居茅山踞如虎舊傳三弟兄各作一峰主  
仙人長往來華陽稱洞府百里借遊遨信宿樂茲土  
是時秋正清諸峰可歷數高觀揭天中時有白鶴舞  
地肺豈虛名真誥傳自古何當騎茅龍宣復戀圭組

劉遵憲一首

遵憲字可權大名人萬厯甲辰進士除壽張知



縣調滋陽升戶部主事累官兵部尚書改工部  
加太子太保有恕醉齋集

寄書兒曹修葺山居

自悔出山誤由來歸夢頻每看客邸月偏憶故園春鳴

鳥驚時變叢荒著雨新可憐湖石畔只少白頭人

王湛求云

香山詩歌舞屏風花障上幾時曾畫白頭人惟白頭不入畫屏此湖石畔不可少也

凌漢艸一首

漢艸字峻卿長洲人萬厯甲辰進士除福清知



縣選陝西道御史贈大理寺卿

詩話張子野吳興寒食詞中庭月色正清明無  
數楊花過無影余嘗歎其工絕在世所傳三影  
之上詠梅者類取材於疎影暗香侍  
御獨以無影形容之亦奪胎法也

詠梅

玉蘂含風香苔杖帶霜冷夜靜月冥濛空庭卧無影

明詩綜卷六十五

丘兆麟一首



兆麟字毛伯臨川人萬厯庚戌進士除行人選  
授雲南道御史升太僕少卿以右僉都御史巡  
撫河南有玉書庭集

汾河

四月汾河濱運艘千百樣我舟銜尾來偶與同起止八  
牖閉九日一旬得百里前途牖更繁閉者轉難啓轉漕  
四十斛至僅一石爾庶土勤輸將咽喉實在此一夫若  
當關萬夫不足恃意外事未然平陂亦物理君相共策



籌庶乎消不軌

文翔鳳一首

翔鳳字天瑞西安三水人萬厯庚戌進士除萊陽知縣調伊陽再調洛陽遷南禮部主事調吏部升山西提學副使入為光祿少卿有伊川海

日雲門諸集

詩話學有異端詩亦有異  
端文太青王季重是已

望唐陵



北望唐家十八陵寢園貴主亦相仍惟將憲廟除樵採  
不為明皇具禰蒸幸蜀山川幾板蕩平淮天地再清澄  
奉先橋首堯山好柏路遐探憾未能

鍾惺四首

惺字伯敬景陵人萬厯庚戌進士除行人升工  
部主事改南京禮部主事進郎中遷福建提學  
僉事有隱秀軒集

詩話禮云國家將亡必有妖孽非必日蝕星變  
龍蛇雜禍也惟詩有然萬厯中公安矯歷下妻



東之弊倡淺率之調以為浮響造不根之句以為奇突用助語之辭以為流轉著一字務求之幽晦構一題必期於不通詩歸出而一時紙貴閩人蔡復一等既降心以相從吳人張澤華淑等復聞聲而遙應無不奉一言為準的入二豎於膏肓取名一時流毒天下詩亡而國亦隨之矣

再登浦口王茂才山樓望石武庫澹寧所造新城

水上樓居忽有城重來翻覺類新城  
鶯花每次逢長夏風日無端屬乍晴  
山對層楹還自若江添睥睨倍多情  
亂帆屢向烟邊沒去遠參差却漸生

舟晚



舟棲頻易處水宿偶依岑岸暝江逾遠天寒谷自深隔  
墟烟似曉近峽氣先陰初月難離霧疎燈稍著林漁樵  
昏後語山水靜中音莫數歸鴉翼徒驚倦客心

送丘長孺赴遼陽

曲突何曾勸徙薪烽烟桴鼓重邊臣全遼三五年中事  
爛額焦頭半楚人

桃源詞

商山海上半秦民何獨桃源是避秦滿洞仙人一漁子



翻疑漁子是仙人

卓爾康一首

爾康字去病仁和人萬歷壬子舉人有修餘堂

集

詩話去病康濟之才著書等身  
惜不甚傳詩時露豹一斑爾

初晴許元昭招看吉祥寺梅

言別長干久相思積雨重忽驚梅榮發如與故人逢入  
寺幽香遠方春冷豔濃憐君疎傲似相對益情鍾



李東純 七首

古別離

長安百尺樓其戶銜明璫  
宮雉入雲中雙闕遙相望  
明月照玉顏皎皎流素光  
中夜理瑤瑟纖指發清商  
初彈雙黃鵠再彈孤鴛鴦  
淒颼動羅幃餘響激微霜  
仰視河漢直寒波浩無梁  
安得高飛翼為君凌空翔

王心一 三首

歸渡揚子江



久客天邊路言歸江上舟山光分遠渚塔影漾中流薄  
霧籠江樹平沙狎海鷗乘潮片時渡十里隔瓜洲

苔溪

細雨苔溪曲微風渡小航有園多種竹無屋不圍桑語  
覺吳儂近流分震澤長烏巾春店近白酒熟盈觴

方震孺一首

震孺字孩未壽州人萬曆癸丑進士除知沙縣  
擢湖廣道御史巡按遼東被逮下獄崇禎初特



釋歷官都御史巡撫廣西

丁卯中元余在繫經三中元矣

黑海中元三度過青山一望淚滂沱浮生幾日尋衣食  
鄉夢頻宵怯網羅心上孟蘭依古寺天邊墳墓近淮河  
荒原秋草知蕭瑟況復傾巢江上波

明詩綜卷六十六

方大任 三首



詠懷 三首

徘徊芳塘上微風扇輕波連岡蔭青松仄徑冒綠莎是  
時秋正深杭稻蕃陂陀腰鎌朝出隴捆載夕歸家鳥雀  
啄場圃牛羊散巖阿曰余無三錐鼓腹行謳歌拾穗甌  
窶間一飽不願多嗟彼攘攘子鼎食終如何  
孔雀游赤霄牛角何由觸麒麟可繫羈翻為天羊辱伊  
余類窮猿投林不擇木悠悠長傍人顧影傷局促百鍊  
忤時好繞指乖素欲犂鉏儻可給誓息西山麓



方孔炤 四首

孔炤字潛夫桐城人萬厯丙辰進士除嘉定州  
知州調福寧州入為兵部員外歷郎中魏忠賢  
欲兄子良卿為伯執不覆削籍歸崇禎初起尚  
寶卿以副都御史巡撫湖廣忤楊嗣昌坐兵敗  
繫獄嗣昌死屯撫河北卒門人私謚貞述先生  
新設屯田

廟議既不與屯田徒有名河北山東地水利難與爭當



先布賞格有司乃奉行隱覈台民種亦須三年成吁嗟  
恐不及不如先議兵兵既不如議田亦何由耕

密議歎

楚人歌秦人舞櫓櫓衣傳兩秋鼓殿上伏機多危語密  
議知與外廷忤外廷不知乃連章以為朋黨飛嚴霜

謁方正學先生祠

鍾陵松栢對蒼蒼近代南山祀太常寧可紙灰埋十族  
不將銘志屬三楊髡緇江上人何在縞素軍前獨發喪



斷事只今依俎豆吾家書種託門牆先五世祖諱法中洪武應天己卯出

正學先生門為四川斷事開  
難投江今補祀表忠祠

### 和客傳言

多選中涓辨隊裝明光甲片日爭先原來第一安邊策  
只在新開內教場

張瑋 二首

### 江行宿淺灘

千里江流此一灣暮潮落盡柁師閒  
脩脩蒼荻鳴疎雨



隱隱玄雲列遠山波靜自知憑岸穩官慵肯厭客塗艱  
朝來晏起迎新旭秋月秋風興不慳

沈德符八首

天啓宮詞 三首

白驪唐代御玄宗陪後將軍始受封爭似生叨三品料  
驪駒賜號小烏龍

鄭士奇一首

士奇字平子嘉興人萬曆戊午舉人署臨安儒



學教諭遷知贛州興國縣以耳聾告歸有松牕

老人豪

釣臺懷古

擇地逃新室披裘對古人  
星原占是客帝豈得而臣  
瀨急迴潮信壇高費釣緜  
不知梅福女偕隱幾冬春

姚希孟 三首

希孟字孟長長洲人萬歷己未進士改庶吉士

授檢討歷左贊善左諭德出為南京少詹事贈



禮部右侍郎謚文毅有公槐響玉棘門沆瀣秋

旻文遠循滄松癭伽陵風吟等集

陳皇士云先生詩存容雅

麗有館閣風度

詩話述案將定思陵發建祠稱頌諸疏申命內  
問詳閣限以數日確議來奏輔臣難之求助於  
文毅文毅中夜不寐周步堂中其客周生進而  
問公公語之故生曰某於七年中逆知魏客之  
必敗以詢附諸臣分別其罪自謂無過情公取  
而惟衡之可乎公覽之擊節稱善次日進於輔  
臣皆以為當據之入奏生與江人或曰秀才永  
年矣期或曰永年之弟永言安仁也爰書既定  
天下咸服凌遲處死者二人擬斬者二十五人  
充軍者十一人贖徒者一百三十一人冠帶開



住者四十四人雖有漏  
網然吞舟之魚鮮矣

### 送齊越石守紹興

萬壑爭流處溪山屬剡東  
扁舟仍雪夜五馬自春風  
官舍朝嵐滿人烟夕照同  
蓬萊讓仙吏安坐翠微中

### 謁景皇帝陵

低回往事未堪陳誰抱遺弓泣紫宸  
遙共祔陵今夜月可憐  
邨郎故園春朔方老將黃沙苦  
西市尚書碧血新  
陟降在天應不遠蕭蕭松柏卧麒麟



秋感

秋客已到菊花枝  
閉戶蕭然誦楚詞  
憔悴江離人不見  
滿庭涼月照相思

明詩綜卷六十九

費元祿

一首

元祿字無學鉛山人有甲秀園集

勞勞亭



八月金陵秋氣涼  
勞勞亭畔立斜陽  
誰家別淚沾紅袖  
幾處秋風起白楊  
沽酒城邊頻繫馬  
聞歌道上總思鄉  
古今不盡東流水  
多少行人為斷腸

梁有謙

有謙南海布衣

寄贈翟將軍

短髮蕭蕭鶚是冠  
獨將詞賦老江干  
停杯却憶西征路  
一片青山戰後寒



逮希韓一首

希韓章邱人

山居

白髮山中老飄然遠世囂  
泉流分燕尾詩稿束牛腰  
笑傲花三徑酸甜酒一瓢  
披襟坐明月席地話漁樵

明詩綜卷七十

唐時升十首



時升字叔達嘉定人有三易齋集

王辰玉云叔達五言古高

閒遠淡以方儲韋不啻過之七言古步驟老杜乃專肖其神情五七言律出入王右丞劉隨州間

詩話嘉定四先生詩文要當推叔達第一長蘅子柔且遜席矧孟陽乎或者謂其放筆而成繹其辭乃追琢而出者由其欲伸孟陽故有意抑之爾

園中 四首

鬱鬱千尺松所憂斧與斨離離三寸草所患牛與羊  
聖賢逢濁世處身復何當高明畏摧折忠信虞毀傷禍福



誠無門天道寧有常幸逢小豐歲得飽無太康謹身以  
節用暇則談先王為善實良圖敢謂有餘慶

鶴鳴在林樾山谷有遺音置之闌闔間三載如病瘖禽  
鳥自有適人亦自有心嗟余實鄙夫翰墨非所任廢書  
動旬月篇籍凝塵侵唯於場圃內時時發長吟澹如酌  
玄酒鏘若調素琴為語二三子幽賞宜共尋

魯國有嫠婦太息有餘悲豈惟憂宗國我愛我園葵憶  
昨三韓外六載懸王師太倉三百萬輦送滄海湄今聞



五將軍肆伐西南夷狐兔戀窟穴此豈關安危傳聞中  
朝議何當恤瘡痍戎車久不駕今且數驅馳六軍百戰  
後但恐中土疲吾聞聖人言佳兵不可為

梅實須五春橘實須六秋人命須臾間敢保數載謀鄰  
叟笑謂余君言何謬悠苟非勤封植白首見無由因思  
包山麓終日長夷猶既無買山資曷不營故邱樹茲歲  
寒姿散布林塘幽繁英媚雪下美實隨霜收豈必黃髮  
期會見陰平時叮嚀語穉子籬落須綢繆



阮氏還居尉氏

阮公嘯詠處千載思其人白雲在天際  
窅窅不可親嗟哉大賢後風流尚未泯  
卜築丙舍旁臨眺蓬池濱睠彼松栢  
古庇此櫟栢新我有一尊酒助子霜  
露晨路遠莫致之眷眷含悲辛不知  
古戰場猶有劉項塵詠懷如有作  
寄我開心神

宿直塘

雨後稻梁好霜前魚蟹饒密藤全  
隱壁枯柳卧成橋樹



裏方為市籬間暗上潮田家秋作罷燈火各相邀

漁陽

住久漁陽郡朝朝望白檀朔雲秋色早邊月夕光寒館  
伴能番語降軍學漢冠人傳魏武帝於此破烏丸

薛侍御出按貴州便道歸雲南省觀

繡衣持節出長安南入牂柯路萬盤重箐濕雲常欲雨  
點蒼晴雪不知寒登車自埽豺狼跡遇客爭彈獬廌冠  
遙憶樹頭新酒熟刺桐花下正承歡



田家即事

橫塘潮急進船遲  
菱荇纏絲罾釣絲  
荷葉覆魚先入市  
青楓渡口曬鸕鷀

舟中即事

風卷黃河兩岸沙  
中流艇子一時斜  
故園柳絮應飛盡  
河北行人見雪花

程嘉燧八首

嘉燧字孟陽休寧布衣僑居嘉定有松圓浪淘



集

詩話孟陽格調卑卑才庸氣弱近體多於古風  
七律多於五律如此伎倆令三家邨夫子誦百  
翻兔園冊即優為之矣必讀書破萬卷乎或者  
以為深慙何李王李流派乃於明三百年中特  
尊之為詩老六朝人語云欲持荷作柱荷弱不  
勝梁欲持荷作鏡荷暗本無光得毋類是與姑  
就其集中稍成章者錄得八首

平望阻風

驛路連吳近鄉音帶越稀  
寒流捎宿舸夕浪急風靡旁  
市求魚入鄰舟得酒歸  
微微掩明燭伏枕念無衣



送叔達之錢唐

夜雨維舟數秋風解袂輕相逢留客住同作送君行月  
色湖中寺潮聲江上城知君游賞處相念若為情

四明徐匯陽莊太峰余泰靈秋盡先後別歸送行  
相逢多別酒歸路欲何之江水曹娥廟湖山賀監祠鄉  
愁兼雨重旅望入秋悲儻憶江東侶論文復幾時

七夕懷平仲揚州

江邊一別兩悠悠湖上相思且滯留千里星河同此夜



甘橋明月自三秋無由結伴還鄉國况欲因人作遠遊  
潦倒更於何地會見君空已雪盈頭

送徐女廉之無錫

黃姑灣頭梅乍香黃婆墩邊柳漸長但看音信連三月  
誰道風烟不兩鄉

雨中過伎家飲書贈陳翠

紅樓細雨燕飛斜玉面珠簾相映遮三月江南春色盡  
却行江北見梅花



憶金陵

青門楊柳白門烏  
秋雨秋陰舊酒壚  
何處薜蘿最相憶  
縑絲風雨暗西湖

崑山響梵閣懷季常上人遊九峰

袈裟相伴踏清秋  
健即閒行嬾即休  
記得罷琴吹笛夜

雨中茅屋小如舟

董斯張十二首

葛鵲作二首



鴉銜朱柿墜秋坡竹簍疏泉帶碧莎野菊滿頭山下女  
也能學唱采茶歌

吳門道中

柳花片片拂船牕雪點湖田鷺幾雙數到明朝寒食夜  
半篷殘照過吳江

王醇二首

醇字先民揚州人

書事



狼烟夜照大安戍  
曠騎夜縛將軍去  
駿馬駝金曉贖歸  
正陽門底捷書飛

題馬湘蘭畫蘭

冰綃宛是湘江曲  
寒映秋芳數枝玉  
能使湘靈愴別魂  
瑤瑟泠泠怨秋綠

何允泓

四首

允泓字孝穆常熟縣學生

詩話孝穆詩頗  
欽崙不沿時習



讀岳忠武傳二首

傳張不得終經制傳亮張所韓岳何勞更枕戈載主空傳之

建業

建炎間時辛平江建康亦載木主以行

行宮漸侈似宣和班朝清海

成三恪

金每朝會以天水郡侯遼天祚劉豫為一行

振旅朱仙泣兩河惆悵

一生匡國計止餘遺草泣孫珂

戰血橫吞直指燕秦垣心腹祲方纏將軍河上空爭地

丞相閨中善格天

檜誅公用王夫人策格天閣高宗書以賜檜

蚤有雕兒貪

厚餌

軍中呼王貴為雕兒

尚期龍府醉諸賢張秦總是明經客何



但書生拜馬前

讀元遺山集

滄海橫流著此身中原天日照纍臣  
明昌大定三生夢欽叔希顏一代人  
野史亭中遺汗簡讀書山下起埃塵  
幽蘭灰燼今何在千載空餘老角巾

讀張光弼集

畫省無心久握蘭西湖花月一叢殘  
共傳軍府題詩客肯作吳藩入幕官  
楊柳花時頻縱酒牡丹開後獨凭闌



最閒園裏徵歌處江左三人管幼安

明詩綜卷七十一

文震孟 二首

夏日園林

境乃同拙落人猶是勝流即今便高卧未擬賦窮愁家  
傍要離冢門迎范蠡舟孤蹤安可定浩蕩五湖遊

陳仁錫 一首



仁錫字明卿長洲人天啓壬戌賜進士第三授

編修累遷南國子祭酒追謚文莊有無夢園集

詩話吳中甲第之盛前數嘉靖壬戌申文定王  
文肅同郡人後則天啓壬戌文肅陳文莊同  
縣人兩公皆老於公車晚始登第而文莊為先  
文恪萬曆丁酉所拔士至壬戌復為先公所錄  
及殿試則先公又充讀卷官蓋三試皆出先公  
之門亦異事矣文莊以不肯撰魏璫鐵券文落  
職可謂不負科名詩非所務  
一變染指未為不知味也

中秋

月華冷于霜水白已成路宿鳥靜不鳴羽毛紛可數



方逢年 二首

乳洞口水碓

陟阿采玉芝浮澗拾瑶草野碓竟日舂誰識是龍腦

蕭士瑋 五首

寓意

誅茅宜楚地無如廬阜美五步一溪雲十步一溪水

月夜西泠橋

霧鬢烟鬟逐處嬌輕風著面酒初消月明故國三千里



人在西泠第一橋

黃景昉 三首

景昉字太穉晉江人天啓乙丑進士改庶吉士  
授編修歷中允諭德庶子升少詹事以詹事掌  
翰林院尋以禮部尚書入直東閣加太子少保  
戶部尚書進文淵閣大學士

詩話相君務去陳言專尚新警其近體尤雕繪  
如侍楚王宴云隆準衣冠高帝後夥頤宮闕大  
江濱登太和絕頂云天野星躔包兩戒國朝嶽  
瀆視三公南臺燕集云仙家閭苑琉璃浦禹貢



揚州篠簜田贈友云少從魯國稱男子家近茅  
山得異人壽樊叟云公餘樺子燒松液酒半材  
官舞蔗竿集北郭草堂云誰邀玉珮神仙客自  
唱清歌菩薩蠻荅友云枚叔賦游梁上苑伏生  
書重漢西京寄友云以吾一日長乎  
爾如此三星粲者何要不作沿襲語

### 未央瓦

客來移甍漢時宮丞相經營想像中武庫不隨蛇劒火  
鄴城空貴雀臺銅猶餘龍虎真人氣未蝕蟲蠹累代功  
敢向玉池輕點染更無雄句似歌風

何太常悌邀步南郊觀園丘享殿齋宮諸制恭述



皇矣穹窿廣君哉制作殊改絃歌世廟分祀別留都日  
練金支秀春回華蓋趨竹宮靈放悲羽客韻虛無繭栗  
三犧用瓜華百末敷篆烟颺鬱鬯恩影入珊瑚富媪壇  
仍峻高皇座稍隅殿詢公玉帶庭接鬼吏區憶昔陪清  
蹕于茲饗大雩烏銜齋饌素沙點布袍烏重許窺閭闔  
須知辨濮瀘帝真雲漢主天轉斗牛樞禁地人雍肅祠  
官汝敏膚秩從夷典禮倫始契司徒誰獻河東賦空吹  
冀北竽戚干容肄雅卿景合賡虞



書事

內家驟括馬騾車火綫葦簾製也疎誰遣園扉中夜啓  
銀鐺又及老尚書

明詩綜卷七十三

張采一首

采字受先太倉州人崇禎戊辰進士除臨川知  
縣升補禮部主事



靜志居詩話東二張狎主復社盟書吉士身  
後詔求遺書通邑大都家守其學儀部名雖少  
遜然里門作志留都議禮  
考文徵獻比於吉士功多

九日同子常東郊即事

郊行尋野勝秋遠菊花天溝曲初移逕溪深好放船冷  
楓當岸落高柳隔籬穿試共登樓望寒城起暮烟

冒起宗 一首

起宗字宗起如臯人崇禎戊辰進士除行人升

南京吏部主事歷郎中出為山東按察僉事遷



湖廣布政參議

同年朱泰符過訪衡陽余已遄發襄州矣吾兩人  
同一不偶乎

秋老蒸江獨鴈飛相思命駕重依依久拚歲月頭俱白  
堪笑風塵事益非地主忽從交臂失天涯安得並舟歸  
兼聞親舊多顛顛悵悵望鄉關淚幾揮

葉重華 一首

重華字德玄崑山人崇禎戊辰進士除工部主



事尋改禮部歷員外郎中出為浙江布政司參議轉河南按察副使遷山東廣東參政

從軍行

吳鉤雪色滿天山  
血戰黃沙萬里還  
但願畫圖麟閣上  
不須生入玉門關

張溥一首

溥字天如太倉州人崇禎辛未進士改庶吉士

有七錄齋集

陳卧子云天如忠愛誦孟門行可見一斑卒後而動聖主之思有以也



詩話天如狎主復社以附東林聲應氣求龍集  
鳳會一言以為月旦四海重其人倫書畧刻而  
百函賓書日以三接由是青衿胄子白蠟明經  
登李元禮之門不啻虬戶為柳伯騫所識勝於  
筭金列郡人文一時風尚口談朝事案置漢書  
頭包露額之巾足著踏跟之履和歌下里擁鼻  
東川俄而哲人其萎踐康成之妖夢天子有詔  
求司馬之遺書黨論日興清流釀禍周之變彈  
之於始阮大鍼厄之於  
終而邦國因之殄瘁矣

### 孟門行

雙絲繫玉環宛轉生光澤本以結同心何知反棄擲君  
家美酒琥珀光紅顏少年坐滿堂酒酣意氣不可當君



家玉堂盛孟門孟門深谷無朝昏中有美人嘯且歌仁  
義結客客自多相與醉君金叵羅黃雀銜環報舊主畏  
君彈射遠飛去夜深孤棲城北樹

李舒章云得  
崔顥之神

張明弼 一首

明弼字公亮金壇人崇禎癸酉舉人揭陽知縣

有螢芝集

俞右吉云公亮經生垂白始領  
賢書遇一人知己津津不置

金陵送胡常之歸九華

目極秋江隱碧山九峰想像有無間孤舟此去同鳬鴈



知宿蒹葭第幾灣

陳宗之 十一首

擬陶 二首

藹藹堂前木時至忽成林  
首夏方澄和凱風散幽襟  
我愛白日靜觸物每微吟  
息影盤石邊時鳥懷好音  
鼠壤有餘蔬東醵聊自斟  
雖無高世軌撫已安夙心  
先師有遺言謀道匪自今  
已矣何所羨林栖豈在深  
人生無定轍榮辱隨所遭  
豈無賢達心屈跡沉蓬蒿老



萊安葭牆仲由甘縕袍較量軌迹間與世竟孰高不恥  
一身之所傷生民勞風塵暗畿甸溝水事枯槔清夜起  
長歎念之首重搔安得田子春節義稱士豪雅志雖未  
申良足媿滔滔

傅巖二首

巖字野倩義烏人崇禎甲戌進士除歙縣知縣  
擢江西道御史有花巢詩藁

庚辰元旦



曉起看雙鬢居然比昨非  
趨朝人語早掩幔客來稀  
酌酒分居後傳柑秩尚微  
遙思故鄉會是日定春衣

姑蘇早發

吳閶西去片帆輕  
野樹微茫水國平  
一夜櫓聲搖月影  
不知枕上過孤城

文德翼 一首

德翼字用昭德化人崇禎甲戌進士除嘉興府

推官擢吏部主事有燈巖詩集



池口阻風

伸腳蓬牕西日移打頭蘆渚北風吹沿城路僻多蚊蚋  
到夏江深少蛤蜊山色杳冥歸謝朓笛聲惆悵憶桓伊  
顏年自笑滄洲客破浪那能萬里期

萬泰四首

泰字履安鄞縣人崇禎丙子舉人有寒松齋橐  
詩話孝廉鈎黨顧尉士林圭臬兵後以經史分  
授諸子各名一家其最著者斯大充宗斯同李  
野也詩多清商變徵之音羊城旅懷等作見者  
十手傳鈔其云廣柳車中容季布湘江澤畔問



巫陽舟經彭澤竟客死  
舟中識者以為識云

### 客中初度

朝來虎阜攬春暉  
矯首林泉興不違  
故國青山殊自好  
王孫芳草幾時歸  
遙將兒女庭前淚  
灑入江湖客子衣  
舉目傷心歌舞地  
多情楊柳故依依

### 釣臺有感謝皋羽遺事

當年君哭文丞相  
今日吾來當哭誰  
暮雨寒潮楓落後  
朔風極浦鴈飛時  
兵戈未得書生力  
草澤偏懷故主思



如意一聲天地裂淚痕千載濕江蘿

留別董西來

客塗相見即相親總是淒涼夢裏人且喜何郎能似舅  
不妨綺季未稱臣睢陽城上三生淚無定河邊後死身  
惆悵天涯分手處秋高一鴈落江津

冬夜偶坐作

有客挑燈夜賦詩魂消雨雪歲寒時黔婁私諡稱康子  
文舉人推是大兒落日江邊勾踐國春風湖上岳王祠



尚然老健堪容與耐取青松百尺枝

張

昉 二首

昉字于東一字匏客商邱人崇禎丙子舉人有

匏客遺詩

詩話匏客多憂生之  
嗟其詩原出老杜

晚行

客路寒山暮居人各掩門荒城餘古驛落日滿前村世  
亂家難料身微命敢論烽烟回首處原野已黃昏



武陵原

遠害當年早深山共卜居家耕無賦地人讀未焚書父  
老衣冠古兒孫禮法疎咸陽三月火不到野田廬

明詩綜卷七十四

陳繼儒 三首

繼儒字仲醇松江華亭人有眉公全集

靜志居詩話仲醇以處士虛聲傾動朝野守令之  
臧否由夫片言詩文之佳惡冀其一顧市骨並者  
如赴澤良文推場品書畫者必求張懷瓘估價肘  
有兔園之冊門聞鷺羽之車時無英雄互相矜飾



甚至吳越布皆被其名寵安餅師爭呼  
其字今遺集具在未免名不副其實焉

### 月下登金山

江平秋萬里山靜月三更彷彿寒烟外  
瓜洲有鴈聲

### 春日訪殷東皋

櫻桃花開春可憐何處游人不放船  
却羨白頭殷處士  
鵝鳩聲裏獨耕田

### 山居雜詩

青草湖邊白石西竹籬茆屋酒帘低  
飛來飛去雙黃鳥



不到濃陰不肯啼

邢昉 三首

昉字孟貞高淳人崇禎諸生有石臼集

陳伯璣云孟貞

詩無一暢懷語讀之令人增感

聞亡女訃寄內

垂老常嗟別書傳江漢稀青鬟憐弱息秋草忽同歸多  
病愁難共還家興轉微尚餘殘淚在相對灑牛衣

月



偶聽烏啼漏未殘  
小池冰合夜深寒  
最憐一片霜天月  
已是離家十度看

口號

蜀江船不到三巴  
湖南船不到長沙  
滿地干戈關塞裏  
行人那不早還家

明詩綜卷七十六

金聲 一首



聲字子駿嘉魚籍休寧人崇禎戊辰進士改庶  
吉士以山東道御史參軍務升山東按察僉事  
復起修撰有集

送雲莊師至吳門

斯文未墜地夫子獨栖遲論易真傳在從先與俗移片  
雲常自遠孤鶴去何之別後時相憶雲山不可知

吳應箕

六首

應箕字次尾貴池人縣學生乙酉死于難有樓



山堂前後集

張爾公云樓山人文似陳龍川詩

詩話先生羅九經二十一史于胸中洞悉古今  
興亡順逆之迹當崇禎中預慮燕都之必不能  
守聞者皆笑其迂而先生持論侃侃不阿也名  
雖不登朝籍而人材之邪正國事之得失瞭如  
指掌撰有熹朝忠節傳二卷兩朝刺復錄十卷  
留都見聞錄三卷東林本末六卷續觚不觚錄  
二卷其書或傳或不傳覽者可以當龜鑑矣分  
宜張爾公稱先生人文似陳同甫是誠知言聞  
先生授命處血迹至今猶存洗之  
不去甚弘嵇紹而後不多得也

歡聞曲

歡欲聞儂歌儂意忽不樂寧使歌未終不忍歡淚落



練鄉勇

舊營非無兵府亦役健壯何如更選士不戰使敵創我  
聞逐賊師老弱匱轉餉馳騁梁楚交賊來不敢抗過掠  
虐貧民氣驕陵主將官兵終驛騷鄉勇新跌宕古人驅  
市人披靡隨所向今匪素拊循信以死長上里胥日催  
督閭閻相耀誑兵怒不可邇塗膏飭資仗區區賦幾何  
歲亦五千兩

悼吳門文相國



相國信公裔大庭遭遇同金閨十五載凜冽標清風一朝邁爰立身通道反窮時方工謠詠安能久置公去國懷明聖憂心日忡忡黯淡吳閭邑淒涼象緯中斯人不可作世已摧華嵩

何以

何以使兵消莫如加派輟何以使賊平莫如官兵撤不見十年來請兵日不絕兵多賊亦多未見一賊滅賊去兵肆掠賊來兵不截撫軍飾啞聾鎮帥類瞽躄塘報習



為欺上下徒牽掣終年庚癸呼竭盡民膏血我皇至神  
武羣臣亦憂懽事勢久凌遲相戒有卷舌雖我懷區區  
天遠何能說

蘇州行

轉諸要離死已久墓旁宿草兼衰柳斯民三代直道存  
肯使端人界虎口諸生大哭軍門前百姓呼號奮徒手  
須臾縱騎鳥獸奔天子之詔吾何有爾時官長汗浹背  
縲臣夜半單舸走民間訛言屠一城聖人憫亂殲渠首



嗚呼天下幾蘇州  
藁葬五人名不朽

耕田苦

耕田苦耕田苦插秧三月今無雨吳中水利半人工  
十里九見翻車舞一車灌田畝二三一車用力人六五  
水田高下不相及置車銜接凡數部盡日肩水水盈寸  
南風復吹作乾土戮力安知晝還夜赤體相對子與父  
下濕上炎背欲裂前呼後和聲邪許東南歲輸四百萬  
那知粒粒出脛股桔槔幸有古人師不然滿原成薄鹵  
嗚



呼耕田之苦難比數有苦不聞動官府中原鉏耰化為  
兵下邑催徵尚如虎

明詩綜卷七十七

表繼咸

二首

繼咸字季通宜春人天啓乙丑進士除行人選  
授廣東道御史謫行人司副升禮部主事由員  
外郎出為按察僉事累官兵部右侍郎兼副都



御史總督九江軍務有六柳堂遺集

張爾公云  
臨侯曾祖

魯訓中成化丙戌進士年四十退隱不仕慕陶  
靖節自稱六柳居士且臨侯以此名其集也  
詩話侍郎處危疑之際內抑權姦外調重鎮備  
極苦心晚授命於京師堪與左仲及此烈若江  
州之焚倉猝不能戢將士當非其本心近見野  
紀有述公歸命本朝者殆由傳聞之誤也軍  
中自銘曰死事也易成事也難為嬰弗克為白  
維艱張死匪先許死匪後臣心靡他靖獻我后  
嗚呼父母有過則諫諫而不從則號泣旻天  
之不怨晉陽之甲豈可刳哉既被獲抵大勝關  
親王傳語表總督著隨行與以大官做又自銘  
曰大官好做大節難移成仁取義前訓是依文  
山表山仰止庶幾  
表山侍郎自號也



讀謝皋羽西臺慟哭記

南方有朱鳥飛中虞人絃飼以金精粒對之不下咽粒  
味豈不旨不如南土泉黃冠志弗遂碧血流濺濺有客  
感意氣慟哭西臺顛擊碎鐵如意悲響震巖川歸舟不  
成寐髣髴語燈前嗟彼積弱羅我非雀與鳶夢炎何足  
刺知己殊未然周粟不可茹箕疇曾未傳生死良非苟  
忠孝各自全謝子幽明契聊以祕懷宣言罷倏不見月  
明高在天



至日感懷

葭灰吹律動長安猶記衣冠拜紫鑒此日近臣新寵澤  
貂裘駿馬不知寒

吳易

九首

易字日生吳江人崇禎癸未進士有東湖唱和

集

詩話啓禎之間風雅凌替古風尤置不講曰生  
奮跡松陵補六公詠原本杜老八哀之作是時  
第知卧子有起衰之功然卧  
子豈獨曰生成削各有其長



六公詠

靖遠侯王忠毅公驥

抱膝當時危懷古存匡濟英雄興世徂風烈恐衰替我  
思靖遠公振翮全盛世踴躍弓馬間談笑布軍勢甘涼  
始出鎮肅整戎伍氣張筵斬懦將股栗衆相視一舉平  
阿台河西晏亭燧麓川肆作逆公又決大計鎖甲金兜  
牟照耀宮中賜長驅展方略奪險扼吭背指麾風霆奔  
戰象失精銳萬古金沙江不聞漢兵至江枯石碣爛羅



拜帳下誓凱歌萬里入勞使千里出不有爪牙臣何以  
正神器龍蛇壯士節蛙黽腐儒議嗚呼三征南丹書在  
苗裔

威寧伯王襄敏公越

威寧熊羆姿高視氣敵萬脫略繩墨外勇智走飛電大  
廷吐奇言排閭怒風旋威聲動異域瓌特震所見目屬  
膺帝心短袂故上殿帝曰快御史為朕將而弁所部皆  
鷹騰公也身搏戰擣虛握勝策入穴虎乃困一炬紅鹽



池水天千帳燭烽銷玉闕烟雲卷陰山片轅門正高會  
琵琶奏哀艷戰士挾秦姝頓使死力賤豁達龍豪英出  
沒神鬼眩丈夫重勲名志豈在鐵券絕塞縣孤臣中援  
何足玷慘淡黃金印零落白羽扇風塵暗不開北顧撫  
長劍

新建侯王文成公守仁

文成王佐才星嶽氣突兀資神道無餘童穉挺英越訪  
客絕塞游獷騎角馳射睥睨山川勢志蓋燕然磧縱橫



五十家既長稍折節空濛九華雲浩蕩南屏月以茲洞  
儒宗興義大闡斥精微續聖系餘緒贊帝業運籌羣盜  
間颺焱百巢滅神龍無安翔金翅縱高掣逆旗蔽西江  
妖星射金闕公時擁上流安危視縣髮隻手提天綱雷  
轟走飛檄指顧縛元凶九廟初安帖煌煌再造勛不得  
身獻捷帝闕紛狼狐八荒置牙孽非公煇威名乾坤免  
頽疊控制仗兵符中樞洵雄哲吁嗟營青蠅功大賞故  
阨論道羅豪賢恬澹謝矜伐崩迫戎馬際講席每不輟



中興劇南顧元老再秉鉞六字蛟螭獠千年銅柱圻漢  
儀燿百蠻灑淚思田碣威寧赫遺劍伏波愜廟謁乃知  
非常人洞達神爽接我生世未遠恐懼壯猷歆戡靖竟  
何人中原日流血

定襄侯郭忠武公登

郭公武定孫神駒渥洼好十齡走健筆歛吸振奇藻動  
徹春秋義兵法腹笥了安危異人出所以真皇造英宗  
北狩初決機一何早黃塵擁翠蓋痛憤居庸道紫微為



盪搖柱極西欲倒我公奮孤撐乃心協少保國也今有  
君揮血視清昊截巢雲中城虎豹鬱相抱崩騰萬馬陣  
擊衆每用少猿臂捷有神鐵甲盡穿縞揚石雄軍聲鎖  
鑰資電掃撒烈天網翻槎枒地龍繞豈多三軍力遂爭  
造化巧詩看橫槊賦檄倚馬上草排宕非常姿灝氣秋  
空晶高詠戰場篇寂寞風流紹

少保戚公繼光

大將東南誰戚公真鷹揚雄情恣捍闔祕策揮陰陽夙



奉綦履訓更見經術詳結友傾賢豪文采殊頡頏曉達  
三門流以律師所藏龍鳥追武侯衡軸通軒皇變化開  
精心什伍為鴛鴦島夷蹂南土兵氣慘不張閉營百日  
練戰力虎士強疾埽溟波平受鉞總薊方不戰而有備  
十萬環偏廂遠猷振華夏定策為周防亭障雜星羅旌  
旄蔽日光東倭遂斂跡西域亦來王款關四十年戎馬  
不敢颺伐暴貴上兵功豈必戰場竟無通侯賞坐使壯  
士傷時平武略絀世亂智勇長問彼登壇者曷以恢我



疆

都督俞公大猷

文武道不殊自古惜灌絳俞公萬夫雄  
倜儻亦儒將讀書當陽亞雅歌祭公上  
開豁延攬真沈靜韜鈴暢公師趙布衣  
手畫風雲狀貫穿十八勢方圓識所舛  
瑣瑣部使者叱咤故庸妄冠憑舟山劇  
策恃橫海壯洪飈排列風壯氣噴高浪  
騰衝百丈城大壑千軍帳蛟宮覆絕島  
鯨波赤溟漲幕府害讜言不得功罪當  
奇績屢見攘塞



默秉謙讓及乎雲溪役搜剔窮菁嶂遂憑死間力老謀  
一推盪封侯數則奇燕領空殊相詎多驅除才大受足  
忠忼國恥今未雪元戎况飛颺豈無幽沈士屹然安危  
仗蒼茫鼓輦思駕馭必英匠

東湖雜詩 二首

百代傷心地風烟莽不收江山一弔望吳越幾春秋鴻  
鴈青楓渚芙蓉白露洲霸才今寂寞何處問扁舟  
禹蹟今何在蒼茫水國開山趨天目下日湧海門來笠



澤橋如帶淞江水似杯東南輸輓盡鴻鴈有餘哀

從軍行

已分沙場報國恩身經百戰滿創痕但教死去圖麟閣  
不願生還入玉門

陳潛夫

一首

潛夫字玄倩仁和人崇禎丙子舉人榜名朱明  
後更馬除開封推官擢監察御史江東下率妻  
妾投水死



絕筆

父兮生我申以嚴誨惟孝惟友曰忠與義丙子鄉舉顧  
名自勵名曰孝廉庶幾無媿致身之期歲在癸未司理  
開封星言視事以身許君有死無二是時兩河賊氛如  
蝟衆人迴車子獨攬轡賊出河朔羣工奔避予乃渡河  
擊楫而濟誓清河南以報先帝手披荆榛身禦魑魅獨  
張空拳以當賊騎知有封疆九死何畏三十州邑終復  
舊地維時先帝鑒予忠瘁授以巡方繡衣北莅惜也諸



姦互相牽制中樞信讒嫉予不媚聯絡要圖置之罔遂  
三月撤歸可為隕涕哀哀先人一時捐棄甘旨莫承遺  
書淪廢我哀方盈姦怒轉熾赫赫金吾逮予邸第園牆  
幽憂冠氣猝至匍匐歸來挈家奔避航海飄零請兵于  
會召募丁男三百而已衣甲糗糧皆予自備血戰江干  
二十餘次糧寡兵微於事何裨疾痛呼號徒然憤恚丙  
戌五月公侯師潰區區孤軍其何能濟事不可為偷生  
何貴拜別吾母以及諸弟挈吾妻妾從彭咸逝成仁取



義千古如是

張國維 一首

國維字其四東陽人天啓壬戌進士除番禺知  
縣選授刑科給事中轉吏禮二科升太常少卿  
以右僉都御史巡撫應天以工部侍郎總督河  
道尋遷兵部尚書坐劾下獄崇禎十七年春起  
原官督餉直浙後死于難

登采石贈諸將



月明橫梁倚層峰宵析風飄和梵鐘舊是開平買勇處  
諸君努力此書庸

陳函輝

一首

函輝初名煒字木叔臨海人鄉舉後改今名更

字木叔號寒山崇禎甲戌進士除靖江知縣以

疾乞歸自縊於天台雲峰寺有寒山集

譚梁生云木叔

真率自矢不假藻飾其詩十九贈僧信手拈出使人有才多之憾

劉伶巷



有酒宜成頌知君恥獨醒回車經巷口荷鍤信丘冥死  
豈人難得言猶婦可聽閉闕當日飲想像只忘形

傅冠一首

冠字元父進賢人天啓壬戌賜進士第二授編  
修歷侍讀中允諭德祭酒少詹事詹事掌翰林  
院以禮部尚書兼東閣大學士進文淵閣有寶

綸樓集

陳皇士云公詩清  
華典贍有唐人風

詩話傅公造格矜莊潤  
色閑麗去臺閣體不逮



早朝

西山爽氣接蓬萊紫殿光搖曙色開  
五鳳忽銜丹詔下  
六龍時駕袞衣來  
班聯禁地三台近  
樂奏鈞天萬舞迴  
聖主殷憂方借箸  
趨陪媿乏賈生才

朱繼祚

一首

繼祚字立望莆田人萬厯己未進士改庶吉士  
授編修厯中允諭德庶子少詹事禮部右侍郎  
進尚書入東閣後死于難



絕命辭

嗟予生兮不辰逢慘禍兮櫻身乾坤崩隕兮陸海為塵  
日星掩曜兮萬象沈淪人誰無死兮鴻毛泰嶽惟其所  
處兮殤延彭促旦夕畢命兮去將安之夫妻子母兮不  
得相依上告蒼天兮鑒此微詞雖為齏粉兮甘之如飴  
千秋萬古兮誰其予知與化俱徂兮於戲噫嘻

揭重熙

一首

重熙字萬年臨川人崇禎丁丑以五經成進士



除福寧知州有蒿菴集

詩話洪武庚午應天鄉試長泰黃文史以作全  
場五經題領解迨天啓甲子龍溪顧公茂猷亦  
作五經題謄錄官惜其才而嫌其違制止謄四  
子書義三篇易義四篇以入同考官祁公彪佳  
取之既放榜始知為五經也崇禎甲戌會試以  
知貢舉林公紆言士子有作五經全題者得俱  
勝進允之於是顧公中式禮部刊會試錄特旨  
命題顧公姓名於第一人李青之前蓋異典也  
至十年丁丑則臨川揭公重熙十六年癸未則  
嘉興譚公貞良慈谿馮公元鵬武鄉趙公天麒  
皆以五經舉鄉會試又萊陽宋公瑚十二年己  
卯亦以五經中山東鄉試此科場盛事予在明  
史館分撰文苑傳擬以顧揭譚馮數公合作一  
傳既而放還不果念數公皆無負科名述之詩



話真後之載筆  
者或有取焉

過釣臺聞晉撫蔡公訃哭之有感謝參軍遺事漫

賦

天星俄落晉陽軍路出西臺恨欲吞留得竹根如意在  
化為朱鳥也招魂

曹學佺

四十二首

學佺字能始侯官人萬厯乙未進士除戶部主  
事移南大理寺副轉南戶部郎中出為四川右



參政浙江按察使降廣西參議遷陝西副使留

任桂平道天啓中除名為民崇禎初復官不赴

家居殉節死有石倉全集

葉進卿云能始詩刻意三百篇取材漢魏

下及王章其旨沈以深其節紆以婉其辭清冷而曠絕其初為眾所譁久而世稱之周方叔

云先生力追正始響逸開元正如皎月素波清輝自別朱鬱儀云能始天才典贍研討精深

軒輊三唐吐納漢晉貌境必似造語斯真氣峭以潔而操調極平意鍛以鍊而摘辭若樸與會

所至神情獨往

詩話明三百年詩凡屢變洪永諸家稱極盛微嫌尚沿元習迨宣德十子一變而為晚唐成化



諸公再變而為宋弘正間三變而為盛唐嘉靖  
初八才子四變而為初唐皇甫兄弟五變而為  
中唐至七才子已六變矣久之公安七變而為  
楊陸所趨卑下竟陵八變而枯槁幽冥風雅埽  
地矣獨閩粵風氣始終不易閩自十才子後惟  
少谷小變而高傳之外寥寥寡和若曹能始謝  
在抗徐惟和輩猶然十才子調也粵自五先生  
後惟蘭汀小變而歐楨伯黎維敬區用孺輩猶  
是五先生之調也能始與公安竟陵  
往還唱和而能矚然不滓尤人所難

雪桂軒花開得語字

桂樹山之幽予昔擇而處顧此山中雪盈枝何楚楚去  
歲花開時山川蜀道阻臨風祇相思馨香落何所暮春



歸林下棲息淹時序月明花正發露下清且滑飄飄入  
人衣採摘盈筐筥料全久要義形影盍相與隱者信可  
招胡媿騷人語

林守易以新舫載予同游鼓山

木蘭舟既成圖書載亦備匪資登山興疇信涉川利渚  
花垂岸榮沙鳥近灣戲浪洶峽門束帆側巖影墜密林  
屢移邛疎鐘遙傍寺微月出浦口澹然見游思

出郭別陳振狂將以暮潮解纜發之九龍



翩翩雙黃鵠矯矯雲中飛疾風一相失奄忽東西馳眷  
此同袍友恩義無乖疑春華不久榮秋葉乃多萎念當  
展行役攬涕從此辭往路何浩浩乃在瘴海涯答言別  
故林與子同一時方舟夙已戒利涉臨余斯斟酌盈觴  
酒各致平生私景光不相戀良駟終難追攜手念已遠  
出門視多岐凡影但俯形一失俱相離幸言懷明德有  
如渴與饑心為道路樞安得不自知慎哉各努力勿負  
歲暮期終當續古懽為樂猶未遲



峽口逢陳幼孺

出門識別苦登車愁路長峽口斷地脈南北遙相望僕  
夫停其綏川廣限無梁仰視浮雲馳鴻鴈同翱翔方舟  
未云涉矚險先傍徨道逢相識人乃為心所當上言長  
相思下言適何方屏營周路側原野何茫茫安得盈觴  
酒與子同酌嘗大義亮金石俛仰鬱中腸吾欲展此曲  
列坐無高倡執手惜欲別險阻誰相將此水淺且涸離  
憂方可量命不與願俱悲為參與商羨歎雲中鵠比翼



歸故鄉

夜宿迎仙館

扶策入名山幽竒恣心賞嶺路鬱且紆投林日已曛修  
渚留餘光玄廬此開敞止宿無別驂烟霞集吾黨以茲  
流水喧遂致衆山響明月襲具輝盈盈照帷幌幽人有  
遐夢夢到羲皇上金雞遶樹號東方色微朗晨起不及  
炊浩然乃長往

喜雨同茂生作



在天有常度雷鳴雨可必奈何轟然聲未見涓與滴祇  
言他山暝轉為日氣逼久之稀渡河而後月離畢天澤  
若王師奚為後我及禽眠枝上起蝸涎瓦間滌秋至農  
可望晨興厨充食祇恐懸河傾明朝溪路澀童子報平  
沙離岸已數尺

雨中過柳陳父看杏花陳父時有攜李之游

君家住近瓦官寺金陵城中最僻地向來名作杏花邨  
花開始有游人至此時結伴過君家歲歲年年成故事



花枝雖不用錢買濁酒應賒為客醉客醉看花倒接羅  
瀟瀟微雨踏成泥枝頭莫惜終零落明日東君渡浙西

棲霞寺

入山已深邃初地化為城古塔無全影疎鐘尚舊聲佛  
龕沿嶺鑿僧舍傍泉成怪昔梁江總幽居斷送迎

得張林宗書

三秋望不見此日寄來書簡略無餘字蕭條慰索居何  
嫌知我少惟恨與君疎安得秦淮水能通浪蕩渠



病中思歸

累雨山寒重，今春花事稀。  
長貧那免病，百好不如歸。  
海樹遙閩嶠，江津黯燕磯。  
故園猶有路，夢裏已多違。

蕪湖

客問鳩茲地，蕪湖七里長。  
春秋無義戰，吳楚混封疆。  
館驛臨江左，僑居盡洛陽。  
猶餘缺山石，屬古丹陽。

由鴨欄至巴丘登岳陽樓

欲問巴蛇豕，先過鬪鴨欄。  
山名天岳固，湖取洞庭寬。  
郡



邑如沙聚帆檣若樹攢平生懷曠達今日遂游觀

山路雜興

瓦井尋何處沙溝苦欲崩斷碑猶有寺乞食即無僧山  
勢開仍闔天光降遞升平生懷勝癖遇此乃飛騰

木瀆過黃伯傳宅

已失橫塘路仍逢木瀆橋夕陽湖正滿春草岸俱遙餉  
客煩雖黍呼童灌藥苗由來故人宅相過意偏饒

歸宗巖道中



輿步行相半山迴徑轉幽野亭漁並席官渡馬同舟樹  
古根盤道橋崩石咽流日斜人境寂谷鳥嘯啾啾

溫陵

驛路連山路城門控海門島船秋更急沙鳥暮能喧落  
葉樵蘇迎刺桐風雨邨素衣塵變盡聊以濯清源

荒口鋪

地與施州近山開百里長未應能弔屈只合此投荒燒  
過厓俱黑春歸草尚黃南流溪水急那更入巴鄉



登塗山絕頂

百折來峰頂三巴此地尊層城如在水裂石即為門  
澗以高逾疾松因怪得存瑤階金翠色人世已黃昏

沙溪別東生

幾夜舟中語沙溪便有程恐將離別淚一灑合州城  
小雨入江暮微陽穿樹明日歸何不得歲晚事孤征

合江舟中閏十一月晦

獨坐舟中趣無人對寂寥讀書猶不覺問路便成遙江



水屢云合離魂何處招非緣今歲閏除夕更蕭蕭

臘月之朔過江津

似此嘉平月言過險惡灘春光臨路近夜雨入舟寒酒

禁開云乍梅花惜已殘迷津如可問休作隔江看

時予乍撤

素齋

寄信

家居閩海上寄信兩都中道里雖然隔逶迤或一通人  
生皆逆旅歸念甚兒童無計堪相慰淒其落葉風



支機石

一片支機石傳來牛女津  
客槎何處所卜肆已生塵  
較似昆池古長從漢月新  
每逢秋夕裏吟眺倍相親

萬曆皇帝輓歌

庚申年七月內事

薄海聞遺詔昊天號泣多  
勵精時匪懈法祖算還過  
龍去徒留劍鳥傷不渡河  
前星早有屬臣庶已謳歌

泰昌皇帝輓歌

四首

龍馭升遐日封章滿御牀  
施行猶令旨德意自先皇  
沛



若江河決俄然石火光更聞哀詔到能不重傍徨  
勸進箋三上騰懼通九垓逐臣皆召用中使盡收回貨  
出昭先儉心勞集相才大工須計日久矣柏梁災  
罷稅不停徵邊庭歲用增金錢溢輸輓士馬飽飛騰北  
闕聞天語東隅望日升那堪遽辭世倉卒治山陵  
九轉神丹祕三旬帝業終春秋書法謹中外揣摩窮兩  
泣將填巷攀髯或墮弓由來戮方士豈但為無功

寄關中張太守



關西遙望路漫漫  
泰華峰陰日夜寒  
長樂故宮秦輦絕  
未央前殿漢鐘殘  
月明渭水浮三輔  
花發驪山繡七盤  
京兆風流誰不羨  
時從閨閣畫眉看

送荆民部之淮陰

水色浮空下洞庭  
青山不斷好揚舲  
人過北固吳王寺  
吏待南昌楚客亭  
別日鴈鴻俱後到  
望秋蒲柳已先零  
但思擊筑荆卿侶  
長自悲歌不願醒

金陵懷古



江東列郡領丹陽鼎足三分此一方總為石頭成虎踞  
不知巫峽下龍驤雲生寢廟千秋閔月照籬門幾夜長  
年少風流能傾曲行人猶自說周郎

雄縣

燕南趙北易西京此地猶傳避世名河向瓦橋關外轉  
樓聞鼓角地中鳴雄山警蹕留行殿亞谷降王有故城  
幸沐聖明無外化來遼何事日尋盟

武夷



丹丘遺蛻不知年  
方外尋真思渺然  
仙橘堂空棋撒局  
御茶園廢竈無烟  
峰頭亂插虹橋板  
渡口難移架壑船  
忽聽玉笙聲縹緲  
步虛已近大羅天

大田驛訪陳伯孺時伯孺客越未歸

斜陽繫馬訪幽棲  
古驛門前渡小溪  
鬼火漸明青嶂裏  
人烟猶隔翠微西  
涼生遠樹鳴蟬斷  
秋老平沙落雁低  
何事王孫歸未得  
松雲蘿月思淒淒

湖間即事



仙源迢遞杳無涯  
拂樹齊開十月花  
半壁莓苔千古色  
一邨雞犬幾人家  
珠簾暮挂峰頭雨  
玉箸晴餐洞口霞  
世路不堪回首望  
成田滄海日將斜

蜀府園中看牡丹

錦城佳麗蜀王宮  
春日游看別院中  
水自龍池分處碧

即摩訶池  
華言龍也

花從魚血染來紅

蜀中牡丹以魚  
血紅為第一

平臺不到

林間日曲岸時迴  
洞口風盡道今年  
當大有何妨行樂

與人同



送戚山人之內黃蒹簡鄧遠游明府

三月鶯聲別故山  
萋萋芳草照離顏  
春光白下無多日  
夜月黃河第幾灣  
置驛正當賓客盛  
弄琴遙識使君閒  
閨中易作刀頭夢  
珍重休過博望關

送李玄白擢淮揚運長

東南財賦困征求  
轉運今須第一流  
際海金錢輸九塞  
隔江歌吹是揚州  
春風芍藥堂前宴  
夜月瓊花觀裏游  
舊治如臯行部處  
冰絃猶自韻高秋



送茅止生北征

中原兵氣亂成羣  
流寇流民兩不分  
背水孰能韓氏陣  
撼山難動岳家軍  
衝邊慣戰方良將  
側席憂居有聖君  
七尺男兒三尺劍  
笑人毫褚立功勲

松梯

身入蒼翠中  
落日無人影  
步步踏松根  
不覺到前嶺  
清溪朱邑宰  
里人也以荔支名  
綠扶包者見餉

三灣亭子寄山坳  
夾樹人家似鳥巢  
漫說故鄉相見好



荔支先餉綠扶包

即席贈黃姬

座客如雲待舉杯  
香車門外屢相催  
非關故意梳妝緩  
自昔佳人喚夜來

黎遂球

五首

遂球字美周番禺人天啓丁卯舉鄉試死贑州

之難有蓮鬚閣詩集

萬茂先云美周思以才靈學以才化識以才通語以

才妙讀其詩覺有靈光異采在目光離合間徐巨源云萬歷五十年無詩濫于王李侔于表



# 花下歌

徐纖於鍾譚乃今獨見美周讀之如春風駘蕩  
夏雲崔嵬如坐百花雜聽簫韶美人劍客翺動  
左右陳伯璣云美周近體稍傷  
艷麗五言擬古諸作高于今人  
詩話宋季吳月泉主社賦春日田園雜興羅公  
福擅場得羅一嫌七筆五十矢墨五笏元季饒  
介之主席賦醉樵歌張仲簡擅場得黃金一餅  
崇禎初鄭進士超宗未第時主會賦黃牡丹詩  
者百人美周居第一時號黃牡丹狀元三事本  
太平佳話而皆出於百六之秋公福肥遜仲簡  
遂初美周則授命虔州二君子各自靖尤為美  
談美周詩不為格律所縛大都以才勝徐巨源  
謂太白以後一  
人未免過實矣



生平不事求神仙願上東海求仙船  
童男童女各三千教之歌舞及管絃  
逍遙行樂二十年遂令婚配同力田  
可得萬人馳九邊大雪國恥銘燕然  
老夫鬚眉圖凌烟結屋花國臨酒泉  
名儒俠客列四筵等閒詩賦人爭傳  
乞得一字十萬錢

歡聞變歌

鏡破面白圓誰能破儂面  
天地縱反覆儂亦與歡見

懊惱歌



歡初戀儂時夜夜門前立今日歡棄儂對人不敢泣

少年行

年少傳聞十二州報人讎盡轉多讎經行不用變名姓  
醉卧胡姬賣酒樓

山中

寂寂春眠野夢多酒醒那識夜如何山中慣不聞雞犬  
只是天明鳥便歌

梁朝鐘 三首



朝鐘宇未央廣州順德人崇禎己卯舉人有喻

園集

憶檀溪

半月襄城路山川滿目迷後聞都護語知己渡檀溪遙  
憶歸鞭處微沙沒馬蹄叩門抱長慟恐入邵陵西

將出皖留別楊六符沈乃功唐聖俞徐譽星諸先  
生時予將入襄歸粵

船傍垂楊別緒生烟含春樹鴈歸聲羣公綈帶遺吳錦



幕府青絲唱渭城  
幾樹啼鳥趨夏口  
何時馬首望西京  
江南江北如相憶  
千里高樓待月明

張家玉

三首

家玉字玄子東莞人  
崇禎癸未進士改庶吉士  
有遙夜怨軍中遺藁

錄別和李定夫

鴛鴦戲清池  
兩兩常相倚  
羽翼臨當乖  
風波中道起  
相對尚難知  
何況萬餘里  
來親去者疎  
毋為貴君子  
予懷



抱區區君諒執高誼

塗中感舊

燈下妖姬月下筵  
風流曾汎太湖船  
如今回首神京隔  
腸斷西風憶往年

閨思

竹林啼鳥通春暉  
何事行人尚未歸  
惆悵夜來牕月白  
夢魂飛不到金微



明詩綜卷七十八

楊廷樞

三首

閨情

寂寞空閨怨夜長  
征人何事未還鄉  
不知牆外誰家笛

十二樓中盡斷腸

陳子龍

三十七首

子龍字人中更字臥子  
青浦人崇禎丁丑進士

除惠州推官丁憂服除  
補紹興舉廉卓天下第



一升吏部主事改兵科給事中有白雲草廬居

湘真閣諸稿

朱雲子云臥子五古初尚漢魏中學三謝近相見輒諷太白諸篇其

才性故與相近七古直兼高岑李頎之風執視長安帝京更進一格五律清婉七律格清氣老秀亮澹逸絕句雄麗由其才大靡所不有寬然有餘  
魏楚白云五古學漢魏者大抵轉關必在大謝唐之曲江明之北地皆是如此黃門亦祖其說能於質問之中兼以俊秀信是雅宗七古弘正間皆仿浣花唯青蓮學者絕少黃門起而一振其風昔人詩芙蓉露下落楊柳月中疎黃門近體佳境往往相似  
錢瞻百云大樽當詩學榛蕪之餘力闢正始一時宗尚遂使羣才蔚起與弘正比隆推廓振興之功斯為極矣  
繆天自云剝窮而反否極而復先徵於聲音之



道臥子當楚人衆咻之餘力追正始允矣人豪  
龔蘅圃云臥子定幾社六子之作目曰壬申  
文選東鄉艾南英千子貽書謂之蓋學前後七  
子之詩而并學其文千子非之是也若詩當公  
安竟陵之後雅音漸亡曼聲竝作大樽力返於  
正翦其榛蕪棘荆驅其狐狸獠貉廓清之功詎  
可藉口七子流派并攢譏及焉予嘗購得顏甄  
洞集係先生手自施鉛自越江渡錢塘往返點  
筆無虛日卷尾必以朱墨識之於吳明卿若是  
矧古賢吟橐乎今人手放翁誠齋詩讀未終卷  
便毀唐人為不足學  
多見其不知量已  
詩話王李教袁公安之派浸廣竟陵之燄頓興  
一時好異者譎張為幻關中文太青倡堅偽離  
奇之言致刪改三百篇之章句山陰王季重寄  
謔浪笑傲之體幾不免綠衣蒼鶻之儀容如帝



釋既遠脩羅藥叉交起搏戰日輪就暝鵬子鴉  
母四野羣飛臥子張以太陰之弓射以枉矢腰  
鼓百面破盡蒼蠅蟋蟀之聲其功不可泯也觀  
其與李宋二子選明人詩自序略云一篇之收  
互為諷詠一韻之疑互相推論攬其色矣必準  
繩以觀其體符其格矣必吟誦以求其音協其  
調矣必淵思以研其旨於是郊廟之詩肅以雖  
朝廷之詩宏以亮贈答之詩溫以遠山藪之詩  
深以邃刺譏之詩微以顯哀悼之詩愴以深使  
聞其音而知其德省其辭而推其志先生之論  
詩知所本矣

曜靈

六章 並序

曜靈天子遇旱而憂省獄減刑雨以時降詩人



美之也

曜靈維陽杲杲麗天爰自東作火見于昏天之薦瘥蘊  
隆如焚皇曰予冀方邦畿所安廢我來牟兆民孔艱  
旱之始盛維塵冥冥旱既太甚百卉具零豈降自天胡  
德非馨曾是有象恭曾是有讒慝曾是有詭隨曾是有  
培克

爰命宗伯大雩孔明爰命徹侯于郊于宗以爾幣玉及  
爾斯牲方社既周山川用享振古率育胡遘予不寧



巍巍薊邱維君宅之翼翼皇心維天繹之禮莫不展來  
饗來格膳宰既徹鏞鼓既釋凡百君子勗爾無斁

皇曰司寇維刑世重世輕朕聖姦宄或愆于平悍陽驕  
驕憂我黎氓乃清岸獄乃釋累囚肆赦時夏或歌且謳  
倬彼燕山出雲油油終朝彌野既舒既柔既霑既優田  
畯語語樂我士女以育我稷黍皇王布惠天錫純嘏

仲夏直左掖門送彝仲南歸

金塘迴素波中有雙鴛鴦託身在清禁和鳴君子苟顧



此同林鳥孤翼忽南翔生平志慷慨何事獨難忘本為  
四海人豈得常相將丈夫重知己萬里同一鄉黽勉效  
貞亮德輝在巖廊莫憂青蠅多和璧貴善藏執手不能  
語悵矣結中腸

雜詩 六首

日夕登高臺馳目窮千里衆星燦雲間經緯誰能理神  
哉玉衡運天樞無終始上有瓊瑤宮紫皇日端委我欲  
乘飛鸞銜書碧雲裏聲殷塗逾遐心長情何已懷中五



色石相見徒磊磊

山椒微風發薄暮遲佳人頽陽澹林表素月生河津佇  
立懷往路時宴多苦辛君家青雲樓瑤華艷當春皋蘭  
亦有芳欲寄良無因歡愛豈足重要使恩誼申浮雲誠  
易阻白璧終見珍

至道無相非末流乖心迹高懷苟不亮執誼日以積賢  
隨貴同用愚與賤交役騰名自有階投譏豈無隙營營  
棘上蠅可以攜金石履純思寡尤超方鮮奇策毀譽苟



未忘顧影慙跼蹐

尚口自有窮捫舌豈我欺伊予昧機變率性不自知遇  
物皆裏言當險若履夷于已固弗慎安望人保持俯仰  
生平內常與悔相隨沈默苦不早壯盛忽若馳世人貴  
形迹君子敬威儀臧否聖所誠南容真我師

自聞麥秀歌經繇亂心曲四野起重陰白日一何速親  
朋與我違豺虎來相逐皓皓凝河冰蕭蕭落山木行吟  
空自知獨立傷游目逝川何時還頽光能再燭詎惜紅



顏變所悲韶景蹙豈無帝女靈願就愚公谷

墓門有惡木鷓鴣巢其顛同茲雨露潤不與百卉妍性

質固自殊大造安能遷我行適見之三日醒未痊利斧

雖在手斬伐無此權去去保芳潔悔然思過愆

魏楚白  
云大樽

雜詩融銑晉魏自成  
一家得力又在景陽

賦得浣紗石

越紗出機中翦向春風裏皎若秦川雲飄揚隨淶水佳  
人臨淺瀨無言空徙倚不惜紅顏勞素絲誰為理斂衣



入中林澄江皓千里青苔日夜生沈思竟難已

苦雨

洩雲屯層嶺密霧瀰空林南山發殷雷北郭滯愁霖紅  
泉落虛壁淶水漲遙潯危條度飛鼯宿莽聚鳴禽桃英  
蕩華色麥穗悲陸沈天畢騁所好屏翳日相侵徘徊華  
軒下彷彿碧山岑昏墊蕩下土沈冥符道心側想零雨  
篇空懷梁父吟

寓言



江東有凡鳥自名為禿鶩食魚徒滿吭毛羽終可羞其  
或所立渚鷗鷺必遠投何來一蒼鷹鐵翮黃金眸不作  
摩天飛下集滄江側身與鶩伍比翼相遨遊末流安  
可居貴賤各自求所以老鶴心傲然橫高秋

小車行

小車班班黃塵晚夫為推婦為輓出門何所之青青者  
榆療吾飢願得樂土共哺糜風吹黃蒿望見牆宇中有  
主人當飼汝叩門無人室無釜躑躅空巷淚如雨



桃源夜遇鄭超宗落第還維揚

相逢班馬鳴三月出王京秉燭黃河岸  
悲歌下相城風雲雙闕暗花柳半江明  
突兀金臺上知君最不平

交河

烏啼征馬動曙色散滹沱海氣通三島  
天風靜九河沙平邊草斷日澹塞雲多  
百里無烟火空邨空自過

襄陽

江漢西陲重荆襄南紀雄諸侯悲峴首  
耆舊失隆中燧



色通秦塞妖星下楚宮不知大隄女何處舞春風

高寓公書來詢予近況予適從石齋先生築講壇  
于大滌山留連竟日遂書此報之

三山迷漢使更起白雲壇環珮天風滿旌旗海日殘草  
侵羣帝靜月度九霄寒惆悵乘鸞者焚香獨夜闌

廬居

行遯山河改歸來松菊荒尚餘三畝宅無復萬家旁祈  
死煩宗祝偷生媿國殤但依親隴在含笑此高岡



錢塘東望有感

清溪東下大江迴立馬層厓極望哀曉日四明霞氣重  
春潮三浙浪雲開禹陵風雨思王會越國山川出霸才  
依舊謝公攜屐處紅泉碧樹待人來

晚秋雜興

太行東出擁神京古塞秋風右北平笙鶴已辭滄海使  
貂蟬初撤羽林兵清霜玉沼芙蓉苑旭日金鋪翡翠城  
魚鑰時傳宣召急侍臣通籍在承明



晚渡錢塘

吳山越岫隔中流  
簫鼓平明青翰舟  
萬里晴江開曉郭  
千帆春草送芳洲  
桃花欲落潮先至  
鶯語初聞露未收  
何事西陵常問渡  
不堪獨上望京樓

送吳巒穉司李桂林

翡翠巢邊匹馬過  
千盤桂嶺鬱嵯峨  
南浮灘水啼猿滿  
北望君山落鴈多  
蠻府官閒能作賦  
漢廷恩近憶鳴珂  
愁心獨繫張平子  
欲寄瑯玕奈遠何



送張玉笥中丞擢河道少司空隨召陛見

舊京開府靜牙璋  
詔領河堤入未央  
周室保釐分郊廓  
漢家底績念宣房  
九天星宿穿秦塞  
萬里梯航走冀方

為語至尊南顧日  
不堪重問海陵倉

錢瞻百云雲間七律多從豔入大樽

味特深厚而詞更娟秀

吳越武肅王祠二十韻

羅平妖鳥集唐室  
已顛連草草羣雄事  
紛紛割據年斗  
牛占王氣屠販出  
豪賢地屈孫劉勢  
形支江海邊爪牙



多健勇參佐集神仙本奉中原朔時分屬國天錦城開  
邸第大木擁旌旃受冊三樓上歌風駟馬前自從納土  
後終見舉宗遷青蓋方朝洛丹書改賜田金輿何日去  
玉盃不曾還守墓新恩重荒祠舊德傳冕旒皆壯麗子  
姓特繇聯晚樹騰鼯鼠虛簷響杜鵑崇功銘版碣遺恨  
滿山川異代還祠廟當年八管絃竇融應貴寵張軌共  
周旋錫禮何妨盛王侯豈易捐誰言脫屣便不見誓書  
堅宋室諸陵在南枝更可憐



邊詞 二首

大同女兒顏如花十五學得箏琵琶莫向中宵彈一曲  
清霜明月盡思家

八城亦是古遼西大靉高牙萬馬齊壯士錦衣行樂地  
十年無夢到春閨

從軍行

彎弓獨上李陵臺極目燕支秋色來磧路西迴三萬里  
青天遙挂白龍堆



督亢咏古

燕南趙北起秋風  
易水悲歌慷慨同  
此地興圖原不小  
能藏七首入關中

侯岐曾 一首

岐曾字雍瞻蘇州嘉定人通政峒曾弟縣學生  
援例入國子監以陳子龍事牽連執至松江遇  
害門人私謚曰文節先生

望湖亭口占



俯檻即湖陰沿流望隔潯峰開三面色人雜五方音簫鼓龍祠鬧松楸馬脊深悠然喧寂理飄泊一觀心

夏完淳 十一首

題寓園松徑

長風何處起清響落層湍忽聽晴空雨翻飛午院寒蒼鱗移漢殿鐵幹老秦官即此開三徑徘徊盡日看

祁幼文云

春容大雅

廊露 二首



露字湛若南海縣學生有嶠雅

梁芝五云湛若上元跨馬衝南

海黃令行慙令怒拘之微吟曰騎驢適值華陰  
令失馬還同塞上翁及廣州城陷猶倚柱鼓琴  
為兵所刃抱琴死錦衣葉君贖之嵇侍中之衣  
房公之馬宜為世所重也沈山子云湛若詩  
鏤金葉玉以雕琢為工  
其不經意處時臻大雅

詩話湛若工諸體書學使者試士以恭寬信敏  
惠發題湛若制義五比用大小篆八分行草書  
千卷學使者大怪之然不罪也居恒以才略自  
負見海內多事因學騎射跨馬出門衝縣令頭  
躡令怒申文學使者除其名將加以桎梏乃亡  
命之廣西遍尋鬼門銅柱舊蹟游于岑藍胡侯  
槃五姓土司為徭女執兵符者雲郭娘書記歸  
撰赤雅一編紀其山川風土儀物及女君天姬



隊歌舞戰陣之制家蓄藏真墨蹟享帚千金素  
問業於香山河閣老吾胸閣老見而愛翫不已  
湛若分手脫贈既而大悔挈舟抵香山升閣老  
之堂欲自挂梁上閣老亟卷還之又蓄二琴一  
曰南風宋理宗宮中物一曰綠綺臺唐武德年  
製明康陵御前所彈也出入必與二琴俱廣州  
城破湛若抱琴死綠綺臺為老兵所得以鬻於  
市歸善葉錦衣解百金贖歸至今存其家詩曰  
嶠雅手書開雕極精楷  
予嘗見其駢體文亦佳

### 虞山謁舜祠

荒服垂衣日三苗格命年  
鳥耘千畝籍龍御九疑烟  
蒲坂征雲外蒼梧落照邊  
何人撫瑤瑟離恨隔湘川



采石

牛渚青天月長縣供奉祠如何今夕酒不共昔人持高  
詠誰能似扁舟從所之溯洄殊未已言折楚江蘼

明詩綜卷七十九

沈自徵 一首

古意

素絲非一絲機中織成帛卷舒生容光從郎自搖襪



贈別袁重其

高飛鴻鴈滿關河此日寒江起夕波  
庾信哀時常作客梁鴻去國獨行歌  
霜淒茂苑清砧急月照荒臺落葉多  
為問吳中舊知己空山叢桂近如何

馮班十首

班字定遠常熟人有鈍吟集

陸勑先云定遠詩敦厚溫柔穠麗深

穩美刺有體比興不  
滑無字不有來歷

詩話啓禎詩人善言風懷昔莫若金  
沙王次回定遠稍後出分鑣並驅  
次回以律勝定遠以絕



句見長大都次回全學溫李而定遠多師其源出于才調集也

戲題四韻

三十六鴛鴦輝輝滿路光  
花衫迎日薄草帶引風長  
不隔車中笑從飄過處  
香專城方四十年少不須狂

游仙詩 四首

書邀女伴看桃花  
三鳥回時滿地霞  
記得明朝是丁卯  
青童又合上東華

紅桂開時試舞腰  
素娥爭換白鮫綃  
歸來更按鈞天曲



吹裂眞妃碧玉簫

貪看對奕不歸家誰折當門玉樹花  
特勅雷公往追取半空鞭下阿香車

玉洞桃花又爛開等閒相望隔塵埃  
劉郎也似山中水一到人間便不回

無題

叢桂風多起夜遲柔腸已到九迴時  
瑠璃牕外姮娥影喘殺吳牛自不知



雨霽

溪水溶溶拍野橋  
薄雲開日露林梢  
不知一夜前邨雨  
多少春泥上燕巢

梅花

長廊盡處是東牆  
柳絮風中見謝娘  
今日不堪簾外樹  
一枝和粉弄殘陽

立春日

梅花拂拂柳蓂蓂  
半夜春來睡覺酣  
曾向羅敷牕下坐



最思朝日到東南

題畫

柳花飛盡綠陰肥  
雨到濃雲濕不飛  
邨酒正香茅屋小  
漁翁閒却釣魚磯

明詩綜卷八十

陸來一首

來字陶孺吳人



梅花

踏殘山徑草蕭蕭  
藉有幽花慰寂寥  
幾縷炊烟恒遶屋  
一灣流水慣依橋  
寒輕籬落禽初啅  
春入園林雪未消  
臥後參星橫夜半  
冷香吹夢月迢迢

杜濬

十四首

濬字于皇號茶村黃岡人有變雅堂詩集

詩話啓禎之間楚風無不效法公安竟陵者于  
皇獨以杜陵為師是亦豪傑之士惜其阨窮以  
老孟貞曜所云  
好詩多抱山也



游夾山漾

出塢謝羣賢放舸理長嘯烟岫映澄波始知所歷妙林  
壑羅秋姿紫翠冑寒照蘋汀欲為雪楓岸忽如燒目逐  
絕境往意愜佳處要層峰何嬋娟灣環亦窈窕泛漾疑  
江湖回帆復蘿蒿面面見道場山一一一起憑弔尋幽不  
覺遲歸晚顧而笑石門免見訶登樓感同調

九日一草亭時將與天章別感賦十六韻共用日  
字



秋深雨廉纖意外晴此日薄雲雖未歸解散已可必危  
坐傷我懷雅意不欲出歛聞良友招不待盥漱畢登高  
一草亭豈在山翠律幽人先入座鳴琴未離却盤榻但  
隨時杯香帶橙橘暫覺百慮蠲遊從任疎密叢菊花故  
遲黃蕊苞漸茁籬蔓弱迎霜宛結小紅實獨感薜荔枝  
來時伴繭栗于今已扶疎殘陰映細帙白頭久飄零俗  
態如蟣蝨遙遙三令節過眼一何疾念此動衷腸匪第  
憶家室悵別方自茲歌笑忽如失



揚州雪

揚州雪積如山滿城乞兒盡凍死商人亦覺今年寒客  
子衣單資用竭偏到揚州來看雪雪下白蕤蕤入釜不  
可炊江南亦有雪江北來何為

金山

山從南北望孤櫂始登臨坐覺春雲動行看水國深江  
流元自湧天地亦何心獨拜蘄王廟英風爽客襟

登金山塔 二首



極目非無岸滄波接大荒人烟沙鳥白春色嶺雲黃出  
世登初地思家傍戰場咄哉天咫尺消息轉茫茫  
薄暮難為狀空中別有聞懸燈江海合望月水天分寥  
廓身何往飄零興不羣向來峰頂色看作下方雲

焦山

出郭來差遠憑高望獨深江分神禹跡海見魯連心密  
竹藏金像回流灌石林擬尋幽絕處却誦白頭吟

菱湄舟中偶成



一雨連三月開帆趁晚晴春風吹岸草知是石頭城

臘盡還冶城寓戲為口號

二首

淮水凍仍綠鍾山燒更青一棧來復去只似短長亭  
妻孥誤見嗔我信如潮汐出門必上元還家必除夕

### 泰州

窮海三秋盡扁舟百里行夕陽無近色偏照遠帆明

### 道中望樓霞

目極危巒日下春茅君廟裏幾株松心知不及中峰宿



今夜猶聞寺外鐘

佛殿

大樹風多葉盡飄  
莊嚴猶自見前朝  
黑頭江令殘碑在  
不記君王舊姓蕭

白雲菴

松篁自結一幽蹊  
積葉柴門咫尺迷  
我記白雲菴去處  
過山又過小橋西

方文十五首



文字爾止桐城人有金山集

潘蜀藻云爾止詩  
陶冶性靈流連物

態不屑章縫句繪間有率意之作頗為學  
者口實不知皆嘔心刻臍而出之者也

詩話爾止問作可笑詩句頗為時論抑  
如嘉穀登場或春或揉批揀終少于粒米也

### 田居雜詠

平生好結交雅多同契友相見輒稱詩  
詩罷即呼酒小飲須數升大飲必數斗  
家貧苦無錢質劑隨所有有時酤不得  
輦蹙循牆走百畝今始歸種秫先廿畝  
秋冬計釀數三百六十缶一日一缶傾  
早晏惟吾取茅堂客來



過杯竿勿離手爛醉與狂吟兩者俱不朽

華不注

歷城東南隅故有華不注晉師逐齊侯三周即此處其  
山拔地起四面無依附孤峰秀插天娟娟入雲霧我來  
恣游覽艱險殊不顧礫石千萬石上下無一樹遠望如  
芙蓉菡萏未開露所以名華不古人亦善喻今人罕識  
字相呼失其故趙李乃詞宗如何音亦誤

不音芙蓉花附  
也趙子昂李

于麟  
亦誤



再游焦山

匡山以續著嚴州以光名二公皆寒士千古垂英聲乃  
知山水性弗以人爵榮我今登茲山緬懷焦先生蝸廬  
僅容膝獨往栖柴荆鄰火延其居露處了不驚斯人胸  
臆間寧復有世情所以京江上名與匡嚴并

左蠡行

小艇迎風發星渚繞到揚瀾日過午榜人貪涉不肯停  
黃昏必抵都昌浦俄頃狂飈自西來水聲騰沸山崩摧



况兼雷雨助其勢同舟面色如死灰急曳半帆回左蠡  
暝黑仍馳二十里依稀見岸不得近沙淺曾無盈尺水  
終宵漂泊蘆葦邊風波震蕩誰敢眠世間平地皆好住  
何事江湖年復年

吳門行

一年一度過吳閶腰下百金千金裝今年行李獨蕭索  
布衣白恰秋風涼鄰舟新到惠泉酒青錢一緡沽一斗  
顧我囊空無百錢仰視秋天但搔首可憐書劍老風塵



客路栖遲多苦辛  
明朝況是重陽節  
風雨飄搖愁殺人

題張大風山人松石圖

泰山上有百尺松  
可惜曾受秦時封  
蔣山下有一片石  
亦受陳時封  
可惜世間土木本  
無情  
且以微寵累其名  
士人守身若處子  
豈肯輕受微塵滓  
張翁贈我松石圖  
筆意瀟灑形高孤  
自言此是唐宋物  
不是陳卿秦大夫

除夕歎

去年除夕歸自北  
行李到門天已黑  
今年除夕客南方



江路逢兵歸不得  
山妻凝望眼將穿  
只道今年似去年  
高樹夕陽鴉影亂  
尚同小女立門前

湯氏宅

浴罷坐林中  
開襟受夕風  
巡檐驚宿鳥  
滅燭救飛蟲  
野哭聞鄰婦  
方言報小童  
夜深微雨過  
點點在梧桐

攝山絕頂

下方惟見石  
不信有柴荆  
仄徑盤空上  
危峰到頂平  
夕陽千嶺秀  
春水一江明  
愁絕浮雲外  
蒼茫舊帝京



章門訪陳士業故居

南州耆舊近蕭然碩果惟君亦可憐  
典冊高文傳海內短牆破屋住江邊  
白頭獨自尋遺跡阜帽相過說往年  
欲訪故人埋骨處亂山孤冢沒寒烟

苔上送曾青藜之吳門

歲暮來游碧浪湖飄飄驚鴨漾菰蒲  
獨攜破笠尋山寺稍喜貧交得酒徒  
此地誰能懸一榻蚤春端合去三吳  
停舟先問靈巖路鄧尉梅花天下無



遇鄉人

君從石城來曾過青溪否我家傍青溪門前數株柳

潯陽夜泊

微微秋月照江沙兩岸楓林蘆荻花苦憶當年白司馬  
不知何處聽琵琶

猷州城

陵陽山下稻花秋南陌東阡自一邱聞道沉沙多折戟  
老農知是古猷州



舒谿

一灣春水漾晴沙兩岸居人十數家溪上重尋仙女廟  
門前依舊碧桃花

明詩綜卷九十一

智舫 十三首

智舫字葦如號秋潭秀水金明寺僧有黃葉菴

詩集

吳少君曰舫公出語烟霞冰雪殆盡澈之  
流貫休齊已不數也 李君實云葦如道



壓叢林而不領眾不立侍者書記詩名滿天下  
而無專集日煨品字柴支折脚鎚咿唔黃葉堆  
中意古寒山拾得再來後身 陳仲醇云秋潭  
老人初居范蠡湖詩法清麗屏除一切流俗晚  
投黃葉菴人愈枯品愈淡讀其詩槁木寒灰  
之意隱隱見于筆端清真蒼老益臻妙境  
詩話上人餅錫舊地在金明寺湖天海月樓東  
有老梅橫牕日吟咏其下後移郊西之黃葉菴  
却深水曲物外蕭然而以善行草書造請滿戶  
限上人亦不憚煩有求者必應也詩不存稿好  
事者就長箋橫幅傳抄  
輯為上下卷刊行之

題陳仲醇小崑山讀書臺

昨日入山來今日出山去去來本無期  
眷此來時路白



駒花下泉殘月松上露茲廬可息心  
邱壑有餘趣

鷦鷯居

不須太倉粟滿腹飽即休何必上林樹  
一枝倦且投却笑叢薄間爭棲暮啾啾  
安知鵲有巢終焉居者鷦

寒山訪雪谷

寒山太湖東二月雪埋塢時有天耳師  
巢居類巢父春秋未半百氣骨自高古  
清泉凍連底蹲石怒如虎此中除梅花  
無物入巖戶



題破窓風雨圖

千山雲頭黑萬山雨脚白大風卷却屋上茅牀頭書卷  
盡打濕幽人縮項破牕裏壁上蘚花長一尺若得溪流  
直到牀釣竿插向枕頭石

人日感舊

去年人日游何處穆家池館寒梅樹今年人日勞夢思  
穆家池館非舊時兀兀頽簷遙倚遍主人何日還相見  
邨南邨北柳樹邊烟條弄影青苔面竹圍橫門池水寒



嗟君夙昔此盤桓而今細雨生春草縱有梅花若箇看  
秋日元微邀集水亭同几上人分得憐字

葉落欲埋徑萍開為進船想懸孤錫處猶是小亭邊池  
水幽相映芙蓉絕可憐晤言須竟日重至恐經年

秋日寄懷吳少君

不堪鴻雁度寒雲猶是高林帶夕曛古路荒臺無過客  
秋風落葉獨思君閒房草色經旬別遠寺鐘聲入夜聞  
可道空山招隱處却憐野鶴在雞羣



送方同叔游天台

浦樹離離接遠天  
片帆遙向赤城懸  
春風幾日滄江上  
驛路千峰落月前  
水冷石梁窺洞壑  
花深巖殿宿雲烟  
從君此去看霞色  
猶是興公作賦年

秋日山中

落木空殿深  
夕陽下山徑  
澗戶松風寒  
獨夜鳴孤磬

野航

泛艇秋湖漁者稀  
船頭船尾雪鷗飛  
偶然放到茅菴畔



載得白頭僧共歸

題周服卿畫

兩岸芙蓉色競紅  
蘼葭容易起秋風  
翠禽箇箇求魚食  
分占枯荷瞰水中

題寥雪閣

小閣主人豪興偏  
日高不起夜不眠  
晚來醉倚理絃索  
門前剛到賣花船

題徐春門畫



山頭雲濕皆含雨溪口泉香盡帶花此是天池穀雨候  
松陰十里賣茶家

以貞一首

以貞字純白海鹽人居資聖寺

七夕

空庭疎雨歇秋思夜來多一葉初離樹雙星已渡河月  
明花裛露風動水曾波乞巧人間事吾生奈拙何

法衡一首



法衡字秋巖海鹽人居天寧寺有竹西齋稿

聞雁

嘹唳天邊雁哀聲靜夜聞雨中孤夢斷空外數行分北  
向歸沙漠南來渡楚雲人間有矰繳高舉莫離羣

法杲 二首

法杲字雪山吳人居華嚴寺有雪山集

詩話雪山參學於雪浪與巢松一雨齊稱詩如鳥  
來迎戶入花發隔溪看芳樹橋邊盡春山雨後新  
野黃潮撼樹江黑雨葺山均饒清韻有集八卷  
一雨所輯王伯穀極賞之謂為近代詩僧領袖



梁溪道中逢姚孟

十載俱漂泊驚逢落照前  
浮雲本無意芳草似相憐  
春水連平野人家入遠天  
還乘明月色隨意放吳船

山居

深山別是一乾坤  
春谷烟濃樹樹昏  
正好看花立溪口  
雨來催我進松門

欽義一首

欽義字湛懷金壇人  
南京報恩寺僧



詩話周吉甫編長干三僧詩湛  
懷興焉其二則雪浪愁山也

雨夜泊涇縣

水宿同鷗鷺平沙晚帶船山城寒漱浦溪雨暗蒸烟漁  
火深秋樹河流淺暮天西風鄉思切千里獨依然







花草粹編卷一

前調

蔡伸

天休使圓蟾照客眠人何在桂影自嬋娟

花草粹編卷八

前調

劉鎮

乾鵲收聲濕螢度影庭院秋香步月移陰梳雲約翠人  
在回廊 醺醺宿酒殘粧待付與溫柔醉鄉却扇藏嬌



牽衣索笑今夜差涼



[ G e n e r a l   I n f o r m a t i o n ]

书名=文渊阁四库全书补遗      集部      明代卷      第十册

作者=杨讷

页数= 7 2 0

S S 号= 1 2 3 1 5 5 2 8

出版日期= 2 0 0 5 . 0 8



目录  
正文